

حلم

هيثم أحمد

حلم  
هيثم أحمد  
تدقيق لغوي: عبد الله ابو الوفا  
تصميم الغلاف : عيبر محمد  
رقم ايداع: 2019/2185  
ترقيم دولي: 5-71-6594-977-978

دار فصله للنشر والتوزيع  
العزيزيه - منيا القمح - مصر  
٠٠٢٠١٠٦٧٠٠٠٧٠١

fasla.pub@gmail.com  
Www.FaslaPub.Com



جميع حقوق الطبع و النشر محفوظة

الطبعة الأولى يناير ٢٠١٨  
الطبعة الثالثة يناير ٢٠٢٠



جميع حقوق النشر محفوظة لدار فصله للنشر و التوزيع  
إن أي تصوير أو إعادة طباعه أو نشر بشكل ورقي أو الكتروني أو ترجمته أو تسجيله  
صوتيا بدون إذن كتابي مسبق من الدار يعرض صاحبه للمسائلة القانونية

حلم

هيثم أحمد



فصلة

للنشر والتوزيع

Fasla Publishing & Distribution



## إهداء

صديقي العزيز

كيف حالك؟

الوقت هنا يمضى سريعاً، يوما يدرك آخر وشهر يلاحق الذي يليه، يخفت ضوء القمر يتسلل البرد تتساقط الاوراق نشعر بالاكتئاب ثم تقسو علينا الشمس بلهيبها، فصولاً تتابع، توقعت ان تتوقف الارض عن الدوران حدادا او تبكي السماء سيولا او تصرخ كما صرخت أنا صامتاً لكن لا شيء يحدث هنا، هل الوقت يمر عندك سريعاً! هل تستطيع ان تراني! هل يصلك دعائي! أخبره يا الله كم كنت أحبه.

أغفر لي بكائي فانك لا تعلم مدى اشتياقي، فقط وددت ان أهديك "حلم" فهو الوحيد القادر أن يبقى الوصال، أهدي ذكراك إلى كل من احبك يوماً وافتقدك اليوم.

إلى

محمد حلمي

محمد إمام

هشام إبراهيم

رزان محمد

غادة سليمان



(١)

مين السبب

"بياع القلوب"

فضل شاكر

ألبوم بياع القلوب - ١٩٩٩





قبلها كان للحب معنًا واحدًا، ومعها تعلمت أن للحب ألف معنى  
غير هذا الذي اعتدنا عليه.

فى ءرفة مساحتها لا تتعدى الأربع أمتار مربعة ءلس ءلمى وهو ينظر لبدول ساعة تعدى عمرها العشرين عامًا؁ يتابع تأرجحه بدقات منتظمة من قدميه؁ وهو يرتدى نظارته الطبية بعد أن مسح عنها بعض ذرات الغبار؁ وبابتسامة لم تفارقه منذ أعوام؁ ضغط على لوحة التحكم فى الجهاز اللوحى لتعلن عن استعداده لاستقبال أول ضيوفه؁ بابتسامة مماثلة لتلك التى يبتسمها ءلمى فتحت الباب امرأة قد تخطت عقدها الخامس.

- "جاهز يا ءلمى؟"

قبل أن يءيب كانت موسيقى كلاسيكية تزين غرفته؁

- "أنا جاهز دائمًا بيكى يا ءبيبة".

لم يكسر هذا التناغم سوى امرأة فى عقدها الثالث أكتسى وجهها بعلامات التوتر وقبل أن تءلس:

- "أنا بقاء مضغوة ءدًا يا ءكتور؁ ءلاص مش قادرة أنا فعلاً تعب مش معقول تكون ءياتى كده".

مع ابتسامة صاحبت ءروج زوجته.

- "أءنا لسه فى الأول".

- "أنا آسفة؁ بس أنا أساسًا بكون ءائفة ءء يشوفنى وأنا ءاية هنا".

- "ماتخافيش عشان أنت مش بتعملي حاجة غلط وممكن بقى تهدى".
- "هاحاول".
- "تمام، ممكن بقى تعبرى لى عن مشاعرك دى دلوقتى".
- "ما هو أنا بقول لك أنا مضغوة".
- "لا أنا عايز وصف للمشاعر، اعتبرى الشعور ده حاجة ملموسة، يعنى ممكن يكون لونه ايه؟ أكثر جزء بيتعبك لما تحسى بالشعور ده، ايه الصور اللى بتشوف فيها، أنا محتاج أسمع شوية منك وافهم شعورك ده".
- "لونه وحاجة ملموسة!!"
- "بالضبط، ممكن تغمض عينيك لو ده هايرحك".
- "لونه ممكن يكون رمادى فاتح، أنا عمرى ما فكرت فى الشعور كده مش عارفة".
- "خدى وقتك".
- "أنا كتافى وجعونى دلوقتى و أنا بفكر فيه".
- "هايل، برافو عليك".
- "نفسى بيكون ضعيف وجوايا غل ومش لاقيه له سبب".
- "تمام، تقدرى توصفى الشعور ده؟ ممكن فى جملة أو كلمة زى ما تحبى".
- "مشتتة".

- «في صورة بتصاحب الشعور ده؟»

- «صورة!!»

بعد لحظات من التفكير:

- «إني قاعدة في لجنة امتحان وعارفة إني هسقط».

وقف حلمي وتوجه إلى لوحة بيضاء.

- «ممكّن تتخيل الصورة دى على اللوحة؟»

- «شيفاه».

- «طيب ممكّن تقسميها أربع أجزاء؟»

- «تمام».

- «غيرى أماكنها وكررى الموضوع ده كذا مرة لحد ما الصورة تروح».

تركها حلمي لدقائق حتى تشوهت الصورة فى مخيلتها.

- «كده الصورة تاهت».

- «ايه علاقة ده بمشكلى؟»

- «مشاعرنا دائماً بتكون مربوطة بصور والمشاعر مش هتختفى غير لما

تختفى صورها، حاولى تكررى ده دائماً».

- «حاضر، هاحاول».

- "هايل، ممكن تقولى لى فى علاقة بينكم؟"
- "بشكل مستمر".
- "بتوصل العلاقة لمرحلة الحميمية؟"
- "لا دى مش فاكهة آخر مرة وصلنا لها كان امتى".
- لا زلن جميعهن يتحدثن بنفس النبرة وبنفس الضعف، تختلف المشاكل وتظل الإجابات متماثلة، ولكن مسحة الحزن فى عينيها أجبرتني أن أنهى اللقاء عند هذا الحد، على الرغم من أن اللقاء لم يتعد الثلاثين دقيقة.
- "كفاية كده النهاردة".
- "أنا لسه محتاجه أتكلم".
- "هنتكلم كثير مع بعض، وماتنسيش اكتبى مشاعرك".
- "حاضر".
- "على ميعادنا بعد ٣ أيام".
- "على ميعادنا، شكرًا يا دكتور".
- "ماتنسيش الموضوع مش سهل ومحتاج شوية مجهود".
- "ربنا يسهل، تفتكر هاقدر؟"
- "الإجابة عندك أنت لوحداك".

يخرج حلمى دفتر ملاحظاته ويكتب،

ساعات طويلة أقضيها هنا بلا نتيجة ترضيني، يدخل من هذا الباب من يعقد آمالاً على ولا أحد يدرك أننى أبحث مثلهم عن الأسباب.

\*\*\*

بدأ العام الدراسى لعام ١٩٩٩-٢٠٠٠، الساعة السابعة صباحاً فى غرفة ياسمين موعد لقائهم اليومى قبل بدء اليوم الدراسى، أسباب عدة تجعل شقة ياسمين هى المكان الأمثل للقائهن، الشقة تبعد عن المدرسة بثلاث دقائق سيراً على الأقدام، ياسمين لها غرفة خاصة، ووالدتها تتجه للعمل مبكراً ومع غياب الأب تبقى ياسمين بالشقة بمفردها مع أختها التى التحقت بالجامعة هذا العام، وأيضاً لها غرفتها الخاصة، غرفة ياسمين مثالية لتجمع نسائى من أى نوع وفى أى عمر، ولأنهن أكثر الصديقات حظاً من وجهة نظره كانت لديهن هذه الغرفة، الغرفة السحرية كما تلقبها مها، كافة أدوات التجميل متاحة داخل علب مخصصة موضوعة بعناية على تسريحة كبيرة تنازلت الأم عنها لياسمين، أمامها يقبع السرير بينهما متر ونصف المتر مساحة تكفى عادة لتمايل قليلاً وهى تستمع إلى أغانيها المفضلة، الدولاب على اليسار بالكاد تظهر أخشابه من كثرة المرايا، وعلى الحائط صور لكل من عشقته من المطربين أو الممثلين، وفى نهاية الغرفة مكتبة صغيرة معلقة تحتوى على شرائط كاسيت، هى مملكتهن الخاصة التى صنعتها لهن الظروف.

حضرت هبة مبكراً بوجه منتفخ لاحظته ياسمين وحاولت أن تمنع النظر ولكنها فشلت فهى بالكاد مستيقظة.

- «أنت مش نائمة ولا معيطة؟»

لم تكن هبة على استعداد لخوض نقاش، أشارت لها بيديها:

- "بعدين، بعدين".

على الرغم من هذا الانتفاخ الظاهر على وجهها ولكنه لم يخف جمالاً اعتادت هبة أن تتباهى به، هى أجملهن ظهرت عليها علامات الأنوثة المبكرة أطول بسنتمرات عن صديقاتها، ظهر لشديدها استدارة قبلهم، بياض هادئ فى الوجه تزينه عيون رمادية، يتناغم خصرها مع أردافها، لوحة مُعبّرة عن جمال هادئ، ورغم كل القيم التى تضرب بها عرض الحائط إلا أن الجميع كان يعاملها معاملة الأميرات، ألقت هبة نفسها على السرير وضغطت على زر تشغيل الكاسيت ليظهر صوت مصطفى قمر:

"قد القلب ما لام على الحب أهو دق ورق وحب وطب".

لباس نوم لا يخفى شيئاً من مفاتها، تحاول جاهدة أن تسابق عمرها، بدأت ياسمين فى التمايل على أنغام نار الحب وهى تهز أكتافها بانسيابية، تتمتع ياسمين بأنوثة طاغية تستطيع أن تؤثر بها على رجال أكبر منها سناً، هى ليست أجملهن ولكنها تهتم بتفاصيل تكفى لأن تجعلها أكثرهن إغراءً، ظلت تتمايل حين وجهت هبة إليها الحديث وهى بالكاد تفتح عينيها:

- "بقولك ايه ماتعمل لى الحتة دى قبل العيال ما تيجى؟"

قالتها وهى تشير إلى بعض الشعيرات أسفل أنفها، دون أن تتردد توجهت ياسمين إلى التسريحة وهى تخطو خطوة إلى الأمام وأخرى إلى الخلف بإيقاع يتناسب مع الموسيقى، حتى وصلت إلى إحدى علبها السحرية وأخرجت منها مستلزمات إزالة الشعر، وتوجهت إلى وجهها وهى تغنى:

"يا حبيبي يا غنوة ليلية أرحم قلبي"، قاطعت هبة غنائها:

- "وحياة أملك اوعى تعوريني بلاش فضائح".

بأصابع مدربة ومتمرسة لفت ياسمين الخيط على أصابعها ووضعت طرف في فمها، وباحترافية بدأت في إزالة الشعيرات، كادت هبة أن تتحدث:

- "بقولك ايه هاتتكلمى هاتتعورى وهاتقولى أنا السبب اسكتى احسن".

مسكت هبة يد ياسمين لتتوقف:

- "تصدقى محمد علاء وماهيتاب اتصاحبوا".

حدقت ياسمين:

- "أزاي يعنى؟ ده الواد زى القمر وده صاحبها على ايه بقى إن شاء الله؟!"

لم تهتم ياسمين أن تكمل هذا الحوار فكل تركيزها كان مُنصب على وجه هبة:

- "هو أنت مالك يا بت أنت معيطة ولا فيك ايه؟"

- "انجزى طيب وأنا هاحكى لك".

رن جرس الباب ثلاث رنات سريعة معلناً قدوم غادة، وزنها زائد كالعادة وترتدى كوتشى على جيب طويلة وقميص داكن وضمفيرة تصل إلى منتصف ظهرها، خمرية اللون وجهها مستدير تختفى ملامحه خلف هذا الوزن، لم تلق التحية على ياسمين أو هبة، ألقت شنطة المدرسة عند باب الغرفة وتوجهت إلى الكاسيت مباشرة.



- "ايه ده مصطفى قمر، طب أنا هاجيب أغنية بنلف، دى أحلى أغنية فى الشريط، ده أنا بفكر أسجلها على شريط وش وضهر وافضل مشغلاها".

لم تكن ياسمين قد أنهت عملية التنظيف:

- "يخرب بيتكم برده بتعملوا البتاع ده؟!!"

بدهشة ردت ياسمين:

- "وهو أنت مش بنت ولا ايه؟؟ خليكى فى الأغاني بتاعتك دى".

- "بنت بس فى حاجات بتعمل فى أماكن معينة ، اسكتى بقى عشان اسمع".

بدأت عادة فى الغناء:

" بنلف نلف نلف نلف والسنين بتلف تلف تلف وجراح بتزيد وآلام وبتخف".

إيقاع منظم على الباب.

- "طب افتحى الباب لحد ما اخلص هبة، تلاقيها مها".

وضعت الكاسيت على وضع الإيقاف المؤقت وذهبت إلى الباب لتدخل مها، لم تلق عادة عليها التحية وعادت إلى الكاسيت مرة أخرى، طبعت مها قبلة على خد كل واحدة، صاحبة الابتسامة والتفاؤل اللا متناه والروح الأجمل، ميزان السعادة وخفة دم متحركة، بشرة بدرجة هادئة من اللون البرونزى، وعيون عسلية فاتحة، وملامح صغيرة وجسد لا يختلف كثيرًا عن تلك الملامح كانت مها أكثرهن رقة.

انتهت ياسمين وبدأت في ارتداء ملابسها ولكن مها لم تترك الموقف يمر:

- «المرّة الى جاية سويت بقى يا حبيبتي».

قالتها وهى تتظاهر بمضغ لبانة بتمايل كفتاة ليل متمرسة،

كانت الساعة تعلن عن الثامنة وعشر دقائق، لا زالت عادة تستمع لأغنية «بنلف»، وهبة تغسل وجهها من آثار إزالة الشعر، وياسمين وقفت أمام إحدى مراياتها لتتأكد من أن تجسيمة جيباتها القصيرة مناسبة، وفتحت أول أزرار القميص وحتى لا يظهر حدود نهديها ألقت بالقميص إلى الخلف كاشفاً عن رقبتها وأطراف من كتفيها، نظرت مها إلى ثلاثتهن:

- «يلا يا بت أنت وهى مش هانخلص».

\*\*\*

- «أدخل الضيف الثانى يا حلمى».

- «استنى دقيقة واحدة ودخليه».

أغلق الموسيقى الكلاسيكية ورش معطر خفيف الرائحة، ثم رفع نظارته للضوء ليتأكد إنه لا يوجد غبار عالق عليها.

- «أهلاً، أهلاً».

- «أهلاً يا دكتور».

دقائق من الترحيب وكلام مُرسل عن أحوال زوجته حين قاطعه حلمى بسؤال:

- «أنت بتكره مراتك؟»
- «لا، أنا مش باكرهها خالص يا دكتور، مين قال كده؟»
- «طيب ليه أنا مش حاسس أن عندك مشاعر ليها؟»
- «دى المشكلة أنا مابقتش عارف مشاعرى ناحيتها، والصراحة محاول أدور على المشاعر دى مع واحدة ثانية».
- «بتدور على المشاعر دى قصدك فى حد ثانى بعينه؟»
- «لا مافيش واحدة معينة بس دائماً بيكون فى واحدة تانية جوايا، ممكن تكون واحدة لسه عارفها أو واحدة كنت بحبها زمان، أى واحدة ماعنديش قاعدة ثابتة، المهم إني عايز أحس بمشاعر».
- «أنت اتجوزتها عن حب؟»
- «حقى دى مش فاكرها، مش عارف شعورى كان ايه وأزاي وهل فعلاً كنت بحبها ولا كان جواز مبنى على التوافق».
- «يعنى ايه توافق؟»
- «يعنى صالونات بس مودرن شوية».
- «تفتكر ده السبب اللى مخليك عايز تحب؟»
- «أنا هنا عشان حضرتك تقولى الأسباب».
- نظر حلمى إلى ضيفه ثم وضع نظارته على المكتب وبابتسامة خفيفة:

- «أكيد هساعدك بس مش هاقدر اعمل أى حاجة غير لما تكون مقتنع من جواك».

طلب الضيف أن يشعل سيجارة ووافق حلمى وأشار إلى الشرفة:

- «ما هو أنا باجى يا دكتور وبحاول اقتنع».

- «بس أنت لحد دلوقتى مش مقتنع وده هيعطل حاجات كثير».

- «دكتور أنا بحاول، اه قبل ما انسى فيه حاجة مهمة عايز اقولها لحضرتك».

- «قول».

- «أحيانًا بحلم حتى وأنا صاحى إنها عملت حادثة بالعربية وكل اللى فيها ماتوا».

- «بتحلم أن مراتك تموت! للدرجة دى أنت عايز تتخلص من المسؤولية؟»

- «والله العظيم مش أمنية ولا نفسى إنها تحصل بس على طول فى دماغى».

نظر إلى شاشة الحاسب الآلى وتابع وميض مؤشر الحاسب قليلاً ثم أكمل الكتابة.

أخرج حلمى دفتر ملاحظاته ثم كتب فيه،

أنا لا أمتلك مفاتيح سحرية، لماذا يرفضون مساعدة أنفسهم؟ لماذا يخاف الجميع من مواجهة الحقيقة؟

\*\*\*

فى شارع صغير خلف المدرسة مباشرةً يقع مقهى الصعيدى، مثله مثل العديد

من المقاهي، تلفاز تسع وعشرون بوصة مُعلق في منتصف المقهى يعرض أفلاماً أجنبية طوال الوقت عدا أوقات المباريات، نصابة داخل المقهى تطل على منور العمارة المجاورة، المساحة الداخلية للمقهى كبيرة إلا أن المعلم يُصر على استخدام الرصيف بأكمله حتى وإن أعاق سير المارة، هي مكان التجمع الأساسي قبل بدء يومهم الدراسي، وكثيراً ما تكون الملجأ إذا ما قرروا «الزوغان» من المدرسة، من جهة أخرى هو مقرهم الرئيسي لمحاضرات يومية عن الطريقة المثلى للعب الشطرنج والدومينو أو حضور مباراة نهائية في الطاولة بين شيخين تخطا سن المعاش وقد ألهاها حماس جميع روادها، مدرسة الحياة كما يلقبها عماد.

مرتدياً جينز وقميص يظهر عضلات صدره ولا يخفى قوة ساعديه، وضع خالد علبة السجائر على المنضدة، رفع خصلات شعره إلى أعلى كم تمنى لو وافق والداه أن يترك لشعره العنان ويعصبه من الخلف، ولكنه لا يتلقى من والده سوى النقد على الرغم من غيابه الدائم، أزاح الفكرة عن رأسه وهو ينادى على صبي المقهى:

- «يا سيد واحد خمسينه».

أشعل سيجارة قبل أن يأتى الشاي، فلم يتذوق متعتها منذ السادسة من مساء أمس، لم تسنح الظروف أن يخرج من المنزل أو حتى أن يشرب واحدة داخل المرحاض، على صوت محمد قنديل وأنغام أغنية «يا حلو صبح يا حلو طل»، بدأ في رشف رشفة سريعة من كوب الشاي ومزجه بنفس عميق من سيجارته، يستمتع خالد بالأغاني القديمة، ولكنه لا يفصح عن هذا الاستمتاع إلى أحد، مع النفس الثاني من سيجارته شعر بدوار بسيط مع وصول النيكوتين إلى صدره، في نفس لحظة وصل شريف مرتدياً (كابه) الأحمر المرسوم عليه بخط

اليده، وكعادته أخرج القميص بكامله خارج الجينز في محاولة منه لإخفاء نحافته، وساعة بلاستيكية ظن أنها تزين معصمه، لا تستطيع كشف ملامحه بسهولة لشدة نحافته وبمجرد جلوسه سأل خالد باستغراب:

- "ايه علبة السجائر دي! دي بيضاء؟"

- "اه دي لسه جديدة".

- "يعنى اروح للراجل اقله هات واحدة أحمر أو أبيض؟"

- "فى ايه يا ابني؟"

أخرج شريف سيجارة من العلبة وبدأ يحركها بين أصابعه.

- "شريف بطل لعب بالسجائر، أنت مش بتشرب، ده غير أن العلبة بقت ب ٣ جنيه و ٨ قرش".

- "بقولك ايه هو عماد كان زعلان منك ليه؟"

رغم الصداقة بين خالد وعماد إلا أن روح التنافس بينهما قوية، ضحك خالد إلى أن امتزج ضحكه بسعال:

- "لا مافيش أصل من كام يوم عرفت إنه قاعد مع واحدة فى مكان كده، أخذت واحدة تانية كان مصاحبها وورحت له بيها".

- "وعماد عمل ايه؟"

- "ابن لعيبه، نفذ للبت صاحبتة القديمة الى كانت معايا خالص، وتانى يوم لقيته بيكلهما ويصالحها ازاي مش عارف؟"

قاطعهم سيد القهوجى وهو ينظر إلى شريف:

- "هاتشرب حاجة؟"

- "لا احنا قايمين دلوقتى".

تركه سيد والحسرة على وجهه وهو يتمتم: "اصلنا فتحنا حضانة هنا".

سمعه عماد لحظة دخوله واحتد عليه:

- "فى ايه يا سيد ما تلم نفسك ع الصبح احنا عيال ولا ايه؟"

اختلف وجه سيد فى لحظة دخول عماد، سيد يحلم أن يكون مثله بالسلسلة الفضة والنظارة الشمس وعلبة السجائر التى لا يتركها من يديه والشعر المصفف بعناية ولون بشرة هادئ، وسامة رجولية يتمناها أى رجل فى تلك المرحلة العمرية، لم يهتم عماد بنظرات سيد وإنما توجه إلى خالد الذى لا يزال يستمتع بسيجارته الأولى ويحاول أن يخفى العلبة عن شريف، الذى شعر بمرارة لأنه لا يستطيع أن يتحدث لأحد حتى عامل القهوة مثلما يفعل عماد.

نظر خالد إلى عماد:

- "كنت فىن امبارح؟"

أشار عماد بأحد أصابعه كنوع من الاعتراض على خالد:

- "وأنت فاكر إنى هاقولك بعد كده!"

ضحك خالد من جديد:

- "وأنت بيحوق فيك حاجة ياد أنا كنت مستنيك تتصل".

ثم أكمل الجملة بإحدى السبابات المتداولة بينهم،

لا يعلم شريف عن ماذا يدور الحوار، ولكنه لا يزال ممسكاً بالسيجارة يحركها بين أصابعه، ويرسم مخطط وهمي للرد على سيد صبي القهوة المرة القادمة.

- "اتصل ببيك ليه مش كنا متفقين؟"

- "متفقين إنك تتصل بى الأول".

لم يخل الحوار من بعض السباب الذى وجهه كل منهما إلى الآخر خاصة عندما تذكر مقلب خالد، لا يستمر خلاف أى منهم طويلاً فرباطهم أقوى من أى خلاف.

- "مش مهم أنا لقيتك مظهرتش، شقت واحدة وطلعنا المقطم".

يتدخل شريف فى الحوار بإحدى أسئلته:

- "أنت بتلاقيهم ازاي؟"

- "لا يا شيكو أنا مش بدور عليهم هم بييجوا لوحدهم".

- "مافيش حاجة بتيجى لوحدها لازم حد يجبهم".

نظر عماد للصوت القادم من مدخل المقهى.

- "سافل، بس والله العظيم ياد يا وائل كانت عايزاك امبارح، القعدة كانت رخمة".



بنظرة أسى تحدث صاحب الوجه الممتلئ والكرش الذى لازمه معظم فترات حياته.

- "طب ما أنت عارف أبويا مافيش خروج بعد ٦".

قاطعہ عماد بسباب لوالده، لم يبد وائل أى اعتراض وأكمل:

- "وهو أنت شايفنى المهرج بتاع أهلك؟"

ضحك عماد وهو يتساءل:

- "بقولكم حد عايز يروح المدرسة؟؟"

\*\*\*

ظل حلمى يتصفح أوراقه ودفتر ملاحظاته بعد يوم آخر من لقاءاته، أخذ يقرأ ما كتب سابقاً ويدون ملاحظات جديد فى دفتره، كل فرد كان له ملف خاص وكل علاقة بين كل اثنين منهم كان لها دفتر مختلف.

\*\*\*

( دفتر الملاحظات - القلب )

لا زال مكاننا المفضل فى الزاوية المنطوية يذكرنا، المنضدة التى شهدت على أول تلامس حب بأيدينا، الحائط يحتضن نفس الصور ونفس المشاعر نفس الذكريات تتسلل إلى قلبى، أصوات ضحكاتنا لا زالت تتردد فى أذنى، القسم المنقوش على تلك الأريكة بأن هذا الحب سيبقى، توسلاته أن أقبله كحبيب قبل أن يكون زوج، كل شئ كما هو لم يتبدل، عُدت مع ذكرياتى إلى الجينز

وشعرى المعصوب بحزام رفيع، وعاودتنى همسات كلماته ووعد أننا سنبقى نحن وعشقنا معاً، ولكن تغير كل شيء فرغم محاولاتي المستميتة أن نبقي كما كنا إلا أن علاقتنا كانت تنهار تدريجياً، وكلما تذكرت كيف كان إصراره على الارتباط أزداد حزناً، وعلى الرغم من كل ما صار بيننا إلا أنني لا زلت أشتاق إلى صوته.

- «الو، أنت عارف أنا فين دلوقتي؟»

- «في حاجة؟ أنا مش فاضى».

- «لا مافيش».

- «أنت فين يعنى؟»

عصبية غير مبررة فى كل مكالمة لقد مللت.

- «أنا فى "سوا" دلوقتي».

- «اه طيب، وهو لسه موجود! سلام هاكلمك بعدين مش فاضى».

كان "سوا" هو منزل الحب الذى خلقناه سوياً، دفعنا اسم المكان لاختياره، تعاهدنا هنا أن نبقي "سوا"، وأقسمنا على هذا مهما طال بنا الوقت أو اختلفت الظروف، تعاهدنا على قدسية مشاعرنا وعلى أن يزيدها زواجنا قدسية، ربما سذاجتنا كانت تقودنا ونحن نكتب هذا التعهد بدمائنا.

رغم الاختلاف الذى طرأ على مظهرى، لكنه تعرف على بمجرد أن رآنى.

- «أزى حضرتك؟ بعد السنين دى حضرتك جيتى تانى؟»

- «ايوه، أنت لسه شغال هنا؟»
- «اه، بس أنا بقيت المدير يا افندم».
- «برافو عليك مجد».
- «الاستاذ اخباره ايه؟ بقالكم ييجى خمس سنين ماجيتوش».
- «لا ستة مش خمسة».
- «امانة تبعنى سلامى للأستاذ، هو جاى؟»
- «لا».
- «طيب حضرتك تحب تشربى ايه؟»
- «مممكن قهوة مطبوعة».
- سيجارة أخرى لن تضر، كل شيء يتذكره إلا هو لم يعد يتذكر شيئاً، ونسيت معه نفسى كيف نسي!!
- «الو».
- «ايه تانى؟»
- «لا خلاص، سلام».
- صوته سيزيل متعة اللحظة.

\*\*\*

## (دفتر الملاحظات - العقل)

أكثر ما يغضبني هو شعوري بالإحباط وأنى سيئة بلا قيمة وأنه منّ على بالزواج، أنا من أنجح فتيات جيلي وأنجح صديقاتي، أشغل منصب مرموق في الشركة التي أعمل بها، رأي مسموع في كل القرارات المصيرية، رغم سنى الذى لم يتخط الخامسة والثلاثين، ولكنى أحظى باحترام وتقدير من الجميع، لكن لا أحظى بمثل هذا الاحترام والتقدير فى منزلى، أتحوّل إلى خادمة دون أجر بمجرد أن أخطو إلى المنزل، أتلقى تشكيلة مختارة من أجود الإهانات الزوجية، كثيراً ما أشعر إنه عقاب على رفضى لـ....، أخاف حتى أن أذكر اسمه فتنهمر ذكريات لا أقوى على تحملها، لم يعد يجمعنا أى شىء وأصبح الرابط الوحيد بينى وهذا الشخص الذى حُسب على كزوج الرسائل النصية فقط.

- «محتاجة لبن للبننت من فضلك، هات وأنت راجع».

- «هو مليون مرة بقى».

- «أنا بس بافكرك».

حتى ما يخص ابنته لم يعد يهتم به.

ليس ذنبى شعوره بالغيرة من نجاحى واختلاف المستوى الاجتماعى، ولكن ذنبى الوحيد أننى أخطأت الاختيار، لم يعد وجوده من عدمه يعنينى، لم أعد أراه أو أسمع صوته وهو ينتقد كل ردة فعل منى، هو الآن لا شىء سوى خيال أب بدأ يتلاشى، لا سبيل سوى الانفصال، أنا فقط لا أملك شجاعة اتخاذ هذا القرار أو ربما أحتاج إلى دفعة وبعض الوقت.

لا يوجد من ينقذنى سواء صديق مشترك بينى ومن فطرت قلبه.

- «الو أنت في الشغل؟»
- «لا أنا قاعد على البحر باخد تان».
- «يا سخيّف».
- «ما هو ده مش سؤال برده».
- «مممكن طلب».
- «عارف أنت عايزة ايه، هو كويس وزى الفل وبطلّي تسألّي عنه كفاية».
- «والله مش مجبه خلاص، بس صعبان على وندمانة إني سبته».
- «تعرفي أنت سألتيني السؤال ده كام مرة؟»
- «عارفة».
- «طيب والإجابة بتكون ايه؟»
- «لازم نتحمل نتائج اختياراتنا ونتقبل البدائل».
- «لا في حاجة كمان، إن ارتباطنا بالحاجات القديمة شوية كلام فارغ، وبتقتل اللى فاضل من مشاعر ممكن نعيش بيها، وسلام بقى دلوقتي، هاكلّمك كمان شوية».
- «أنت رخم جدّا، سلام».
- «أنا خايف عليك من نفسك، خلى بالك».

- "سلام، متخافش".

\*\*\*

(دفتر الملاحظات - الروح)

كان قرارى بالتغيير نابغاً من يقين داخلى، كنت محتاجة قوة أتقرب من ربنا، وقررت ألبس الحجاب دون أى إجبار من أى نوع، قناعاى ثابتة وأن هذا هو الزى الإسلامى الذى فرضه دينى على وعلى غيرى، أعرف دينى جيداً لست مسلمة اسماً فقط، أحيا لزوجى حتى لا ينظر لغيرى أبداً، وأقتدى بالسيدة خديجة وأعرف واجباتى جيداً، وبالرغم من كل هذا لا يعجب، خلافات شبه يومية وعلى أتفه الأسباب.

- "يا شيخة يا رب أموت واريحكم".

هكذا ينهى مشاجرته معى، هروب مستمر من المواجهة، ضعف فى الشخصية ورفض لمعايشة الواقع، ثم يهدأ قليلاً:

- "يا شيخة اتقى الله فى نفسك أنت مش معقولة".

كعادتى مؤخراً أصمت، لم أعد أمتلك الطاقة لأستمر، أصبحت سيناريوهات ثابتة دون أى تغيير، سيهدأ مرة أخرى ويطلب منى الاستغفار والصلاة ويترك المذياح على القرآن ويستعيد بالله من الشيطان الذى دخل بيننا، أنا لا أنكر فضل الصلاة والقرآن ولكنهما ليسا فقط الحل، الحل بداخلهما وعلينا أن نبحث لنجده.

- "استغفرى ربنا وصلى ركعتين، مش عارف بس احنا وصلنا لكده ازاي!"

أضحك الآن، أنا أعلم كل تفاصيله وهو لا يعلم شيئاً عني، لا يزال متيقن أن خلافتنا طبيعية ولا يدرك أن مشاعري تخبط الحدود الطبيعية.

للمرة الأولى في حياتي أدرك كيف تخون الزوجات أزواجهن، لقد فقدن المشاعر ليشعروا بالندم، وأنا لن أفقد مشاعري لأنني لو فقدتها لن أكون مثلهن ولكني سأفصل عنه بهدوء.

\*\*\*

(دفتر الملاحظات - القلب)

- «أنت بقيت أناني جداً».

- «أنا خائفة لتكون بتخوني».

- «حرام عليك امتي هاترجع زى الأول؟»

هم الجمل الثلاثة الأكثر تداولاً داخل جدران منزل الزوجية، أوشكت زوجتي أن تكتب هذه الجمل على أطباق المائدة.

- «والله العظيم حرام عليك، أنت مش متجوزها عن حب!»

- «اه».

- «طيب مالك؟ ده أنت حفيت ورها».

- «كنت حمار».

هكذا ما يبدأ صديقي معاتبتى على أسلوبى فى الحديث عنها.

- "يا ابني أنت مش متخيل احنا بقينا عاملين ازاي! دي فظيعة".

- "يا حلوف أنت دي كل ما تكلمنى تعيط".

- "طب ما أنا ممكن اصوت والطم كمان لو حابب".

قالها وهو يبتسم ويأخذ نفساً عميقاً من الشيشة، ثم أكمل وهو يضحك بصوت لفت انتباه قاطنى القهوة:

- "اكيد كمان قالت لك خاين وأنانى ومش زى زمان".

لم تكن حياتهما تسير بصورة جيدة رغم قصة الحب، تحولت الحياة تدريجياً إلى معركة يريد كل طرف فيها الانتصار، هى لا تهدأ إلا عندما تعقد حاجبيها وتتعمد انتقاده فى أهم مميزاته، وتستمر فى صراخ متواصل دون سبب مفهوم.

- "وأنت عرفت منين إنها قالت لى كده؟"

- "الى ربي خير من الى اشترى".

- "طب بلاش الى فى دماغك، أنت مش قد جوازتين".

- "بص يا صديقى العزيز أنا هاعمل الى أنا عايزه، ويلا عشان نلعب".

\*\*\*

(دفتر الملاحظات - العقل)

كانت الفتاة المثالية التى حلمت بها لتكون زوجتى، خضت حروب كثيرة - حتى مع نفسى - قتلت مشاعر داخلى لأحظى بها زوجة، أسوأ أيامى كانت



تلك التى تمر دون أن أخطو خطوة أقرب إليها، كنت دائم المحاولة للتقرب منها والحديث معها، كنت أشتاق أن أتحدث بنفس أسلوبها، صرت مهتمًا بكل ما تهتم به، ليس بدافع الحب ولكنها كانت الوسيلة لتحقيق هدفى، إلا أنني أعترف أنني ظننت إني أحبها، وعدت معها إلى كتابة خواطرى، عشت معها حلم حتى استيقظت منه على كابوس، فقدت بسببه حبي الحقيقي الوحيد، فقدت حب طفولتى ومراهقتى وشبابى، ولكن رغم فشلى معها أنا لا أقوى على العيش دونها، أصبحت جزءًا من صورة اجتماعية رسمتها لنفسى لو رحلت سأخسر كل شيء .

بمجرد شعورى بهذا الضغط أنعزل عن الباقين وأخرج للتدخين وكتابة بعض الخواطر على هاتفى، والى اعتدت حذفها بمجرد الوصول للكلمة الأخيرة.

"بقى لى من عبيرها ذكرى تطل بين الحين والآخر على ما تبقى من مشاعر، فيمتزج عبيرها بدمعة تسقط رغبًا عنى لتعطر ما بقى من روحها داخلى ويتبعها دموع انهيار على باقى روحها التى ما عادت تُسَكِّنُنِي".

ضغط على خيار الحذف بمجرد دخول أحد زملائه.

- «مالك؟ شكلك تعبان».

- «لا مافيش كله تمام بس مش نايم».

- «الى يشوفك يقول بتعيط!»

ضحك بصوت مرتفع وهو يقول:

- «أنا اعيط».

وقال لفظ اعتراضى ليبدى عدم اهتمامه وتركه.

\*\*\*

(دفتر الملاحظات - الروح)

داخل المسجد الذى يتابع فيه درسه الأسبوعى.

- «الْبِرُّ حُسْنُ الْخُلُقِ، وَالْإِثْمُ مَا حَاكَ فِي صَدْرِكَ، وَكَرِهْتَ أَنْ يَطَّلَعَ عَلَيْهِ النَّاسُ».

- «صدق رسول الله صلى الله عليه وسلم يا شيخنا».

- «شوف أنت فى صدرك ايه يا ابنى، وأنت هاتعرف المشكلة».

- «أقسم بالله مش باعمل لها حاجة».

- «من حلف بالله فليصدق».

- «يا شيخنا بس».

- «لا بس ولا غيره، ربنا يا ابنى خلقنا مختلفين، شغف النساء غير شغفنا، ما ينفعش الأدوار تتبدل، ناموس الكون يختل وتحصل مشاكل».

- «حضرتك تقصد ايه؟»

- «بحكم التطور حاجات كثير أتغيرت فى سلوكياتنا، النساء بتعمل شغل الرجالة والعكس، نصيحتى ارجع للفطرة».

- «مش فاهم».

- "من اللى أنت بتقوله إنها متحملة مسؤولية حاجات المفروض أنت تعملها".

- "ما هو أنا على طول مش فاضى".

- "بداية الانهيار البحث عن الحجب".

تركت الشيخ ولم أصل عنده إلى ما يشفى صدرى، أنا غير جميع الأزواج،  
أتركها تخرج مع صديقاتها وقتما تشاء، أجالس الأطفال، وكثير ما أقوم بأعمال  
فى المنزل ماذا تريد! لم أقو عن منع نفسى وأنا أضغط على زر الاتصال بها.

- "يعنى آخرتها ايه؟"

- "آخرت ايه؟"

- "أنا باعمل لك كل حاجة أنت عايزاها، خروج ودلع وفسح".

- "وهو أنا مش بعمل".

- "لا أنت عايزة كل حاجة بطريقتك".

- "ايوه أنا عايزة كل حاجة صح".

- "عمرك ما هاتتغيرى أبداً".

- "أنا الى اتغير! أنا هاقفل من فضلك ماتتصلش".

\*\*\*

بعد يوم طويل وفى جو اتسم طابعه بالهدوء إلا من صوت بندول الساعة وهو  
يخترق الهواء فتحت حبيبة الباب.

- «خلاص يا حلمى مافيش ضيوف تانى».
- نظر إليها بابتسامة لم تفارق نظره إليها.
- «طيب تعالى أقعدى معايا».
- خلعت ذاك الرداء الأبيض وعلقته على شماغها الخاصة ثم حجابها.
- «يعنى اقعد واعمل فيها ضيفة».
- وقف حلمى أمامها واحتضن يديها ثم اتجه بها إلى الشرفة التى حولها إلى مشتل صغير.
- «تعرفى يا حبيبة أنا طول عمرى نفسى أعترف لك بحاجة، بس بخاف».
- «عايز تعترف بأية؟ مخي ايه يا دكتور؟»
- «عندى اعتراف، بس هاحكى لك شوية قصص كده».
- «قصص، واعتراف! مالك يا حبيبي؟!»
- «أنا حاسس إني مُقصر فى حبك».
- «أنت مُقصر، أنت!! أنت حياقي وإياك تقول كده تانى».
- جلس حلمى على كرسية الهزاز وهو لا يزال ممسكاً بيديها.
- «لا يا حبيبة أنا قصرت، أحياناً كثير مشاعرنّا بتتغير».
- نظرت إليه بنظرة ثقة.

- "وارد يا حبيبي، يمكن عشان بنتعود بس بنرجع تاني".
- "حياتنا فيها حاجات كثير ومشاعر أكثر وفكرة التعود دي شماعه بنتحجج بيها".
- أشارات حبيبة إلى مكتبه.
- "حلمى هو الاعتراف والتقصير والقصة ليهم علاقة بالورق الكثير ده، ولا أنت عايز تتجوز تاني؟"
- "أنا اتجوز عليك، ده أنا ابقى غبي لما اكون عايش بيلك واروح ادور على واحدة تانية عشان تاخد منك حته منى".
- "ايه يا حلمى ده، لا ده أنا ممكن اشوف لك عروسة بعد الكلام ده".
- عاد حلمى إلى مكتبه ووضع نظارته على المكتب، ثم أشار الى أوراقه المعلقة أمامه وهو يحاول بها ترتيب أفكاره.
- "سيبيني احكى لك طيب وبعد كده نشوف موضوع الجواز ده".
- أخذت نفس وهى تبتسم ثم جلست على الأرض ووضعت رأسها على فخذه.
- "قول".
- أخذ يداعب شعرها واعتدل فى جلسته وأغمض عينيه.
- "كل تفصيلى فى حياتنا ليها قصة والورق ده فيه رواية مشاعر كثيرة".
- "يعنى أنت هتكتب رواية عن مشاعرنا".

- «تقريبًا».

لم تستطع مقاومة النوم احتضنت ساقيه بقوة وظلت تتشاءب حتى خارت جفونها، ظل على وضعه يداعب خصلاتها بيده اليسرى وأمسك باليمينى قلم وفتح دفتر ملاحظاته وبدأ فى الكتابة.

ترك حلمى القلم بعد لحظات ثم مال نحوها وبالكاد طبع قبلة على رأسها شعر معها بالآلام حادة فى ظهره، ولكنه عاد لوضعيته السابقة.

استيقظت من حركة لا إرادية فى قدميه تصاحب آلام الظهر.

- «أنا هاقوم يا حلمى اقعد جنبك على الكنبه».

تابعها بكل حواسه، ثم وضع فواصل داخل دفتر الملاحظات، وكتب على الفاصل الأول القلب والثانى العقل والثالث الروح، ثم أمسك الملف الأخير واحتار فى اختيار عنوان له، فتركه بلا عنوان.

نظر حلمى الى حبيبة وقال بصوت خافت

كل علاقة كانت مبنية على سبب، الأولى مبنية على حب القلب، والثانية كانت مبنية على حب عقل، أما الثالثة فكانت زيجة مرتبطة بحب الروح، أما الأخيرة فأنا لا أجد لها توصيف كانت علاقة مبنية على حاجات مختلفة، كل واحد منهما كان منتظر نتيجة واحدة من هذه العلاقة.

ترك حلمى القلم وعلامات الرضا تعلو وجهه وهو ينظر أمامه وبيتسم، ثم أكمل فى الملف الأخير الذى لم يجد له وصف وهو بيتسم.

الملاحظة الأولى الملف الرابع: «لما جت لى أول مرة كانت هادية جدًا وأفكارها

مرتبة بشكل مربع، صريحة جدًا مع نفسها، خلتنى للحظات حاسس بالعجز قدامها، سألت نفسي كثير ودى أنا أساعدها أزاى؟ السؤال ده فضل معايا طوال اللقاء الأول، وهى بتحكى لى قالت لى إحنا ماعندناش مشكلة واحدة، مافيش مشاكل لدرجة إن حتى مافيش نقاش على أى حاجة، كان الحل الوحيد الى قدامى وقتها إنى أقول لها تطلق لأنى فعلاً مش عارف أقول لها ايه وكنت رافض فكرة الطلاق".

الملاحظة الثانية الملف الرابع: "هو بقى لما جالى أول حاجة قالها إنه مش بيعترف بالناس الى زى حالاتى وإن أحنا ناس فاضية، بس جاى تقريبا عشان وعد مراته، هو كمان كان صريح مع نفسه لدرجة إنه عارف أن عنده مشكلة بس مش معترف بطرق حلها وده كان كويس".

الملاحظة الثالثة الملف الرابع: "لما سألتهم ايه الى ممكن يسعدكم؟ كانت إجابتها إنها محتاجة تطلق وهو قالى أنا مش عايز أطلق أنا عايز واحدة جديدة فى حياتى يمكن تحسنها".

نظرت حبيبة إلى حلمى وهى تتشاءب.

- "ايه موضوع الملف الرابع ده؟"

- "حياتهم كانت مثالية جدًا، تعرفى يا حبيبة الحياة المثالية دى هى أفضل علاقة ممكن تحصل وفشلها بيعدى الخيانة".

ترك حلمى القلم وتابع دقائق بندول الساعة.





٢

النفسية السوداء

"خسرت إيه؟"

ديانا حداد

ألبوم جرح الحبيب - ٢٠٠٠



ويبقى الانتصار في معركة الحب هزيمة.

- "في واجب لازم يتعمل بس ممكن ندردش فيه شوية الأول".
- "واجب! حاضر".
- "تقدرى تعترفى بأسوأ صفاتك مع جوزك".
- "طبعا".
- "هى ايه؟"
- "أنا بتوتر بسرعة جدًا".
- اعتدل حلمى وهز رأسه فهو يعلم أن الإجابة الأولى خاطئة دأشما.
- "لا مش بسأل عن نقاط ضعفك، أنا بسأل ايه هى أسوأ صفاتك؟"
- كعادتهم بعد هذا السؤال، فترة انتظار قد تطول إلى اللقاء التالى.
- "يمكن اكون جوايا غل".
- "لا برده".
- "أنا مش فاهمة".
- "في وقت الخناق بتكونى عاملة ازاي؟ يعنى بتكونى سلبية ولا بتتهمى جوزك؟
- ايه الى بتستخدميه فى الدفاع عن نفسك؟"

- "مش عارفة".
- "هو حضرتك بتيجى هنا ليه؟"
- "عشان عايزة اعيش مبسوبة".
- "تمام، يبقى لازم تفكرى فى صفاتك السيئة مع جوزك الى بتستخدميها فى أوقات الدفاع عن نفسك، أنا محتاج إجابة".
- "مش عارفة".
- "فكرى كويس فى الى أنا باقوله ونكمل المرة الى جاية".
- ردود أفعال ثابتة إما الصمت أو دهشة.

\*\*\*\*

انتصف اليوم الدراسى وأعلنت عقارب الساعة عن الثانية عشر ظهرًا، الفسحة هى المتنفس من رتابة الحصص المتتالية، من ضغط بلا قيمة ولكن من المرات القليلة التى تترك هبة الفسحة لتجلس فى الركن الأخير من الفصل، تحاول جاهدة أن تسيطر على دموع فى عينيها، ظلت طوال ليلتها مستيقظة تتألم وتعاتب نفسها، اكتمل هذا المشهد الكئيب مع تلك المروحة التى تدور على أبطأ درجاتها، لتقطع خيوط شمس بالكاد هربت من الستائر المعلقة بطول شبابيك الفصل، لتضفى لونًا يميل إلى اللون البنى أخفى تفاصيل لوحات الإيضاح المعلقة خلفها، تتوسط الحائط لوحة شرف تضم صور للطلاب المثاليين على مدار الشهور، تحتفظ بها بمكان دائم لها فى هذه اللوحة، أخرجت بعض الصور من حافظة نقودها وبدأت فى تمزيقهم ليزداد الوضع سوء،

هبة و ياسمين لهما علاقات عاطفية متعددة ولكن لم تصل إحداهن قط إلى هذه المرحلة من الانهيار.

- «في أيه أنت بتعمل كده ليه؟»

لم تبد هبة اهتمامًا كبيرًا بما تقوله عادة وعادت إلى البكاء،

- «أنا قلت مليون مرة مافيش حاجة اسمها ارتباط وصحوية، أنت هبة جدًّا ووظ فيهم».

لم تكمل عادة كلامها فقد لاحظت مدى انهيار هبة فاحتضنتها وتركتها لتهدأ قليلًا.

عادة هي أكثرهن تحليلًا للمواقف، تستمتع وهي ترسم صورة كاملة لأي موقف لتبدى رأيها فيه، لها أحلامها وقناعاتها الخاصة منذ أن سُكنت رومانسياتها على فيلم «only you»، وأفلام كثيرة توالى على مدار سنوات مراهقتها، تعلم جيدًا أنها سوف تحظى يومًا بحب العمر، وأنها ستكون في سعادة ابنة عمتها وهي تنظر إلى زوجها في ليلة زفافهما، رغم أحلامها الرومانسية إلا أن جميعهن يؤكدن أنها آخر من سيتزوج، وكن دائمت التردد: «يا بنتى مين هایتجوز واحدة معقدة قوى كده زيك!»

نظرت عادة مرة أخرى إلى هبة:

- «الفسحة قربت تخلص وأنت شكلك معيط».

- «أعمل ايه يعنى؟»

قالت هبة بصوت متقطع وهي تحاول أن تلاحق أنفاسها المتسارعة وكلما

تذكرت هذا المشهد وهو يمسك بيدي صاحبه السابقة تزداد غضبًا.

- "قومي اغسلي وشك بلاش هبل بقي".

- "أنت مش فاهمة حاجة سيبيني".

وضعت رأسها على "الديسك" وهي تردد بصوت منخفض: "سيبيني بقي مش هاتفهومي"، وهي لا تعلم كم الآلام التي سببتها تلك الجملة لغادة، نظرت غادة إلى هبة وهي تبكي ولسان حالها يقول: "يا ريت يبقى لى صاحب كده ولما اعيط يصالحنى، نفسى احب واتحب زيك كده، نفسى أفهم".

لم تكن ياسمين ومها قد لاحظتا بعد اختفاء هبة وغادة، ياسمين هى الساعد الأيمن لهبة، وهبة هى ساعد ياسمين الأيسر، لا يختلفان أبدًا على فعل كل ما هو غير تقليدى أو اعتيادى، لا يعنيهما كثيرًا العادات ولا تضعان حدًا لأفعالهما، ياسمين أكثرهن تحررًا أو كما كانت تلقبها غادة أكثرهن شعورًا بالحر، هى لا ترتدى سوى القميص المدرسى بأفتح ألوانه وبادى بالكاد يخفى ملتقى النهدين، دائمًا ما كانت تمر غادة بيديها على حدود حامل صدرها لتؤكد لها أنها تراه بشكل واضح، وكانت ياسمين لا ترد سوى بابتسامة ثقة، ياسمين مقتنعة إنه جسدها وعليها أن تستمتع به بالصورة المثلى، بمجرد أن لاحظت مها وياسمين اختفاء هبة وغادة اتجهتا مسرعتين إلى الفصل، وبمجرد أن رأت مها انهيار هبة أدركت أن عليها استخدام إحدى أسلحتها لتخفيف حدة الموقف.

- "هو خلى بيكى يا مسكينة!"

إجادة مها للتلاعب بصوتها جعلهن يضحكن حين أدركن أنها تقلد صوت مشرفة الدور الأكثر رعبًا، استمرت فى إتقان دورها وهى تحرك رأسها يمينًا ويسارًا تمامًا كالمشرفة.

- "والله ما هو فالح أبداً، حد يسيب القمر ده!"

تطبع مها قبلة على خدها وغادة تنظر إليها وعلامات الاستغراب قد تحكمت بملاحها، أخيراً ابتسمت هبة ومرة أخرى تتساءل: "هو أنا ليه ماعرفتش اضحكها زى مها؟"

على الرغم من الابتسامة لاحظت ياسمين شئ غريب في ابتسامة هبة، مالت عليها وبصوت خافت:

- "هو أنت بتحببيه بجد؟"

تهتم ياسمين إلا تتماذى هبة في علاقتها رغم أن ياسمين تتماذى لما هو أبعد.

\*\*\*

أعتدل حلمى فى جلسته وهو ينظر إليه

- "دكتور حلمى عندى مشكلة مش عارف ليها علاقة بموضوعنا ولا لا؟"

- "كل مشاعرنا مرتبطة ببعضها".

- "لا ما هى دى مش مشاعر دى مشكلة".

- "المشاكل بتأثر فى مشاعرنا، مين قال أن المشاعر حب وكره بس؟"

- "أنا مش بعرف أكمل أى حاجة للأخر، بمجرد إنى أبدأ فيها بكون كلى حماسة، بس بعد شوية صغيرين بأزهق وماكملهاش".

- "كل مشكلة لينا جواها بداية، عايزك تحكى لى كل حاجة فى حياتك تقدر



تفتكرها بدأتها وما كملتهاش".

فى جلسة دامت قرابة الساعتين أخذ يتذكر مواقف كثيرة إلا إنه استوقفنى إصراره على اعتراضى فى اللحظة التى ربطت بين مشكلته وبين حبيبته الأولى التى تلى عنها.

\*\*\*

جلس متردداً داخل إحدى قاعات البلياردو التى تبعد قليلاً عن مدرستهم، وهو يأخذ أول نفس من سيجارة بتوجيهات من عماد.

- "لا مش كده يا شريف، كده أنت بتنفخ، خد النفس لجوه".

كمدرّب فى صالة رياضية يصف الطريقة الصحيحة لأخذ الشهيقي، استمر عماد فى شرح الطريقة المثلى للتدخين، بدأ شريف فى سحب نفس آخر بالطريقة التى وصفها عماد حين بدأت رأسه بالدوران، ومع النفس الثالث أغمض عينيه وجلس وتركها من يده، شريف أضعفهم شخصية من عائلة متوسطة فى المستوى الاجتماعى والمادى ويغلب عليها طابع الدين، تمسك شريف بالالتزام بالصلاة فى حين انقطع عنها ثلاثتهم، ولكن من حين إلى آخر كان يحاول أن يجاريهم فيما يفعلون و لكنه يفشل، تزداد الفجوة بين اهتماماتهم ولكنه ظل متمسكاً بصدقائهم لأنهم اختياره الوحيد الذى اختاره دون تدخل إحدى والديه.

صالة البلياردو هى مكانهم الثانوى للتجمع، بدروم داخل إحدى العمارات المتهالكة فى حارة صغيرة قريبة من مدرستهم، بقليل من المجهود والمال تحولت إلى صالة للألعاب الرياضية، كما يفضل صاحبها أن يطلق عليها، ثلاث طاولات للبلياردو ومثيلاتهم لتنس الطاولة، بالكاد يصل ارتفاع

السقف إلى مترين، كان في الماضي أبيض اللون ولكن دوائر صغيرة سوداء من الطباشير المستخدم في البلياردو قد أضافت بقع سوداء إلى سقف الصالة، أما جوانب الصالة فتميل إلى اللون الأصفر فقد استقر عليها دخان السجائر فلا مفر له أو مخرج.

بدأ الجميع في الضحك عندما جلس شريف إثر الدوار الناتج عن دخان السيجارة الأولى، اتجه إليه وائل قائلاً:

- «يا ابني مش قد حاجة بتعملها ليه؟»

وائل الطفل المدلل لأسرة مكونة من ستة أفراد أب وأم وثلاث من البنات رغم هذا الدلال، ولكنه متأثر سلبيًا بسيطرة والده لا يقوى على اتخاذ قرار، وظل حبيس التردد لفترات طويلة، يعلمون بمدى الضغط الواقع عليه من شدة تقاربهم ودائمًا ما يسوقون مبررات لوالده ليركه يخرج معهم ليلاً أو يسافر في إحدى الرحلات المدرسية، رغم هذا التأثير السلبي ولكنه كان أخفهم ظلاً وأطيبهم قلباً، خفة ظله كانت ميراث تركته له والدته قبل رحيلها عن عالمنا، اللحظة التي سيطر على والده هاجس الخوف عليه والذي تحول مع الوقت إلى سيطرة أفقدته كثيرًا من شخصيته.

في هذه الأثناء كان خالد يستعد إلى دورة فقد بقيت له كرتان حتى يحين دور السوداء، أصدر خالد صوتًا عميقًا من أنفه وهو يضحك:

- «الله يحرقك يا عماد، الواد فرفر».

لم يكسر صوت الضحكات سوى صوت ثلاث طلقات متتالية أطلقها خالد معلناً فوزه وانتصاره في الرهان على عماد، بثقة مبالغ فيها نظر إلى عماد وقال:

- «ادفع يا حيلتها».

التحدى هو الطابع السائد بين عماد وخالد، عماد يخوض كل تجاربه بعشوائية على غير عادة خالد يخوض نفس التجارب، ولكن كل خطوة لها حساباتها ولذلك خالد دائم الانتصار.

كانت الساعة الثانية عشر والنصف وبقي ساعتان على انتهاء اليوم الدراسي، سؤال طرحه شريف وهو ممسك بسيجارته الثانية:

- «على القهوة ولعبنا بلياردو ولسه ساعتين، هانعمل ايه يا عم عماد؟ مش أنت صاحب فكرة الزوغان؟»

نظر عماد إليهم وهو يبتسم:

- «حد يحب يروح عند البت أميمة؟»

صمت للحظات، شريف يفكر في حرمانية الزنا وإن كان يتمنى أن يخوض تلك المتعة التي لا يتذوقها إلا وهو يمارس عاداته السرية، وائل يفكر في والده إذا ما تأخر عن موعد عودته والضغط الذي قد يقع فيه رغم إنه لا يمانع على الإطلاق أن يذهب مرة أخرى إلى أميمة، أما خالد فهو رافض للفكرة من بدايتها، لأنه لا يستطيع أن يرى أحداً يشاركه في امرأة رغم خوضه بعض العلاقات العابرة، التي لا يعترف بها سوى لشريف ولا يعترف بحبه الوحيد إلا لنفسه.

- «أنا هاروح».

في الخلفية كانت أغنية عمرو دياب الجديدة: «ولسه بتجبه يا قلبي، يا قلبي حرام عليك».

\*\*\*

الوقت الأطول في يوم حلمي يمر بين أوراقه ودفتر ملاحظاته وهو يحاول أن يسترجع علاقتهم.

- «هو كل الولاد أفكارهم جنسية؟»

- «الغالبية العظمى يا حبيبة».

- «ليه؟»

- «عشان فاكرين إن الجنس عيب».

- «وهو عيب!»

- لا

\*\*\*

(دفتر الملاحظات - القلب)

قبل زفافهما أدركا أن غرفة المعيشة هي أكثر غرفة سوف تجمعهما فحظيت باهتمام مضاعف، كانت أصابعهم تغار من حالة العشق التي وصلا إليها، فكانت تتشابك دون قصد لتملأ الفراغات بينهم ليتحد الجسدين في جسد واحد، على الأريكة التي اختارها بروحيهما ارتسمت ابتسامة على كل جزء من جسدها وهي تتحدث:

- «أخيراً أنا مش مصدقة».

- «عشان تعرفى مجبك قد ايه، قلت لك هاعمل المستحيل عشان السنة دى ماتعديش غير واحنا مع بعض».

من اليوم الأول لاستلام شقتهم قررّا سويًا أنها الغرفة الأنسب لتكون غرفة المعيشة، وكان قرار قاطع منه أنها هى من ستختار كل تفاصيلها دون التدخل من أى طرف فى العائلتين حتى ولو من باب النصيحة، بدورها اشترطت إنه لا بد أن تشعر برضاه على اختياراتها، كان أصعب قرارات تلك الفترة هو اختيار اللون إما الأبيض أو «Orchid»، أفتح درجات البنفسج، كان القرار سريعًا سيكون اللون الأساسى للغرفة الأبيض ولون إحدى الحوائط الرئيسية هو البنفسج، غرفتهم كانت مختلفة ورفضاً أن يكون فى الغرفة كرسي منفرد، أريكة بالكاد تكفى إلى ثلاث اشخاص فوقها زين الحائط بنفس اللوحات التى تزين «سوا» على اليسار، وتحت الشباك صمم هو ركنة على الطراز العربى، ما دامت الأريكة صغيرة فكان لا بد من مساحة إذا قررّا الاستمتاع ببعضهما هى كانت نيته التى لم يعلن عنها وقتها، أمام الأريكة تلفاز يتوسط الحائط، كانت الغرفة بسيطة وعميقة كحبهم.

بعد سنوات من زواجهم يمر يوم آخر شبيهاً باليوم السابق ومماثلاً لليوم القادم، يجلسان سويًا فى نفس الغرفة، جلس هو على أقصى اليسار ممسكًا بالهاتف الجوال يتصفح مواقع التواصل الاجتماعى أو يخوض دردشة سريعة، هى تجلس فى أقصى اليمين ممسكةً بفنجان قهوة تشاهد إحدى مسلسلاتها المملة على حد تعبيره، رأسها تصرخ فى احتياج إلى سيجارة سريعة ولكنه دائم الرفض أن تدخن أمامه، حين قطعت هذا السكون:

- «شفاط المطبخ عايز يتغير».

- "حاضر".

- "ايوه، يعنى امتى؟"

- "ما قلت حاضر".

- "أنت مش بتدخل المطبخ قدى وأنا محتاجة الشفاط".

- "يعنى أنت اللى بتدخليه؟"

- "قصديك إني مش بعمل حاجة؟"

- "لا مش قصدي وحاضر والله حاضر والمصحف حاضر هاغيره".

دائمة الاستعداد لأي معركة تحشد أسلحتها مبكراً للهجوم وبغضب:

- "نفس الحاضر زى أى حاجة بقت في حياتنا، أنت مبسوط وبتخرج وعائش حياتك وأنا اولع، أنت بقيت أنا في جدًا عمرك ما كنت كده في ايه؟ والله لو اعرف أن الحال هيوصل لكده عمري ما كنت حبيتك".

لم يكن رده يوازي غضبها غضبًا ولكن كان يوازيه استفزازًا.

- "أنا على فكرة قلت حاضر".

- "ما هو حاضر من غير ما تعمل حاجة، على طول تجاهاول ولا مبالاة مع إنك ماكنتش كده لما كنت هتموت على ولا نسييت؟"

لم تصمت عند هذا الحد ولكنها استمرت في الهجوم وبدأت في مصارحته باستيائها من الحياة معه بكل صفاته، هي التي وافقت على تلك الصفات من

قبل، من تغير هي أم هو! أم فقط أسوأ ما فينا يتحكم.

- «أنت على طول في الشغل ومش عايش معايا، شغلك لنفسك إنما أنا فين؟ مافيش أمل خلاص أنا تعبت».

الآن حان وقت الهروب هكذا يحدث نفسه هل يخشى المواجهة أم يخشى أن يظهر جانبه الأضعف، أصبح يبحث عن راحته فقط هو أيضًا أسوأ ما فيه يتحكم:

- «تمام قوى أنا مش هاخلص، اهتمام ولا مبالاة عشان شفاط! إيه يا جدعان الجنان ده!»

قالها واتجه إلى الباب وتركها في قمة غضبها وهو في قمة انتصار زائف وترك المنزل ورحل.

\*\*\*

(دفتر الملاحظات - العقل)

المرور على منزله أصبح عادة شبه أسبوعية، لم تعد تشتاق للحديث معه فقط، تريد أن تراه ولو مرة أخيرة، لم تره منذ آخر لقاء جمع بينهما عندما قررت الزواج من شخص آخر، كانت دائمة البحث عن مبررات لرفضه، كانت دائمة اللوم على إنه غير طموح وشخصيته ضعيفة أو إنه لا يحبها مبررات كثيرة وضعتها لتهرب، تقف بعيدًا عن منزله لمسافة تستطيع بها أن تراه ولكن لم يحالفها الحظ ولو لمرة.

- «الو أنا قدام البيت، ما تتصل كده تسأله هيرجع إمتى؟»

- «أنت عارفة الى بتعملية ده اسمه ايه؟ أنا وأنت أصحاب ماشى بس كده غلط».

صوت محرك السيارة ارتفع فجأة وكأنه يعترض على ما تقول.

- «أنا مش عارفة أنا بكلمك ليه أساسًا، أنا هاروح».

أصبحت دائمة الشعور بالوحدة ولا تملك الطاقة للتغيير أصبحت بلا هدف، زوجها الآن دائم البحث عن مبررات لرفضها، وبمجرد عودتها اندلع شجار بينهما.

- «أنت أسلوب كلامك بقى صعب جدًا غير إنك مش بترد».

لم يترك الهاتف من يديه ولم ينظر حتى إليها.

- «ماله أسلوب كلامى مش عاجبك ٩٩ فى ايه؟»

- «لا ولا حاجة».

- «لا قولى، معاليك ايه الى مش عاجبك؟»

شجار ليس وليد اللحظة ولكنه نتيجة ما حدث يوم أمس، خلاف متكرر ومعتاد بعد كل لقاء يجمعه بعائلتها، جلس الجميع على المائدة وقت الغداء جلست هى بجانبه، وبدأ أن الجميع يتحدثون بصورة طبيعية إلا هى كلما أراد أن يبدى رأيه تتدخل لتوقفه أو تغير مسار الحديث، تعلم جيدًا أن هناك خلاف خفى بينه ووالدتها وكانت تحاول إلا يحدث صدام ليس خوفًا عليه ولكن حفاظًا على شكلها.



- «امبارح واحنا راجعين فاكر كلمتي ازاي؟»

- «لا ما هو أنت مش واحدة بالك من التناكة بتاعتك، أنا مش شغال عندك».

- «أنا كنت باتكلم عادى».

طريقتها التي يرفضها الآن هي الطريقة التي جذبتة هو شخصيًا، لم يعد يرى الصورة بوضوح، بدأ في تحريك يديه بعنف أمامها.

- «أنت مالكيش أى ثلاثين لازمة، ده أنا ادوسك بالجزمة».

تركها وذهب لينام بمفرده، إنه الشهر الخامس دون أن يجمعهم سرير واحد، حتى بدأت تفتر منه وترفض داخليًا التفكير في العلاقة الحميمة معه وإن كانت تشتاق إلى أى علاقة حميمة أخرى.

قبل أن تنام أرسلت رسالة أخرى إلى صديقها.

- «أهو شتبقى ودخل ينام لوحده».

ليلة أخرى تمر عليها دون أن تحاول التغيير، تتلذذ بسليبتها أمامه، ثم تعود لتحلم بشخص آخر وتتمنى لو أنها لم ترفضه، هو وضع رأسه لينام وقبل أن يغمض عينيه تذكرها وكاد قلبه يشتعل شوقًا، أصبح انتصاره في أن يشعر بأنها لا تنعم بسلام داخلي، وأصبح انتصارها في أن تنجح أن تلعب دور الضحية.

\*\*\*

(دفتر الملاحظات - الروح)

- «هى مش بترد ليه؟ لما اكلمها ترد، إديها التليفون».

صب غضبه على والدتها ولتتجنب مشكلة أخرى أخذت الهاتف منها.

- "أيوه".

- "مش بتردى ليه لما بالكلمك؟"

- "احنا متخافين ولما نكون فى الحالة دى أنا مش بحب أتكلم، وماما تكلمها بأسلوب أحسن من كده".

- "لا ما هو أنت لازم تقولى مالك؟ وماما أنا هاعتذر لها".

- "للمرة المليون أنا مش عايزة أتكلم، من فضلك أرحمنى".

حتى عندما يختلفا تفضل أن يختلفا بطريقتها، أصبحت مثاليته عبثاً عليه.

- "لا هنتكلم وهاتقولى لى فى ايه دلوقت؟"

- "أنا قلت كثير ومش عايزة اتكلم بقى".

إصراره على مناقشة وضعهما الآن فكرة خاطئة.

- "طب هاعدى عليكى نخرج".

- "أنت مش واخد بالك إنى فعلاً مش طايفة نفسى، أرجوك بقى يا أخى".

تظن إنه تزوجها لأن شخصيتها مختلفة عن شخصية والدته، ولكن كم هى مخطئة هو تزوجها لأنه يشعر معها بأمومة افتقدها.

- "أنت فظيعة عمرك ما هاتتغيرى، أنت مش حاسة بنفسك عاملة ازاي؟"

بمجرد أن تشعر بارتفاع نبرة صوته واقترب لحظة انهياره تغلق الخط، ولكنه لا يكل من المحاولة أو ربما الإلحاح، لا تمضي ساعة إلا ويرسل لها رسالة جديدة.

- «أنا آسف، ممكن نتكلم لما تهدى؟»

هى قد ملت من إلحاحه وهو قد مل من مثاليتهما.

\*\*\*

(دفتر الملاحظات - الملف الرابع)

"أنجوى" هو اسم كلبتهما، أخذت ملامحها تتأثر بالجو المحيط بها، وزنها زائد بشكل ملحوظ، كلما نظرت إلى عينيها تشعر بالنعاس، رغم عشقهما لكلبتهما إلا أنهما توقفا عن المحاولات في تغييرها مثلما فشلوا في المحاولات الدائمة للخروج من أزمة اللا أزمة.

- "بقولك تيجى نطلع الأقصر؟"

لم يعد هناك فارق بين الأقصر وغيرها، هكذا حدثت نفسها قبل أن تحيب:

- "مافيش مشكلة نروح".

لا أظن أنها ستبدى رأيًا مطلقًا في أى شيء، أتمنى أن تصارحنى برأيها ولو مرة.

- "طب لو عايزة مكان تانى نشوف؟"

"مكان تانى يعنى هاتفرق! "

- "لا يا حبيبي نروح الأقصر، تغيير برده".

\*\*\*

نظر حلمى إلى حبيبة وهى تقاوم النوم.

- "عايزة تنامى؟"

- "لا كمل يا حلمى، عايز افهم مين دول، واياك تكون حد فيهم ولا كنت بتحب واحدة منهم".

نظر إلى جسدها وهو يتمدد على الأريكة، وابتسم: "لا أنا مش واحد فيهم"، ثم اخرج دفتر ملاحظاته وأمسك قلمه وعاد للكتابة،

"السعادة مش حلم هى واقع بس زى أى واقع فى الدنيا محتاج مجهود ومجهود كبير، محتاجة إنك تتعب، مافيش قاعدة ثابتة للسعادة، مافيش خطوات تقدر تطبقها بين الناس عشان يعيشوا مبسوطين، السعادة بين أى اثنين عاملة زى الـDNA مالهاش شبه، لازم يتعبوا عشان يلاقوا DNA بتاعهم، لكن أصبح النكد، الهجوم دون مبرر، الانهزامية، الإلحاح، السلبية، ادعاء المثالية، صفات تعيش داخلنا تسيطر على علاقاتنا تزداد معها الفجوة، نتساهل فى استخدامها دون أن نبذل مجهود فى أن نسترد علاقاتنا، يستمتع الجميع بدور الضحية ونستمر فى فقدان علاقاتنا إلى أن نصل إلى حافة الانهيار، ثم نلقى اللوم على شريك حياتنا".

أدركت الآن أن لكل منا صفة نستخدمها عند الدفاع عن أنفسنا، صفة نرفض الاعتراف أنها تتحكم فينا، تسيطر على حياتنا، تحولنا إلى صراع هدفه الانتصار، ولكننا تناسينا عن عمد أن علاقاتنا ليست صراع وأن الانتصار

فيها هزيمة.

قاومت حبيبة النوم وتوجهت إلى حلمى بالسؤال:

- «كل ده سواد جواهرم؟»

- «ما هو مش كل الناس حلمى».

ضحكت باستنكار:

- «ولا كل الناس حبيبة».



(٣)

الحب

"يا حبيبي لا"

عمرو دياب

ألبوم أكثر واحد - ٢٠٠١





علينا أن نُحِب بالطريقة التي يفضلها من نُحِب.

وضعت قدم على آخر وعلامات الحيرة على وجهها وهي تنظر إلى حلمي

- "هو بيحك؟"

- "ما عرفش".

- "أنت بتحبينه؟"

- "جدًا والله".

- "بتحبينه ازاي؟"

- "يعني ايه بحبه ازاي؟ بحبه يعني بحبه، وبحبه قوى كمان".

وقف حلمي ونظر من النافذة ثم عاود السؤال مرة أخرى:

- "طيب السؤال بطريقة ثانية، تعرفي توصفي الحب ده؟"

- "ايه بقي هو كله وصف، مرة أوصف الغضب ومرة الحب؟"

- "ما هو احنا لو معرفناش نوصف مشاعرنا يبقى عمرنا ما هنخلي شريكنا يحس بيها، إذا كنت نفسك مش فهمهاها هتعرفي توصليها إزاي؟"

- "يعني قصدك إني مش فاهمة مشاعري؟"

- "حاجات كثيرة في حياتنا شفناها كده اتعلمناها زي ما هي من ضمنها الحب،

بنقلد الى حوالينا فيها بس عمرنا ما عرفنا ازاى نحب؟

- «الحب يا دكتور مش حاجة نتعلمها، الحب حاجة بنحسها».

- «لا، الى بنحسه فى الأول ده اسمه إعجاب أو شوية مشاعر زيادة أو يمكن يكون استلطف، لكن الحب ده خطوة واحدة فى العلاقة وعشان ناخد الخطوة الثانية محتاجين مجهود كبير، أنت بقى ايه المجهود إلى بتبذليه عشان الحب ده؟»

عادت بظهرها ووضعت قدم فوق الأخرى.

- «إنى مستحملاه بكل الى بيعمله».

- «لو الحب كده يبقى بلاش منه احسن».

- «تفتكر أنا هنا ليه يا دكتور حلمى؟»

- «لا ده سؤال أنت بس الى تجاوبى عليه».

- «أنا هنا عشان عايزه احبه ويحبنى من تانى».

- «يبقى تعملى حاجة واحدة».

- «هاعملها».

- «لازم تحب بالطريقة الى بيحبها جوزك».

- «يعنى إيه؟»

- «يعنى ماينفعش تكابرى وتحسسى جوزك إنك بتتفضلى عليه بالحب ده».

قالها ثم أشار إلى لوحة على الحائط مكتوب عليها: «علينا أن نُحب بالطريقة التي يفضلها من نحب».

أنهى دائماً اللقاء عند هذه الجملة فوحدها تحتاج مجهود أسابيع لاستيعابها فما بالك بالتنفيذ.

\*\*\*

انتظرت ياسمين حتى خرجت منها وغادة من الفصل وامتزج توترها مع دوران مروحة السقف.

- «في ايه يا هبة مش كده ايه اللي حصل؟»

نظرت إليها وهي تمسح دموعها.

- «تخيلي إمبارح شفته ماشى مع صاحبتة الأولانية».

- «طب يا بنتى مش أنت اللي سايباه، طظ فيه وصاحبى واحد أحلى منه، ده أنت كله نفسه يصاحبك».

- «إزاي يعنى أنت هبلة؟ أكيد هايقولوا أن هو اللي سابنى وراح لصاحبتة القديمة، أنا اتقارن بدى».

- «هو أنت بتحببيه؟»

ضمت هبة شفيتها في محاولة لإخفاء ابتسامة رغم دموعها.

- «اه يا ياسمين بحبه وأنا غيرته وكله عارف كده، فاكدة هو كان إزاي وبقي ايه؟ أنا أعمل فيه كل ده ولما نتخانق خناقة يروح للبت المعفنة دى، يا ياسمين

أنت مش متخيلة والله منظرها فظيعة جدًّا، تلاقيها دلوقتي طيارة من الفرع".

- "ماتزعليش نفسك أنا عارفة وأنت عارفة إنك هاتجيبه تاني".

لم تكن عادة أسعد حالًا من هبة، ولكنها لا تملك القدرة على التعبير، تشعر بالغيرة من هبة وياسمين ليس كرهاً أو حقداً، لكنها تتمنى فقط أن تجد شاب يهتم بها وتشعر معه بمشاعر تبذل قصارى جهدها في كبتها، ولكن على الرغم من أمنيته فإنها لا تمتلك الجرأة لخوض تجربة عاطفية وتختفى وراء ستائر رومانسيته وأنها ستجد يوماً شريك حياة تحبه قبل الزواج، خوفها من أخيها وحده يكفي أن تطرد الفكرة من رأسها، لا ملجأ لها إلا مها.

- "هو أنا وحشة قوى يا مها؟"

حركت مها فكها يمينًا ويسارًا، فهي تعلم جيدًا إنه فاصل جديد من فواصل عادة في الكآبة.

- "ابتدينا يا عسلية، في ايه؟"

- "هو أنا آخر واحدة هاتجوز فيكم، وهاعنس أنا خايفة إني ملاقيش حد يجبنى".

رغم أنها لا تحب عندما تأخذها عادة إلى هذا المنحنى، ولكن مها لها بعد رومانسى مختلف وتتأثر سريعًا.

- "حصل ايه عشان تقولى كده؟"

- "أنت عارفة أنا بحب هبة وياسمين قد ايه، بس هما كل لما يروحوا في مكان العين بتبقى عليهم ويبقوا نجوم".

- "بصى يا غادة، أحنأ أصحاب من زمان، بس ده لا يمنع أن فيه تصرفات مش عجبانى منهم، ومش موافقة عليها كمان، بس أنا ماقدرش امنعهم ومش هامنعهم، بس زى ما أنت عارفة أنا مش بعرفهم أول لما يكونوا واقفين مع أصحابهم الولاد، يبقى انهم الاثنين نجوم وسط الولاد مش حاجة تخلينا نغير، عشان هم غلط يا غادة".

- "أنا عايزة أكون حلوة، عايزة أكون بنوثة".

- "ماحدش يقدر يساعدك تكونى الشكل الى أنت عايزاه غير نفسك ونفسك وبس".

- "يا مها أنا نفسى حد يجيب لى هدايا أو يعمل لى مفاجأة، حفلة مثلاً، أنا عايزة حد يحبنى".

شاركت مها غادة فى البكاء هى أيضاً داخلها أمنيات لا تعترف بها سوى بين طيات الليل قبل نومها، حاولت مها أن تسيطر على الموقف حين رأت ياسمين وهبة وعلامات السعادة على وجه ياسمين.

- "فى ايه فرحانة كده ليه؟"

- "تعالوا بسرعة عشان فيه كاسيت ورقص قبل الفسحة ما تخلص".

هى اللحظة التى تنتظرها ياسمين، اللحظة التى تتلقى فيها نظرات الإعجاب قبل حروفه وهى تتمايل وترقص باحترافية شديدة مستخدمة كل أجزاء جسدها، تعلم جيداً أنها تمتلك مقومات لتكون النجمة فى هذه اللحظة.

\*\*\*

وقف شريف داخل صالة البلياردو ابتلع ريقه وهو يحاول أن يجد مبرر لرفضه:

- "ده حرام يخرب بيتك".

نظر إليه عماد وهو يضغط على شفته السفلية بأسنانه محاولاً إظهار شهوته:

- "وأحنا بنعمل ايه حلال بس يا شيكو!"

- "لا روحوا أنتم أنا لا ماليش فيه".

- "وهو أنا أهبل أخدك معايا".

ابتسم شريف وأدرك سريعاً ما يشير إليه، المرة الأولى التي شاهد فيها صورة لامرأة عارية تماماً كانت مع عماد، احمر وجهه وتوقف عن التنفس للحظات وكاد أن يخترق الصورة بعينه، وتذكر عماد وهو يضحك ويقول: "أنت شرقت"، تتغير حالته النفسية سريعاً لأنه يدرك الفارق بينه وعماد، عاد سريعاً من شروده وواثل يقول:

- "والله يا خويا على عيني، يعنى يرضيك ابقي مستعجل عشان الحق اروح، وتيجي واحدة زى دى تقول على ضعيف".

نفخ خالد دخان سيجارته في اتجاه واثل:

- "لا حوش وأنت جامد أوى".

- "ده أنت أكثر واحد عارف أنا جامد قد ايه يا خلود يا جميل".

ضحك جميعهم وبدأ أن فكرة أميمة لم تلق أى استحسان سوى من عماد وواثل لكن واثل يخشى أن يمر الوقت عند أميمة ورجولته ستمنعه من أن يرحل

مبكراً ويجلب على نفسه جحيم لا يقوى على صده.

على الرغم من أن عماد لا يكبح شهوته ولكنه يختلف في علاقته عنهم، لا يقوى على العيش دون أميمة وفي نفس الوقت دون حبيبته، شخصيتان في قلب رجل واحد، لا يستطيع أن يسيطر على شهوته ولا على قلبه، لديه "صاحبة" ارتبطا في السنة الثانية من المرحلة الإعدادية، يعشقها بجنون وهي الوحيدة التي يفقد أمامها بلاغة لسانه، لديه علاقات كثيرة ما بين الصداقات وصولاً إلى العلاقات الجنسية الكاملة، ولكن تبقى حبيبته في مكان خاص داخله، هو بلا شك أجراًهم في التعامل مع الفتيات بمختلف أعمارهن ولكنه أفقرهم في السيطرة على نفسه.

لم يبد خالد اهتماماً بما قاله وائل سوى بابتسامة سخيفة،

قطع وائل الابتسامة:

- "بتتكسف يا خلود ولا ايه؟"

قالها وأنهاها بقبلة هوائية في اتجاهه.

خالد لا يتدخل في مثل هذه الحوارات، هو أيضاً لديه علاقة عاطفية ولكنها مختلفة كاختلاف شخصيته عن عماد، هي حبه الصامت صمت هذا الحب يغني في وصفه عن الكثير من الكلمات، لا يرق قلبه إلا لحظة لقائه مع بنت عمه، على الرغم من قلة اللقاءات بينهما، ولكن لا يسمح لقلبه أن يخفق إلا بعد تلك اللقاءات، يبذل قصارى جهده ليظهر بأحلى صورة ممكنة معها، تلتقى أيديهم بشكل مختلف، هو يعتمد أن تظل يدها في يده لأطول فترة ممكنة، وهي تستمتع بسحب روحه مع يدها بعد السلام، يتنازل بدوره عن روحه بابتسامة بعينيه هي فقط التي تلاحظها، ينتهي السلام وهي تداعب الأرض



بعينها خجلاً، لا يتعدى لقاء الأيدي سوى ثوانٍ معدودة، ولكنها كافية لشحن خزاناته حبه للقاءٍ تالٍ ولو طال، من وجهة نظر أصدقائه هو عدو المرأة الأول، ولكن لو يعلموا مدى إخلاصه لنصبوه في الحب إلهاً.

ظل وائل يرسل قبلات لخالد إلى أن ابتسم.

- "خلاص بقى فكك".

وائل هو صاحب البنات لقب أطلقه عماد عليه، خفة دمة أجبرتهن على الاقتراب منه، ولكنه يفشل في الخطوة التالية فاقد الثقة في نفسه، لديه شعور دائم بالرفض، يخشى إذا ما خطا خطوة أخرى أن يفقد كل ما امتلكه، جبن وائل هو ما يدفعه إلى البقاء في مكانه يكفيه ما وصل إليه، لم يكره هذا الجبن إلا بعد سنوات حين علم أن الفتاة التي كانت تهتز لها مشاعره ويفقد مهارته في استخدام خفة دمه أمامها كانت تحبه.

قطع شريف القبلات وقرر أن يظهر شخصيته:

- "أنا مش هاروح عند أميمة دى".

تربية شريف وضعته في إطار معين للتعامل مع الفتيات، دافع التدين أو الخوف أو التربية هو نفسه لا يعلم أيهم كان سبب الرفض.

أخذ عماد سجارته ووضع نظارته الشمسية وتركهم إلى لقاء بعد أقل من ساعتين في شقة خالد.

\*\*\*

(دفتر الملاحظات - القلب)

في محاولة منها لاستعادة السعادة المفقودة، قررت أن يكون عيد زواجهما هذا العام مختلفًا، شرعت مبكرًا في ترتيب حفل ضخم ورتبت مع أخوته وأصدقائه المقربين، بالإضافة لمجهود مضاعف بذلته في إخفاء الترتيبات عنه، ولكن رغم كل هذا المجهود لم تر السعادة التي توقعتها في عينيه ولم يبد اهتمامًا بأي شيء اللهم إلا بعض الابتسامات لمجاملة الحضور، تحولت تلك الابتسامات مع مرور الوقت إلى نظرات لوم، حاولت جاهدة أن تزيج تلك النظرات ولكنها فشلت، حاول هو أيضًا أن يحدثها عما يدور داخله ولكنه ابتعد.

هل نسيت أنني أكره المفاجآت، هل تحاول أن تظهر بدور الزوجة المثالية ألا يكفيها البعد الذي وصلنا إليه، نظرات التوتر بدأت تظهر على ملامحها، لا تدرك ما الذنب الذي اقترفته ليسيبها كم اللوم من عينيه، كم أبهرها هو شخصيًا طوال سنوات حبهم بالمفاجآت لماذا الآن يرفضها؟

- "كل سنة و أنت طيب يا حبيبي".

هذا ما قالته بعد أن رحل الجميع.

- "وأنت طيبة".

ثم طبع قبلة على رقبتها، حاول جاهدًا أن يتمسك باتزانه وحاولت هي أيضًا أن تحافظ على لحظة السعادة وإن كانت باهتة.

- "هو العيد ميلاد كان وحش؟ والله تعبت فيه عشان خاطرك".

- "لا حلو".

- "طب مالك؟"

كاد يخبرها أنها تعلم إنه لا يجب هذا النوع من المفاجآت، كاد أن يدمر كل شيء، ولكنه أثر الصمت والهرب، وانتهت الليلة دون أن يخبرها لو أنها فقط أرسلت له رسالة تخبره أنها تقدر وتعلم جيدًا المجهود الذى يبذله لاختلاف الوضع تمامًا، باتت باكية وبات مهمومًا على ميلاد فائت جديد.

\*\*\*

(دفتر الملاحظات - العقل)

ما فائدة كل شيء نملكه الآن ونحن لا نستمتع به سويًا، قبل زواجنا كنا لا نملك كل هذا ولكنه كان يستمتع معى ويشاركنى فى كل لحظات حياتى، لم تهرب منه تفصيلاً ليجعلنى سعيدة، حتى عندما أخبرته عن عشقى لمدرستى القديمة رتب زيارة إلى هناك، كان يبقى جانبى ويستمتع بملامح وجهى، لقد فقدنا الكثير بعد زواجنا وفقدت هذا الشعور الذى داعبنى كثيرًا.

- "هو أنت ليه بطلت موضوع السفر؟ تعالى نساfer سوا يمكن نفك".

- "وأحنا فينا ايه عشان نفك؟"

- "عيد جوازنا قرب وإحنا مافيناش ولا أى حاجة سليمة مع بعض".

صمت وسرح بخياله وهو يتساءل، إلى متى سأظل أعطى بلا مقابل، ألم يحن الوقت لأشعر ببعض الحب والاهتمام.

- "وأنت هاتصلحى أزاي؟ تعرفى إنك أساسًا مش بتقربى منى، يعنى لو سافرنا هيبقى مجهود وخلص".

- "أقرب منك أزاي وأحنا متخانقين ده أنت آخر مرة....".

- "ماتكمليش، أنا مش بقول ننام مع بعض، أنا بقول تقربي منى ونتكلم".

تركته وهى فى كامل دهشتها، كيف يريد أن أقترب منه وهو يهيننى، إلى أى حد من الجنون وصل؟

حاول السيطرة على مشاعره وهو يفتح الحاسوب ويحاول أن ينسى ويشغل نفسه ببعض المهام فى عمله، ولكن احتياجه للحب جعله يتوقف وأخذ يتذكر كيف كانت لمساتها، وكيف كانت تقترب منه بكتفيها وكيف كانت تشعره إنه مرغوب، توقف عن العمل وفتح حساب الموقع الاجتماعى الخاص به وبدأ يكتب.

"هل حقًا يجب أن ننتظر إلى أن نجده، هل حقًا سنجده أم سنبقى منتظرين أن تغفر لنا السماء ما فقدناه، فيما تكمن حقيقة الحب! هل تكمن فى أننا فقط نشعر به أم أننا دون من نحب نشعر بالوحدة وإن كان لنا ألف من الأصدقاء".  
هى أيضًا كانت تبحث عن شعور الحب المفقود.

- "ألو عشان خاطرى".

- "عايزة ايه يا ست العاقلين؟"

- "مممكن يوصل له إني فعلاً ندمانة على اللى حصل، مممكن تقول له أنى أسفة جدًا، أنا تعبانة وعندى أحساس أن كل اللى أنا فيه ده عقاب".

- "قصداك إني أوصل له ده؟"

- "يووووه".

- "لا مش هاوصل له حاجة عشان أنا مش حابب أشوفك خاينة، ومش حابب إنك تدورى على مشاعر نقصاك في حد تانى غير جوزك، سلام".

- "أوف، سلام".

أنهت المكالمة وإن كانت قد حسمت قرارها أنها سوف تسعى إليه من جديد.

\*\*\*

(دفتر الملاحظات - الروح)

بعد أن هدأت العاصفة وكف هو عن الإلحاح ونسى مثاليته توجه إليها.

- "تيجى نكتب كل واحد محتاج ايه من التانى عشان نحس بالسعادة؟"

كانت هذه المرة الأولى التي حاول فيها أن يخرج عن المألوف في حل مشكلة بينهما.

- "فكرة هائلة وربنا يكرمنا إن شاء الله بس أعتقد هيبكون في صعوبة في التنفيذ".

أخرج ورقتين وقلمين وهو يردد:

- "ربنا كريم".

بدأت هي سريعاً في كتابة قائمتها:

١. "لو جعان ممكن تسخن الأكل وقبل ما تسأل هو في أكل ولا لا تفتح الشلاجة".

٢. "تعمل حسابي في كل حاجة زى أنا ما بعمل حساب كل واحد فيكم".
٣. "ممکن تشيل الأطفال شوية من نفسك".
٤. "تاخذ قرار في اى حاجة تكون بتبسطني وتعملها من غير ما تسألني".
- نظرت إليه وعلامات السعادة تملأ وجهها.
- "أنا خلصت".
- "أنت لحقتي؟"
- "أيوه أنا عارفة أنا عايزة ايه".
- "طيب أستنى".
- سعادة داخلية تملكتها لكونها تعلم ما تريد، ودون وعى منها ارتكبت حماقة معهودة وضغطت عليه.
- "يلا بقي".
- "طب بصى أنا مش هاكمل كتابة أنا هاقول".
- "زى ما أنت عايز".
- "أنا بعمل لك حاجات كثير وأنت مش بتشكريني عليها".
- "زى ايه؟"
- "بسببك مثلاً تخرجى مع صحباتك وأنا بقعد مع الأولاد".

- «لا استنى، أنت بتعمل كده لما أنا أطلب مش لوحدي ودي تفرق كثير».

مزقت قائمتها من الغضب لأن نفس الإحساس وصله من جديد، هي تظن أنها أفضل منه بكثير، والأهم أنها لم تعد تشعر معه بالأمان.

- «يعنى ايه؟!»

- «يعنى أنا نفسى تاخد أنت القرار ده لوحدي، حتى وأنا قاعدة معاك من غير ما أطلب منك، خد قرار».

انهار كل شيء حين أخذ يفكر في مثاليتها الزائفة وأخذ الحوار طريقه المعهود.

\*\*\*

كانت الساعة تشير إلى الثالثة فجراً، نظر حلمي بين أوراقه وملفاته الأربعة، وأخذ يطرق بالقلم على أوراقه بإيقاع منتظم في محاولة للعودة للكتابة، أغمض عينيه وهو يتذكر حبيبة صباح ذلك اليوم.

كان قد ترك لزوجته علبة صغيرة وضع فيها حلوى، وورقة كتب فيها «إليك يا من يأس الوصف في وصف حبك».

- «تعرف يا حلمي على قد ما أنت بتعمل حاجات كثير غريبة، وأحياناً بتعصبني بس والله العظيم جويا ليك رصيد مفتوح، ممكن تعمل اللي أنت عايزه، وأنا هافضل مسامحك طول عمري، أنا كل يوم عشته معاك كان حبي ليك بيزيد، كل وردة جبتها لي كانت بتشبعني حب».

- «ايه ده كل ده عشان شيكولاتة؟»

تركت الأريكة وجلست أمامه.

- «لا كل ده عشان أنت بتعرف تحبني ازاي».

ابتسم وهو ينظر إلى بندول ساعته خجلاً:

- «أنت اللي علمتيني أحب».

- «طب سؤال بقى بعد وصلة الدلع دى، هو ازاي ملف العقل الراجل طلب من الست تقرب منه وهما على طول متخافين».

- «عشان هو بيعحب يتحب كده، تكون ديما جنبه تمسك ايديه تحضنه، أو حتى تلعب فى شعره، بس هى من اليوم الأول رفضت ده وكانت مستنياه يقرب».

- «كل الستات كده».

- «لا مش كل الستات وكل الستات مش زى بعض زى ما كل الرجالة مش زى بعض».

- «يعنى ايه؟»

- «يعنى احنا فضلنا نصنف الستات بيعبوا ايه والرجالة بيعبوا ايه مع اننا مش شبه بعض طب تعرفى».

وضعت كفها أسفل فكها ونظرت إلى عينيه:

- «ايه؟»

- «الراجل فى ملف العقل رومانسى جداً والست عملية جداً».



- "يعنى الآية مقلوبة؟"

- "لا طبعًا بس مافيش قواعد فى المشاعر أو فى الحب، بس ممكن تكون القاعدة الوحيدة إن الوقوع فى الحب مش اختيار، بس المحافظة عليه اختيار".  
منذ سنوات أدرك حلمى أن لكل منا طريقة لتقبل الحب وإن كان للحب ألف معنى.



(٤)

الاحتياج

"أجمل إحساس"

إليسا

ألبوم عايشة لك - ٢٠٠٢



إن الحب احتياج ولكن الاحتياج حياة.

- وضع نظارته على مكتب حلمى ثم بدأ فى الحديث
- «أنا محتاج منها ايه!! لا مش عارف يمكن عايزها تبطل زن شوية؟»
- «طيب لو هو ده الموضوع اطلب منها تبطل زن».
- «أنا اطلب منها حاجة! مستحيل، وبعدين أنت متخيل يعنى إنى هاقول لها ماتزنيش خلاص مش هتزن، ايه يا دكتور أنت مش عارفهم!»
- «لا عارفهم، عشان كده اطلب منهم مش بيكون كلام، لازم يكون فعل».
- «فعل!! قصدك اعمل لها حاجة مخصوص يعنى، لأ كده هتحس إنى ضعيف وأنا مش ضعيف».
- «أنت ليه خايف مراتك تشوفك ضعيف؟»
- «عشان أنا مش ضعيف».
- «أنا وأنت بس الى بنتكلم فاتكلم براحتك».
- «أنا محتاج احس إنى راجل».
- «أنت ليه مش حاسس بده؟»
- «عشان هى دائماً بتحسنى إنى ماليش لازمة فى حياتها، وإنها هتكون أقوى لو أنا سيبتها، تعرف يا دكتور أحياناً بأسرح وبحس أن الستات فقدت جزء

كبير من أنوثتها لما قررت تلعب دور الراحل وتتعلم تبقى قوية لوحدها".

- "بعيدا عن الستات دلوقت أنت دورك ايه؟"

- "أنا راجل البيت".

- "تمام قل لى بقى دورك ايه فى البيت؟ ولا أنت فعلاً مالكش وجود فى البيت وهى كان لازم تتعلم تبقى قوية؟"

\*\*\*

الآن تبدأ مرحلة مختلفة فى علاقتهن، لا يجتمعن بعد انتهاء اليوم الدراسى تختلف اهتماماتهن، مها لا تفضل الاختلاط بهبة وياسمين، أما عادة ترفض لأنها لا تمتلك من الآليات التى تجعل للاختلاط معنى، ظاهرياً هى ترفض الارتباط وإن كانت تموت شوقاً له، لدرجة أنها باتت تهاجم كل المرتبطين بحجة أنهم على خطأ، هى تستمتع بمحاولات أحد أبناء حيها للاقتراب منها، رفضها لا ينبع سوى من أنها تراه دون مستوى الفتيان الذين يرتبطون بياسمين وهبة.

انطلقت عادة وهى تمسك بذراع مها ومشاعرها تلتهب بحماسة من إعجاب الجميع برقص ياسمين.

- "ياسمين بترقص فظيعة أنا بحبها قوى".

لا تتخلى مها أبداً عن حس الفكاهة وإن كانت تعلم إلى أين سيؤول حديث اليوم مع عادة.

- "أنا لو كنت راجل كنت حبيبتها وش".

- "تعرفى يا مها، أنا والله مش باغير من هبة وياسمين خالص".

ها قد بدأ الحوار كما توقعته مها، وفي محاولة استباقية منها للحيلولة دون هذا الحوار، الذى لن تتحملة الآن حاولت تغيير الموضوع:

- "غادة سمعتى مغنى اسمه كاظم الساهر شريط اسمه أنا وليلى".

نجحت فى تحويل الحوار.

- "أنا سمعت الأغنية كثير جدًا وقعدت أعيط أكثر، هو ليه الحب ماينتصرش؟ هو احنا فعلاً ممكن نبيع نفسنا؟"

توقفت مها عن الاستماع عند هذه اللحظة، لا تبدو مها قوية كما يظنها الجميع، مها لديها يوميًا لحظات بكاء على حال أمها، التى اعتادت سماع بكائها على النذل الذى تتذوقه من والدها، نعم والد مها يهين والدتها وهذا سرها.

- "بقولك ايه يا غادة أنا هامشى من الناحية دى، عشان عايزة اروح عند خالتو الأول".

تركتها وهى تحول كل لحظة غضب داخلها إلى ابتسامة هكذا تنصحها والدتها، كانت اللحظة مختلفة تمامًا عند هبة وياسمين مشاعر مختلفة، هبة وقفت بجوار محل الكاسيت تترقب وصوله.

- "أنت جاي ليه دلوقتى؟"

تعلم أن جمالها وحده لن يؤثر فى مثل هذا الموقف، حين قررت استخدام أسلوب آخر وبدأت فى بكاء مصطنع ولكنه يقترب من الواقعية.



- "بتعطى ليه دلوقتى؟ أنا جاى اعتذر اهو".
- "لا روح كمل مع صاحبك، مش أنت كنت معاها امبارح؟"
- "والله قابلتها بالصدفة، وهى أصرت نتمشى عادى يعنى".
- "والصدفة دى تخليها لابسة اللبس ده والمكياج ده؟!"
- لتستمر فى الضغط على مشاعره أدارت وجهها وبصوت امتزج ببيكاء ليلتها السابقة:
- "على فكرة أنا زعلانة جدًّا، وافتكرا احنا لازم نسيب بعض".
- أمسك أطراف أصابعها وهو يقترب من وجهها.
- "نسيب بعض ايه؟ أنا ممكن أموت لو ده حصل، أنا مجبك وأنت عارفة ومتأكدة من ده".
- ابتعدت هبة إلى الخلف قليلاً، فرغم جرأتها لم تصل مطلقاً للاتصال البدنى بأى صورة من صوره، وإن كانت ياسمين فى الجهة المقابلة لمحل الشرائط فى وضعية مختلفة.
- "ياسمين يلا بينا".
- استدارت ياسمين لهبة وهى تشير لها بالانتظار قليلاً، فقد بدأت طقوسها المعتادة فى التعامل مع صديقها الجديد، ممسكة بيديه مالت بكتفها ناحيته لتعطيه الإشارة اللازمة ليبدأ، هو لم يمانع بطبعه وضع يديه حول خصرها وجذبها حتى تلامس كتفهما.

- «ابوس بقى ولا ايه؟»

- «لا مافيش وشيل ايديك».

- «طب شيليهها أنت لو عايزة».

ضحكت وهى تضع يديها على فمها وهى تميل قليلاً إلى الأمام حين عاد قميصها لوضعه الطبيعي ليكشف الجانب البارز من خلف صدريتها، لتزداد الإثارة وهو يحاول أن يقترب منها أكثر.

- «بالراحة، مالك مش على بعضك ليه؟»

- «أنت هتموتينى قريب».

هنا تتدخل هبة عندما تلاحظ أن ياسمين بدأت فى الخروج عن السيطرة والموقف سيتحول.

- «ياسمين يلا حالياً».

أدركت ياسمين أن هبة لن تتركها حين مالت عليه.

- «مش هاخلص من هبة نتقابل بالليل عدى على بالعربية لو هتعرف تاخدها».

\*\*\*

وقف عماد على باب صالة البلياردو

- «طيب يا جدعان أنا هاروح عند أميمة وهاجيلكم كمان ساعة كده عند خالد».

فكر وائل سريعًا هل لو ذهب مع عماد، هل ستكون ساعة لهما معًا، أزاح  
الفكرة عن رأسه وهو يقول:

- "أنت عندك فيلم جديد ولا ايه يا خلود؟

- "اه عندى، بس أنا عندى مشوار مهم، لازم اعمله دلوقتى".

منذ فترة وهو يحاول أن يصارحها، يرى الآن أنها اللحظة المناسبة، عليه أن  
يخبرها أولاً ليبلغهم إنه فى علاقة حقيقية، وصل عند مدرستها قبل انتهاء  
اليوم الدراسى بدقائق، وانتظر أمام الباب و بمجرد أن رآته، كتمت أنفاسها  
وحدقت عيناها وهى تضع يديها على فمها وتتلفت، ثم مالت على زميلتها،  
نظرت زميلتها إلى خالد وابتسمت وتركتها وحيدة.

- "ازيك؟"

- "فى ايه يا خالد أنت جاي ليه؟"

- "أنت مش عايزانى اجى؟"

- "لا ما قصدش".

ابتسم وهو يضع أطراف يديه فى الجيوب الأمامية للجينز ويطرق الأرض بقدمه.

- "طب أنا هاجى بعد كده كثير".

- "مش فاهمة".

- "يعنى ايه مش فاهمة؟"

- "يعنى مش فاهمة".

اللحظة التى بدأ فيها وجهها بالاحمرار، حتى وصل اللون الأحمر إلى أذنيها.

- "هاجى كثير عشان أنت بتوحشيني".

- "أنت بتقول ايه!"

بصوت متقطع.

- "أنت بتوحشيني وبتوحشنى كل حاجة فيك، صوتك، والله العظيم بيوحشنى، ايديك لما بتلمس ايدى، بتوحشنى، كل حاجة فيكى".

رفعت أكتافها وهى تمد شفتيها إلى الأمام، ولم تستطع أن تنطق بكلمة، تعرف إنه يحبها وتعلم أنها تحبه، ولكن لم تكن مستعدة لهذا اللقاء.

- "أنا ..... أنا!"

- "أنا بحبك وبجنون كمان".

هى المرة الأولى التى يعلنها صراحةً ويخبرها بحبه، ارتبكت ولكنها ابتسمت ووضعت عينيها صوب الأرض قائلة:

- "طيب يا خالد، أنا لازم اروح".

لم يختلف الموقف المربك بين خالد وبنت عمه، عن عماد وأميمة، أشعل عماد سيجارته الثانية بعد أن انتهى من أميمة وهو ينظر إليها، ويقول لنفسه: "يخرب بيت شعرك يا شيخة، لولا إني هايج ما كنتش لمستك".

- «أنا عارفة أنت بتبص ليه، أنا قلت لك اصبر إنما البعيد جبلة».
- ثم اختتمت الجملة بصوت اعتراضى.
- «عايزة ايه؟»
- «ولا حاجة أنا قلت لك اصبر ادخل اخد دش، إنما أنت الى مسروع».
- «لمى نفسك يا بت».
- «طب قوم انزل دلوقتى لاخلبك ماتعرفش تنام مع اى واحدة ثانية، أنا مش فاضية».
- «بقولك ايه خشى استحمى وأنا قاعد مستنيك».
- كان وائل وشريف لا يزالا على القهوة.
- «اعترف يا وائل إني جامد عليك، ادفع».
- «لا لسه يا e».
- يصمت شريف عندما يشتمه أحد منهم، لا يعلم هل هذا تهريج أم جد.
- «عد ٣ حركات بس يا واثوول وكش مات وادفع».
- «مش هتقوم غير لما تلعب واحد تانى».
- «براحتك بس هنتأخر على عماد وخالد».
- «ايه يا شريف أنت عايز تتفرج على فيلم ولا ايه؟»

مرة أخرى لا يعلم ماذا يقول.

\*\*\*

مرت دقائق وهو ينظر إلى الأوراق ثم بدأ حلمى فى الكتابة إلا أن حبيبة قاطعته

- "حلمى، وقفت ليه؟"

- "اصلى بانبسط قوى لما بسمع أو افكر أى مشاعر بكر، بتكون جميلة جدًا".

- "قصدك ايه بقى؟ إنك بتكون مبسوط لما تفتكر حبك البكر".

- "يا حبيبة القلب، أنا دائمًا مبسوط ببيك، وانت الحب الوحيد الحى".

- "وهو فى حب تانى مات؟!!"

أمسك حلمى القلم ونظر إلى البندول، ثم ضغط على زر تشغيل إحدى موسيقاه المفضلة، ودون أن يجيب حبيبة، نظر إلى الملف الرابع وهو يبتسم وفتح إحدى صفحاته التى كان قد كتبها من قبل فى إحدى جلساته.

- "هو أنت لسه بتحبها؟"

- "أنا مش بحبها هى وحشاني جدًا وشايفها فى كل حاجة ولسه بتكسب المقارنات بينها وبين مراتى".

- "تعرف أنت ليه بتحن ليها قوى كده؟"

- "ليه يا دوك؟"

- "عشان مش عايش الحاضر، انزل على الأرض، صدق إنها قررت تسيبك، صدق إنك غلطت كثير، وصدق إنها كانت أول واحدة تسيبك".

- "بجاول اصدق ومش عارف، يا دوك هي لسه ماتجوزتش".

- "هو أنت محتاج ايه من البنت دى؟"

- "مش عارف بس هي وحشاني، يا دكتور تعرف مقولة "وراء كل عظيم امرأة"؟"

دون أن ينتظر رد من حلمي.

- "أكيد تعرفها، بس أنا مش عظيم ولا حاجة، لكن هي غيرتني كثير، هي السبب في تكوين شخصيتي، أنا كل حاجة بعملها أو كل قرار باخده، بتكون هي جزء منه حتى بعد كل السنين دى، هي بتوحشني عشان هي موجودة في كل حياتي".

- "طيب تفتكر ايه اللي أنت محتاجة من مراتك عشان تنسى البنت دى؟"

- "محتاج منها ايه! مش عارف".

- "يبقى لازم تتعلم تعرف".

اختار حلمي ورقة أخرى من الملف الأخير.

- "لازم اقعد مع جوزك".

- "هو مش مقتنع أساساً أنا آسفة يعني بحضرتك والدكاترة وكده".

- "كلهم كده لحد ما يشوفوا إنهم عندهم مشكلة، أنت عاملة إيه؟"

- "أنا خايفة أطلب الطلاق خايفة قوى، أنا لوحدى على طول، وشى بجد وجعنى من الابتسامة المرسومة، عايزة ابتسامة عادية، نفسى ابتسم يا دكتور، تعرف لما بدخل البيت ببقى مش عارفة اعمل شغل البيت، ولا اروح احاول ارضيه، بس ارجع وأسأل نفسى أنا هارضيه على إيه؟ أنا ما عملتش حاجة عشان يزعل".

\*\*\*

(دفتر الملاحظات - القلب)

حضر قبل مواعدهما بساعة أو أكثر، وجلس فى نفس المكان الذى اعتادا الجلوس فيه، طلب عصير ونظر إلى الصور المعلقة على حوائط "الكافيه"، يعجب بها لأنه يشعر فيهم بالحرية، لم يكن يتصور أنها ستأتى، ولكن بعد لحظات دخلت فتاة ترتدى تاير أبيض فوق الركبة وتالون وشعر مصبوغ بعناية ألهمت حماس كل من كان يجلس.

وقف وهو ينظر إلى تفاصيلها.

- "أنت احلويكى أكثر ما أنت حلوة".

داعبت بلسانها فمها من الداخل.

- "طب ممكن نقعد الناس بتتفرج علينا".

- "وحشتينى جدًّا".

أغمضت عينيها قليلاً.



- "ممکن ندخل فی الموضوع علی طول".

- "ما هو ده الموضوع، إنک طول عمرک کنت وحشانی".

- "هو أنت مش واحد بالک أنت عملت ایه فی؟"

- "عارف، بس أنت ماتعرفیش، أنا کان معمول فی ایه؟"

- "مش فاهمة".

اختفت ملامح السعادة عن وجهه وحاول جاهداً أن يتماسك، ولكن دموعه لم تطاوعه.

- "تعرفی أنا کنت ضعيف قوى، ضعيف وأنا شايفک بتحبينی وأنا بابعده، ضعيف وأنا کل ما کنت أفکر أجي أقولک واعترف لک إني مش بنام غير وأنا بحلم إنک فی حضنی أخاف، کنت زبالة وأنا شايف کل الناس شايفة حبک لی وشايفة إني بنفض، بس والله العظيم ما کنتش بنفض، کنت عيل وجبان ومافقتش إلا بعد وقت طويل قوى".

- "هو أنت بتعيط ليه؟"

- "مش عارف، بس یمکن عشان بقالی سنين کاتم المشاعر دی جوایا ورافض اعترف بيها، بس هی دی الحقيقة".

أعطته كوباً من الماء.

- "طب اشرب شوية ميه واهدى".

- "أنا عارف ومتأكد إنک هتمشى ومش هتوافقی نرجع لبعض".

- «احنا أساسًا ما كناش مع بعض».
- «على رأيك، مش هتوافقى نكون مع بعض، بس كان لازم اعترف».
- «ليه لازم؟»
- «يمكن لما تشوفينى ضعيف كده تهدى شوية وتسامحينى على اللى عملته فيك».
- «أنا عمرى مازعلت منك بس هاقولك حاجتين».
- «حاجتين بس قولى إن شالله مليون».
- «لا هم حاجتين، الأولى عايزة اعرف تفاصيل أكثر عن كل حاجة».
- «سهلة والثانية؟»
- «مممكن نبقى مع بعض لو اتحايلت على».

\*\*\*

(دفتر الملاحظات - العقل)

إنجاز جديد وهو ينتصر على كل من توقع فشله، كان قد تخطى جميع المقابلات الشخصية فى إحدى كبرى الشركات دون وساطة من أحد، مرت جميع المقابلات بصورة طبيعية إلا المقابلة الأولى أو اللقاء الأول بينهما حين وجهت إليه سؤال وحاول أن يظهر إمكانياته.

- «تحبى أجابوب بالإنجليزية أم بالفرنسية؟»

لم تبال وهى تطلب منه أن يجيب بأى لغة يفضلها، ولكنها صاغتها بأربع لغات مختلفة بمخارج ألفاظ وتمكن واضح يدل على إجادتها لجميعهم، بدأ إجابته بالإنجليزية وفى منتصف الإجابة حول اللغة إلى الفرنسية، فى هذه اللحظة لم يهتم أن ينجح فى المقابلة أو لا، ولكنه أراد أن ينتصر فى هذا التحدى، ابتسمت وهى تستمع إليه، كان من الواضح أنها موظفة جديدة، فقد كان يجلس بجانبها مديرها ومديره، ولكن قدراتها الخاصة وضعتها فى مكان خاص سريعاً، أبدى مديرهم إعجابه بمعلوماته وإجادته لعدة لغات، غير إنه أعجب بروح التحدى.

كانت هى المسؤولة عن تدريبه، رغم حدوثها فى هذا المكان والتحاقها بالشركة من فترة وجيزة.

- «أنت شاطر ومحدث قال حاجة، بس لازم تتعلم الأول طريقة الشغل، فمن فضلك نهدي شوية».

تقبل كلماتها بصدر رحب رغم إنه فى أى مكان آخر لا يسمح لأى أنثى أن تتحدث له بهذه الصورة ولكنها مختلفة، كان من الواضح أنها من مستوى اجتماعى أعلى منه.

\*\*\*

ترك حلمى القلم كعادته حين يحاول أن يتذكر تفصيلة بعينها، رفض أن يكمل فقد أقسم من قبل إنه لن يكتب هذا الجزء، لا يريد أن يشعر بالإحباط مرة أخرى، كتب هذا الجزء أكثر من مرة من قبل، ولكن فى كل مرة كان يفشل فى وصف حالاتهم، كان يتقزز كلما فكر فى كيف كانا يفكران أو كيف قررا الارتباط، كلاهما كان يتعامل مع الآخر على إنه سلعة.

- «حلمي مالك؟»

- «مركز بس شوية يا حبيبة، في حطة في الرواية معصبانى».

- «خلاص بلاش تحكيها».

كان احتياجه منها محدودًا، أن يرتقى بمستواه معها، وهى كانت تحتاج أن تنجح مع شخص أكثر طموحًا، فقررت أن تنهى علاقتها وقرر أن يقتل علاقتها.

- «أنت بتعيط يا حلمي ليه؟»

- «بيصعب على قوى لما حد يسب حد بيحبه، عشان فاكر إنه هايعيش من غيره أحسن، ومش عارف إنه من غيره أساسًا مش هايعيش».

\*\*\*

(دفتر الملاحظات - الروح)

كان اللقاء الأول في حضور الأسترتين، رفضت اللقاء خارج حدود المنزل كما رفض هو أيضًا، من اللحظة الأولى في لقاء الأسترتين اتضح لوالدتها أن بينهم اختلاف فكري كبير، ولاحظت والدته نفس الاختلاف.

- «احنا طبعًا نتشرف أن احنا نطلب ايد بنتكم، بس حقم علينا إنكم تعرفوا ظروف ابني بالتفصيل».

هنا ابتسمت والدتها فهما الآن على نفس الطريق.

- «لا يا فندم الشرف لينا حضرتك وكفاية تشريفكم بعيدًا عن أى حاجة بعد كده».

ثم بدأت معركة لطيفة بين الوالدين؛ لأنه ببساطة اتضح لهما الاختلاف، أما هما فكانا يتحدثان على مقربة منهم في جو روحاني مختلف.

- "هو أنت حافظة كام جزء؟"

- "١٠ أجزاء بس ٥ كويس جدًا وراجعتهم كذا مرة حفظ".

- "ما شاء الله ربنا يقويك".

- "طب وأنت؟"

- "أنا الحمد لله رب العالمين حافظه كله، ومسمعه على شيخ ودلوقتي يحاول اخذ الإجازة".

- "ما شاء الله عليك".

- "بتحبي بقي تسمعي لمين من المشايخ؟"

- "الصراحة أنا بحب الشيخ يعقوب جدًا، جميل وهادي ومش بتوتر أو أخاف و أنا بسمعه، ومش عايزة أقولك كلامه رباني كثير ازاي".

- "ربنا يثبتك، بس أنا هابقي اجيب لك بقي حاجات تسمعيها لمشايخ تانية".

لم يكن اللقاء طويلاً وإن غلب عليه الطابع الروحاني، وهذا ما قربهما بشدة، ولكن كان لوالدتها رأى مغاير.

- "مش هاتجوز غيره يا ماما".

- "يا بنتي ده بعيد قوى عننا ومش شبهك خالص، وأهله ناس زى الفل بس

برده مش شبهنّا".

- "يا ماما ملتزم ومتدين والصراحة دمه خفيف".

- "أنت لحقتي تشوفي كل ده؟"

- "ايوه، أنت يا ماما بنفسك قلت لي عليه كده".

- "وأنا مش بانكر بس مش شبهنّا، أهله غيرنا طريقتهم غير طريقتنا احنا مختلفين يا بنتي".

- "يا ماما".

- "أنت حرة بس ارجوكي فكري وادى نفسك فرصة تتقابلوا كمان مرة".

احتياجها لمن يدعم جانبها الروحي في هذا التوقيت هو ما جعلها تُصر عليه، أحلام الفتاة الصغيرة قد انتهت، رسمت لنفسها حياة ملتزمة معه، أما هو فكان شغله الشاغل البحث عن كيفية إسعاد زوجته وحكم الدين وواجباته تجاهها نظر كلاهما إلى غرفة وحيدة.

\*\*\*

نظرت حبيبة إلى حلمي.

- "ايه موضوع الغرف ده؟!"

- "كل واحد جوه الورق ده كان باصص في حته واحدة، اللي كان بي فكر في المكان اللي هاي عمل فيه علاقة مع مراته، والثاني كان بي فكر في المكان اللي هيجمع فيه مع ناس من مستوى أعلى أو اللي كان بي فكر في ركن للصلاة".

- "مش عيب طب ما أنا اتجوزتك وعلى طول قاعدة معاك فى "غرفة واحدة" بس الصراحة مالىها على".

- "مش بالمعنى الحرفى يا حبيبة، لازم لما يكون عندك شقة وفيها غرف كثير زى علاقات اجتماعية وروحية وجنسية ومالية وعاطفية، يبقى لازم تفكر فى كل غرفة من دول، وتعرف أنت محتاج ايه فى كل واحدة، لازم نبص لكل الغرف".





(٥)

أصعب موقف

«مصعبتش عليك»

عامر منيب

ألبوم حب العمر - ٢٠٠٣



مصير أم قرار!

- «أنت عارف طبعا يا دكتور أنا باجى هنا من قد ايه».
- «طبعا، ده الشهر الخامس».
- «طيب مافيش حاجة بتتغير».
- «مافيش تغيير من ناحيتك؟!»
- «أنا زى ما أنا وهو الى بقى صعب وبزيادة».
- «طب ليه ماتقوليش أن هو زى ما هو وأنت الى بقيتى أحسن».
- «أنت بتفكر كده ازاي؟»
- ابتسم حلمى حين أكملت.
- «أنا آسفة يا دكتور ما قصدش».
- «لا عادى، بس لازم تعرفى حاجة، الى انهار فى سنين صعب قوى يتعالج فى أيام، احنا عايزين نرجع الرغبة بينكم، عايزك تخليه يحلم بيكى».
- «يحلم بى؟! ماتضحكنيش يا دكتور».
- «هيحصل».
- «خائفة يا دكتور هو مايكمّش».

- "تاني مالناش دعوة بيه، وخائفة أن هو مايكملش، ولا خائفة توصلي لدرجة من الوعى الى تقدرى بعدها تقررى مصيرك بلا ضغوط".

- "أنت على طول بتصدمنى بواقعية كلامك".

- "بصى، بقالنا خمس شهور شغالين عشان تفهمى نفسك، وتعملى صيانة نفسية ليها، وعندى أمل كبير إنك تقدرى وهيحصل".

\*\*\*

انتهت مرحلة المتعة وبدأ واقع يهربون منه يوميًا، يوم جديد ماضى بحت يمر على غادة، بمجرد دخولها اتجهت والدتها إليها.

- "أنا شفت بنت الأستاذ محمود جارنا وهى ماشية مع ولد وماسك ايديها، اياكى تكونى بتعملى كده؟"

- "لا ماتخافيش يا ماما"، وهمست: "وأنت فاكدة أن فى حد أساسًا هيعبرنى".

- "بتقولى ايه؟"

- "ولا حاجة بقولك ماتخافيش يا ماما".

- "طب خلى بالك عشان لو ده حصل اخوكى هيمسح بيكى الشارع متجرجرة من شعرك".

- "يا ماما قلت لك مستحيل وماتخافيش، "ويلا غورى بقى وارحمينى"، هذه الجملة لم تسمعها الأم فقد كانت همسًا.

لم يكدر صفوها سوى هذا الأخ الذى نصب نفسه واصيًا عليها، يتدخل

فى شؤونها الخاصة؁ ولا يظهر بمظهر الأخ الوديع إلا فى الحالات النادرة التى يتحول فيها إلى أكثر الرجال أدبًا حين تأتى إليها إحدى صديقاتها؁ أما والدها فهو بالكاد يراها قبل نومها؁ كان نادر التواجد فى المنزل ولكن للحق كلما أتيحت له الفرصة للحديث معها كان يستغلها؁ يحبها كحبيبة وصديقة ولكنه أهمل هذا الحب لصالح واقع ماذى فرض على تلك الأسرة.

- «عاملة ايه يا حبيبتى؟»

- «كويسة يا بابا بس قول لاختويا يخف شوية؁ لاحسن والله بيزودها قوى وماما كمان ماشية على هواه».

- «هاكلمه حاضر؁ بس لازم تعرفى أن اخوكى راجل وخائف عليكى».

- «يا بابا ايه علاقة الرجلوة بالتهديد؟»

- «عشان لسه صغير ومش فاهم».

- «طب ما أنا كمان صغيرة اشمعنا هو مش فاهم وأنا الى لازم افهم».

- «خلاص يا حبيبتى هافهمه وهاكلمه بس والله أخوك طيب؁ أنت مش عايزة حاجة».

- «لا يا بابا بس كلمه عشان خاطرى».

تعلم أن والدها يحبها ولكن لديها شعور دائم بالنقص؁ كيف يحبها ولا يتواجد بجانبها؁ تركت همومها وهى تخرج الكاسيت الصغير من ركنة خلف سريرها؁ وضعت شريط لراغب علامة هذا المغنى الرومانسى؁ وهو يغنى «مش مهم»؁ وبعد لحظة من البكاء مع «قلت الوداع الحلم ضاع وكل معنى فى قلبى ضاع»؁

أخرجت كتبها وبدأت في مراجعة دروسها.

لم تكن ياسمين تهتم بدراستها، هي تعلم أن مستوى ذكائها أعلى بكثير من أقرانها، وتعلم أيضًا أن والدها سيوافق على طلبها للدخول لأي جامعة خاصة، وكانت أمها تشجعها على هذا وكانت دائمة التردد.

- "باباكي معاه فلوس اطلبى منه الى أنت محتاجاه وماتتكسفيش ده باباكي".

رحل الأب عن الأسرة منذ سنوات إلى إحدى الدول الأوروبية، حاول كثيرًا أن يقنع والدتها أن تعيش معه هو وياسمين وأختها، ولكنها كانت دائمة الرفض بحجة أن بنتيها لا يجب أن ينشأن في مجتمع غربي، الغريب في الأمر أنها كانت تدفع ياسمين دفعًا إلى الفساد الأخلاقي، كانت تهتم فقط بسعادتها هي وأختها دون النظر إلى أى شيء، طالما تحتفظ بنتاها بعذريتهما، لم تمنع تلك الأم أن تترك ياسمين تسافر وقتما تشاء وتعود وقتما تشاء، تركتها لتختلط بأقرانها من الصبية دون حد إلا حد وحيد.

- "ياسمين حافظى على نفسك، اوعى تفرطى يا بنتى فى نفسك لحد، أنت لجوزك وبس".

- "لا يا ماما مستحيل طبعًا".

كانت صدمة ياسمين كبيرة في والدتها بعد ذلك، الأنثى التي تركها زوجها ورحل وهي في أوج أنوثتها، لتخطئ مرة وحيدة مع رجل آخر ولكن لسوء حظها رأتها ياسمين، ولكنها لم تخبرها قط وإن ظلت ذكرى معلقة في رأسها.

مها أيضًا لديها سر تعلمه وحدها، فقد اكتشفت مها أن والدها متزوج بأخرى، ورغم هذا السن الصغير لكنها اتخذت قرارًا بعدم البوح إلى أى شخص، كانت

تشاهد أمها تهان كل لحظة وكانت تحاول هي أن تكون سندها، تحاول أن ترسم البسمة على وجه امرأة قبل أن تكون أمها، احتفظت بها لنفسها بحق حديث يومي مع أمها.

- «عملت ايه فى المدرسة النهاردة؟»

- «زى كل يوم يا مامتى مافيش جديد، هبة وياسمين بيحلوا وغادة عايزة تبقى نجمة وأنا بضحك من المرارة الى جتلى بسببهم والله يا مامتى أنا هاضربهم بالنار هم الثلاثة وارتاح».

- «طب بقولك ايه تيجى نضربهم سوا ونتحبس واهو نهرب من هنا».

ورثت منها خفة دمها منها، رغم كل الهم الذى تتوشح به فى نهارها قبل ليلها حافظت على ابتسامتها وخفة ظلها، ظلت بجانب والدتها كثيرًا حتى اللحظة التى علمت فيها بزواج أبيها، صدمتها لم تضعفها بل كانت أقوى بكثير مما توقعت وطلبت الانفصال، ووقفت معها مع أمها إلى أن استردت كامل كرامتها التى أهدرت على مر سنوات، لم تكن تعلم أنها كانت المصدر الذى استمدت أمها منه طاقتها.

هبة كانت أمها هى مصدر قوتها، تلك المرأة التى كانت تتحكم فى المنزل وكلمتها هى الأولى والأخيرة، استمدت هبة من أمها القوة والثقة، هبة كانت أصغر أخواتها سنًا، وكانت الأم أكثر خبرة وأرادت تجربة أسلوب مختلف فى التربية عن الذى اتبعته مع أخواتها، فقررت أن تكون أقل حدة معها وحاولت أن تكون أقرب لها كصديقة من كونها أم، كانت تعلم أن هبة تخوض تجربة حب ولكنها كانت دائمًا تقول:



- «يا هبة يا حبيبتي أنت هتقعدي وتختارى أحسن واحد فى الدنيا، أنت أميرة شكلاً وأخلاقاً».

هبة شعرت بالتميز داخل أسرتها، فكل القواعد تطبق على الجميع إلا هى، وكانت الأجل بين زميلاتهما كانت تعلم أنها مختلفة.

\*\*\*

أنهى خالد اللقاء مع بنت عمه وهو فى قمة سعادته، أخيراً أصبح مرتبط رسمياً وتمنى لو يخبر أصدقائه عن العلاقة، ولكن شيئاً ما فى صدره جعله يصمت لسنوات، عاد مسرعاً للبيت ليرتب حضورهم قبل أن تصل والدته إلى المنزل، خالد يعيش معها فقط، فالوالد يعمل بإحدى الدول العربية ولا يأتى إلا فى الأعياد وشهر آخر فى وسط العام، غير ذلك تذهب الأم وخالد إليه فى الإجازة الصيفية وإجازة منتصف العام، استطاع ترتيب كل شىء فى وقت قياسي وكان عماد أول الحاضرين، وقف عماد ينظر إلى الشارع من أعلى وهو ينفث دخان سيجارته ومعها لهيب غيظ، فهو لم يستمتع بأميمة رغم أنه ظل بين فخذيهما لساعة كاملة، هو يعشق النوم معها تحت نفس الغطاء، ولكن فكرة أن هناك غيره فى حياتها تشعره بغيرة يرفض البوح عنها، ففى النهاية هى أميمة صديقة الكثير من الطلاب.

- «أنت مش هتشغل الفيلم ولا إيه يا عم؟»

لا يزال خالد فى قمة نشوة الحب ولم يرد عليه، ليعاود عماد.

- «أنت يا عم».

- «إيه عايز إيه؟»

- «أنت مش هتشغل الفيلم؟»
- بعد أن عبر عن اعتراضه بصوت عميق من الأنف كعاداته.
- «أنت مش لسه كنت عند أميمة ايه بلاعة؟»
- «ايه النقى ده يخرب بيت أهلك».
- «اصبر شوية العيال جايه؟»
- «يا عم شريف هيعمل فيها شريف ويلف وشه؟ وواثل هيبقى عايز يروح بسرعة، ما أنت عارفه بيتكسف مننا ومش هينفع.....».
- لم يكمل الجملة إلا والدة خالد تطرق على الباب.
- «ايوه يا ماما عماد هنا».
- «طيب يا حبيبي مش عايزين حاجة؟»
- «لا شكراً، واثل وشريف جاين».
- «ماشى أنا جوه لو احتجت حاجة».
- شريف لا يزال منتشى بالفوز مرتين على واثل وبمجرد أن دخل.
- «الزبون اتغلب مرتين وشال المشاريب».
- «ما أنت على طول بتغلبنى مش عارف فرحان كده ليه، فين الفيلم يا عم خالد مافيش وقت».

- «أنت مسروع كده ليه؟»

يتذكر وائل دائمًا هذا الأب الذى يمارس عليه ضغوطًا كثيرة حتى فى اختيار أصدقائه، ورغم محاولاته المستميتة للبقاء على صداقتهم لصار وحيدًا.

- «يا عم مش عايز أتأخر، الراجل اللى فى البيت ده هيقرف اللى خلفونى، والصراحة كمان أخوكم تعبان».

بدأ الفيلم جلس الجميع على مقربة من التلفاز إلا شريف انطوى فى زاوية، وحاول جاهدًا مقاومة المشاهدة، أخذ يتابع الفيلم خلصة بين الحين والآخر، أشعل سيجارة جديدة فى محاولة أن يفقد تركيزه، فالشهوة بدأت تتمكن منه، على الجانب الآخر لم يتردد عماد فى وضع يديه داخل ملابسه ليقتذف شهوته، أما خالد فلم يهتم لأنه سيشاهده منفردًا بعد رحيلهم، وائل ظل مترددًا هل يفعلها هنا أم يعود إلى المنزل، ولكن ستكون متعة اللحظة قد انتهت، سؤال ظل يتردد فى رأسه إلى أن انتهى الفيلم، وشريف يشرب السيجارة الثالثة، أما عماد فكان يقف ليرتب ملابسه وكأن شيئًا لم يكن.

بمجرد أن رحلوا توجه خالد إلى الهاتف.

- «الو».

- «كان نفسى أنت اللى تردى».

- «يالهو، أنت بتتصل هنا إزاي؟»

- «عادى بكلم بنت عمى».

- «يا سلام».

- "وهو أنت مش بنت عمى ولا ايه؟"
- "خالد أقفل والنبي أنا هاموت".
- "لا ما هو أنت ماردتيش على".
- "اقفل بقول لك".
- "ردى الأول".
- "مش عارفة".
- "طيب ايه؟"
- "مش عارفة والله، هاقابلك بكرة".
- بمجرد أن عاد شريف إلى المنزل وبعد أن ارتدى ملابسه، توجه إلى والده وببلاهة مصطنعة سأله:
- "بابا فى حاجة بيضه كده نزلت ايه دى؟"
- "ادخل استحمى عادى دى طاقة زيادة بس".
- "طاقة زيادة" ظلت تتردد الإجابة فى رأسه وهو يسأل نفسه "هوليه ماشرحليش؟!"

\*\*\*

نظر حلمى إلى بندول ساعته وارتدى نظارته بعد أن أزال ما عليها من غبار، واتجه إلى حائطٍ خالٍ وبدأ فى تثبيت ملاحظات جديدة.

- "بتعلق ايه تانى يا حبيبي؟ احنا قربنا على الصبح".
- "مش عارف أنا".
- "طيب بتعلق ايه؟"
- "دى اللحظة الى ممكن تكون فرقت مع كل واحد فيهم".
- "وأنت عرفت منين بقى؟"
- "كل مشاعر بتأثر فينا فى الحياة لازم تبدأ فى لحظة، وأنا أعتقد إنى لقيت اللحظة دى عندهم".
- "هاتفرق؟"
- "لو اللحظة قدرنا نعالجها حاجات كثير ممكن تتحل".

\*\*\*

خالد

أسوأ درجات الحزن هذا الحزن الذى نُجبر فيه على أن نرسم السعادة على وجوهنا، ولكن هذه السعادة اختفت وهربت دمعة رآها هو وحده وهى تمد له يدها فى حفل زفافه، وتنظر فى عينيه وتسأله:

- "ليه يا خالد؟ ما أنت عارف الى أنا شففته، ما أنت عارف".

انتكست عيناه وهو لا يدري ماذا يقول ولكنها مالت عليه ودون وعى اقتربت من أذنه لدرجة ظن البعض أنها تقبله، وقالت:

- «هنسأك يا خالد، بنت عمك هتنسأك، بس أنت مش هاتعرف تنسانى، والله العظيم ما هتنسانى».

ثم مالت بعدها وقبلت العروس وهى تطلب منها أن تضع خالد فى عينيها وقالت:

- «خلى بالك من خالد، ده أجدع واحد فى العائلة كلها».

ثم نظرت إلى خالد وابتمست ابتسامة ثقة والتى انتهى بعدها الحب من قلبها للأبد.

مها

كان الطريق إلى قاعة الفرح أشبه بطرق سباقات الصحراء، أنت وحدك وحرارة شديدة كان يشعر بها رغم المكيف الذى يعمل على أعلى درجاته والسيارة الفارهة، وبمجرد أن وصل إلى قاعة الفرح اختفى الحضور وبقيت مها أمامه ودمعة حبيسة فى عينيه، نظرت إليه ورفضت أن تخفى ابتسامة رسمها على وجهها من تتمايل بين أحضانه، فهو أحق بالابتسامة عن حزن إشفافاً على ماضٍ رفضها، كان قلبها يُعْتَصِر من الحزن وللمرة الأولى تشعر برغبة فى البكاء منذ أن تركها، فهى تعلم أنها لا تحب هذا الرجل الذى يطوق خصرها بذراعيه وإنما جمعهما الاحتياج.

غادة

كان صيف السنة الأخيرة قبل تخرجها، وكعادتها جلست غادة فى غرفتها الصغيرة وهى تتحدث من هاتفها المحمول وصوت الكاسيت الذى لا زالت تحتفظ به على أقل درجاته، حين سمعت أصوات أصدقاء أخيها فى الخارج، كان الصوت طبيعى

للحظات، ولكنه بدأ يعلو تدريجيًا حتى سمعت صوت صرخ أمها، تملكها الخوف وهي تفتح باب غرفتها وتخرج بملابس نومها لترى أصدقائه سيكون ووالدتها في انهيار ورأتها على الأرض وهم يحاولون حملها وتقول:

- "ليه كده أنت ظالم؟ ليه تاخده ليه؟"

نظرت إلى والدها الذي فقد القدرة على الكلام إلا من جملة ظل يردها وهو ينظر إليها.

- "تصدقى مات يا غادة، اخوكى مات."

لم تستوعب المشهد إلى أن سألت أحد أصدقائه: "فى ايه؟" وهو يرد: "مات، اخوكى مات"، لم تشعر بمثل لتلك اللحظة فى حياتها، وللمرة الأولى منذ زمن بعيد تشعر أنها كانت تحبه، ولم تقاوم يديها وهى تنهال لطمًا على وجهها، ثم تتجه إلى أصدقائه وتضربهم بكل قوة تملكها.

- "موتوا اخويا ليه؟ موتوه ازاي؟ مين موته؟"

مشهد لأم على الأرض وأب يجلس دون حراك، وهو يردد: "اخوكى مات يا غادة"، وأخت تنهال ضربًا على الجميع بيديها وهى تردد.

- "أنا السبب، أنا اللي موته، أنا اللي دعيت عليه."

مشهد ظل يلازم تلك الأسرة فترة طويلة، ويلازم غادة مع شعور بالندم على دعوات كثيرة كانت ترجوها أن يرحل عنها، لم تكن تعنى أن يموت، فقط أن يتركها دون تدخل إلا أن نعمة النسيان التى أنعم الله بها علينا جعلت الحزن يقل مع الوقت، إلا أنها رفضت أن تترك غرفتها الصغيرة وتنتقل إلى غرفته وإن

خف الضغط عليها لتبدأ عادة مرحلة جديدة.

ياسمين

لم يكن هذا الأسبوع أصعب من الأسبوع الذى سبق زواجها حين تحدثت معه.

- "أنت بتتصلى ليه دلوقتى؟"

- "أنا خائفة".

- "بلاش تتجوزى، بلاش ومش عايز اتجوزك بس بلاش".

- "مش هاینفع".

- "ليه؟"

- "مش هاینفع وخلاص".

- "طب تعالى هاتجوزك حالاً، اقسم بالله هاتجوزك حالاً".

كانت تعلم أن اختيارها خاطئ وتدرک جيداً أنها ستندم.

لم يرد على رسائلها بعد زواجها إلا بجملة واحدة، "عيب أنت ست متجوزة".

عماد

- "ممکن طلب".

- "للأسف لا، عشان أنا أضعف من إني أرفض لك طلب، أنا لسه ضعيفة



بجبك، ومش متخيلة حياتي من غيرك، لأنك ببساطه كنت حياتي".

- "أنا عمري ما هاختر حد ....".

- "قلت لك اسكت وسبيني اتكلم معاك للمرة الأخيرة، سبيني اقولك الى أنت ماعرفتوش طول السنين الكثير الى فاتت، ايوه أنا بجبك وايوه استنيت اليوم الى تبوسنى فيه، كان نفسى ابوسك وكان نفسى اكون فى حضنك، كنت بامنع نفسى عنك كل يوم عشان مستنيه استمتع بحضنك فى الوقت الصح، الى احس فيه بجبك، بس واضح انها هتفضل أمنية، أنت النهارده بقيت حلم الطفولة وهحاول ارسم حياتي من جديد".

تركته وللمرة الأولى يشعر عماد بمعنى الفقد.

هبة

فقدت اتزانها مع هذا الشعور بالفقد، لم تعد الأميرة التى تلهب الأبصار ببريقها، لم تعد سوى جسد بلا روح، انقطعت هبة عن عالمها، وظلت حبيسة حزن رفضت أن تبوح به لأحد، ظلت تائهة لسنوات إلى أن تغير كل شىء بعد أول لقاء لها مع إحدى الداعيات أم إكرام كما كانوا يلقبونها، هذه الأم الرائعة التى حاولت بلين أن تُصلح ما أفسدته أسر كثيرة ومجتمع من أخلاقيات وأساسيات الدين، كان هدفها أن تضعهن على أول طريق الإسلام الصحيح، الدين الذى كرم المرأة كما لم يكرمها أحد، كانت تحمل شهادات أزهريّة وأخرى من دول إسلامية وجامعات عن الشريعة والأحكام، متخصصة فى علم النفس وطبيبة بشرية ومع كل هذا كانت ابتسامتها تأسر طلابها، تدريجيًا ومع نصائح أم إكرام بدأت تعود إلى روحها، ومع الوقت بدأت فى نسيانه، ليس لأنها لم تعد تحبه ولكن لأن العلاقة دون زواج حرام شرعًا.

استمعت لمحاضرات كثيرة للشيخ يعقوب، وخاصة وهو يقول: "يا من تبحثين عن الحب يا من تبحثين عن الأمان، يا من من تبحثين عن الاستقرار، يا من تبحثين عن الحياة والسعادة، ومثلها للشباب لن تجدوه إلا بالدين"، ثم يقول: "قال رسول الله صلى الله عليه وسلم: «عليكم بالصدق فإن الصدق يهدي إلى البر وإن البر يهدي إلى الجنة، وإياكم والكذب فإن الكذب يهدي إلى الفجور وإن الفجور يهدي إلى النار». وشيئًا فشيء بدأت تخرج من حزنها إلى أن رحل تدريجيًا من قلبها، وإن ظل ذكرى.

شريف

كانت الخطيئة الأولى في حياته حين مارس معها علاقة جنسية كاملة، عاد بعدها إلى منزل الأسرة ودون أن يلقي التحية على أحد دخل إلى غرفته وأغلق جميع الأنوار ودفن نفسه تحت الغطاء وكل أمانيه أن ينام في أسرع وقت ممكن، خوف سيطر عليه لأيام، أصبح يخشى الضوء حتى ضوء الثلاجة كان يزعجه، رغم هذا الخوف كان في حالة من الدهشة عما بدر منه، كيف استطاعت أن تغويه، كيف استطاعت أن تُقنعه أن يمارس معها علاقة كاملة؟ كيف اقتنع وهي لا زالت على ذمة رجل آخر؟ كيف أقنعتة إنه لا يوجد مجال للعودة إلى زوجها؟ وأنها في أشد الاحتياج له؟ سؤال لا زال مستمرًا معه ويدرك أنه مهما طال الوقت سيقنص الله من فعلته، وظل يستغفر كثيرًا، ولا يزال يستغفر فقد يغفر الله له ويصون أهل بيته.

واشل

- "أنتم بتتصلوا بواشل كثير ليه؟"

كان هذا السؤال ما طرحه والده على أهل فتاة كان قد كتب كتابه عليها وشاءت

الأقدار أن تتوقف الزيجة، ضعف وائل جعله يهرب من المواجهة ولكن كان لا بد للزيجة أن تنتهى، لم يفعل شيئاً سوى أنه وكّل والده لتطبيق تلك الفتاة، ولم يؤثر فيه شيء سوى اتصال منها.

- "وائل أنا عايز اقولك حاجة واحدة بس، الحمد لله أن احنا اطلقنا، عشان الراجل الى مايعرفش يطلق لوحده، اكيد ماكانش هايعرف يتجوز لوحده".

أغلقت الهاتف وأغلق هو بعد المكالمة علاقته بوالده، لأنه أدرك أنه يسيطر على كل حياته، وبدأ مرحلة مختلفة.

\*\*\*

توقف وهو يحاول استيعاب تدفق الأحداث، دقائق عاد بعدها حلمى لقلمه، شيئان من الممكن أن يغيرا حياة الإنسان موقف يمر دون تدخل منا، واختيار بكامل إرادتنا.

وضعت حبيبة كوباً من الشاي أمامه وجلست.

- "وقفت ليه؟ كمل!!"

- "تعبت".

- "لا أنا عايزة اعرف التفاصيل كلها لما كبروا، هم فضلوا اصحاب البنات والولاد وحصلهم ايه؟"

- "هم ماكانوش اصحاب وهم صغيرين".

- "ماكانوش أصحاب، ازاي يعنى؟!"

- "ايوه هم الثمانية عمرهم ما كانوا أصحاب، بس قصصهم كانت شبه بعض، وكل واحد فيهم كان عنده اصحاب شبه باقي شخصيات روايتنا".

- "أنا مش فاهمة حاجة، ومش هاعرف أكمل وأنا مش فاهم حاجة".

- "ياسمين وهبة وغادة ومها وهم صغيرين عمرهم ما عرفوا بعض، بس كل واحدة فيهم كان عندها شلة فيها باقي الشخصيات، يعنى هبة كان ليها شلة فيها بنت شبه ياسمين وشبه غادة وشبه مها".

- "يا سلام!"

- "والأولاد كمان كل واحد كان له شلة وكل شلة كان فيها نفس الأربع شخصيات".

- "نعم".

- "اه يا حبيبة شخصياتهم هي أبطال الرواية مش أسمائهم، الأسماء دي حروف بتتكتب على ورق جنب صورة، عشان نفرق بين بعض، إنما الأهم شخصيتنا من جوه، مشاعرنا وكل إحساس مر بينا ومرنا بيه".

ثم وضع حلمي رأسه بين يديه وهو ينظر إلى الأوراق المعلقة أمامه ودفتر ملاحظاته وابتسم.

- "هم ما كنوش أصحاب وهم صغيرين يا حبيبة، بس اتجوزا بعض لما كبروا".

(٦)

ذكريات

"الى جرحى"

شيرين عبد الوهاب

ألبوم لازم أعيش - ٢٠٠٥



لساكِ كلمة بتتنطق إعجاز بين أمنيات.

انتهت مرحلة المدرسة، وما أن بدأت الدراسة الجامعية حتى صار لقائهم مقتصرًا على أيام الإجازات وانتهى لقاءهم اليومي إلى الأبد، وبدأ جميعهم في البحث عن واقع جديد مع أصدقاء جدد، والبحث عن بداية جديدة لمشاعرهم لكنهم بقوا أصدقاء لذكريات لا يمكن أن تُمحي.

وضعت حبيبة كوب الشاي على منضدة أمامها وقالت:

- "حلمي، ايه الحب؟"

- "مالوش وصف".

- "ازاي!!"

- "الحب فعلاً مالوش وصف ولا ينفع أقول لك الحب هو كذا، الحب يا حبيبة مرتبط بالشخص، عامل زى الجين اللى فى خلايانا بس جين موجود فى أرواحنا، كل واحد له صفات حب مختلفة، ومش بس الجين اللى مؤثر فى فهمنا للحب كمان المواقف اللى عشناها، خليط من روحنا والواقع اللى عشناه".

- "يعنى ممكن فهمى للحب يختلف مع كل موقف اعيشه؟"

- "فى ناس يا حبيبة بتقول الحب هو الصبر، وناس بتقول الحب تضحية أو اهتمام، وناس بتوصف الحب باللحظة اللى قلبك يدق فيها ونفسك يقف وتبقى عامل زى السكران ومش شايف غير اللى أنت بتحبه، غيرهم يقولوا إنه الإخلاص، الناس بتحب حسب تجاربهم".



- "وايه فيهم الصح؟"

- "الحب له مليون معنى وكلهم صح، المهم ازاي بنحب".

- "تاني إزاي بنحب؟"

- "ايوه يا حبيبة، الحب حالة بيقررها اللي بيحب تكون ازاي، وأي جزء جوانا نحب بيه".

- "يعني ايه أي جزء؟"

\*\*\*

حاول شريف أن تكون المرحلة الجامعية بداية مختلفة لمشاعره، التحقت عادة بنفس الكلية، وبحكم الشبه بين شريف وأخيها المتوفى اقتربت منه حتى صار كلاهما لا يفترقا، صباحًا في المحاضرات، ويمتد الوقت بينهما في حل الملازم أو مراجعة بعض المواد، كان قلب شريف يتحدث وكان اشتياق عادة إلى أخيها هو الذي يدفعها للتقرب منه، إلى أن قرر قلب شريف الاعتراف.

\*\*\*

- "شريف، عندي سؤال مش المفروض إني أسأله، بس أنا لحد دلوقتي مش عارف أنت بتيجي ليه؟"

نظر من أسفل نظارته وهو يبتسم:

- "أنت زهقت مني يا دكتور حلمي؟"

- "لا خالص، بس أنت كان عندك مشكلة واحدة، ودي ماخدتش وقت كثير

عشان نحلها».

- «تعرف يا دكتور، أنا باجى عشان ماعنديش حد اتكلم معاه».

توجه حلمى إلى ثلاجة صغيرة.

- «أنت عندك أصحاب كثير على حسب ما فهمت من كلامنا، تحب تشرب ايه صودا ولا عصير؟»

- «عصير ماشى».

وقف شريف بجانب حلمى ثم بدأ فى الحديث.

- «عندى كثير، بس أنا بخاف أحكى لحد أى حاجة، طول عمرى بحس إني لو اتكلمت اصحابى هتتريق على، طول عمرى بحب وأنا ساكت، ولما حبيت واتكلمت اتوجعت قوى فبطلت أتكلم، بطلت تمامًا».

ضحك ضحكة وحيدة بصوت وأكمل.

- «ولما اتجوزت بقيت اخاف اتكلم لأغلط ومراتى تحسب الغلطة على، كثير قوى يبقى نفسى أكلم حد ماعرفوش وأحكى له حاجات كثير وماشوفوش تانى».

- «عشان كده أنت دائمًا جواك كلام، بس تعرف يا شريف أنا عمرى ما حسيت إنك مش واثق فى نفسك، وموضوع مراتك ده إتحل من فترة».

- «أنا برسم الثقة يا دكتور، برسمها بس».

- طب المرة اللى جاية تحكى أكثر

- مش هحكى ممكن أبقي أكتب

\*\*\*

جلس شريف وحيداً بعد أن نامت زوجته، أخرج حاسبه المحمول فى هدوء وتلفت وبدأ فى الكتابة بعد أن تابع وميض المؤشر للحظات.

غادة كانت أول قصة حب، كنت أعلم عنها الكثير بحكم صداقة طويلة جمعتنا، بعد عامنا الأول فى الكلية تغيرت كثيراً ولم تعد تلك الفتاة صاحبة الوزن الزائد والجيب الطويل والكوتشى، أصبحت الفتاة الأجل بين شلتها - كم تتبدل الأحوال-، لكن كان التغير ظاهرياً فقط، فلا زالت تحلم بقصة رومانسية، واستمر هذا الحلم رغم أنها الآن "المزة" غادة لقبها التى تستمتع به ولكن حلمها لم يتحقق بعد، كنت أنا وغادة صديقين مقربين لدرجة أن ظن البعض أن هناك علاقة بيننا، وكنا دائمي النفي إلا أن كل شيء تغير فى لحظة.

- "غادة أنا عايزك فى حاجة".

- "أنت مالك رسمى كده!! فى ايه يا شريف؟"

أشار إلى أبعد مكان داخل الحرم.

- "لا عادى، تعالى بس نقعد شوية هناك".

- "تعالى".

حاولت جاهداً أن تكون اللحظة رومانسية، اخترت غروب الشمس وبقعة بعيدة عن أعين الجميع، وباقة صغيرة من الورود أخفيته بصعوبة، حاولت أن أرسم حلمها، جلست جانبها قدر المستطاع وأخذت نفس عميق، ودون

مقدمات استجمعت شجاعة لم أعدها من قبل :

- «غادة أنا بحبك».

- «ايه؟!»

وقفت وعلى وجهها علامات دهشة لم أرها من قبل، ولكنى أكدت لها:

- «بحبك، اقعدى بس».

- «شريف إحنا!! أنا وأنت أزاى يعنى!»

فكت رباط شعرها وحاولت أن تلم شعرها بكلتا يديها.

- «والله حاولت ومش قادر».

- «شريف ماينفعش»، قالتها وهى تحاول لم شعرها.

- «ليه!!»

- «شريف أنت اخويا، وأنت عارف إنك زى اخويا بالظبط».

تابعت تفاصيل وجهها وأنا أتحدث دون رهبة:

- «أنا عرفتك قوى وحاسس ببيك جدًا، وعارف قد ايه أنت رومانسية ونفسك فى علاقة تكون كده، وعارف إنك مش هترتبى غير بواحد بيبحك وأنا يا غادة بحبك جدًا وفوق ما تتخيل، أنا بحب اشوفك واكلمك وابص عليك، وبحب احساس الحب وأنا بحبك، غادة أنا بعشقتك ماينفعش نبقى اخوات».

- «مش عارفة اقولك ايه على الكلام الجميل ده كله، بس شريف أنا، أنا مش

بجبك!!

لم أسيطر على نفسي وأنا أرتل عليها قصيدة كنت كتبتها على الرغم من أنى لا أجيد الشعر، حتى أننى لم أسمعها وهى تقول: "أنا مش بجبك"، كانت كلماتها رقيقة ولكن امتزجت كلماتي بدموعها، للمرة الأولى أصبح بهذه الجراءة، لم يكن ينقص المشهد سوى أن أحضن يديها، أن أشعرها بهذا الدفء الذى يخرج من داخلى، أن تشعر أنها تمتلكنى ولكن عدت هذا الفتى الجبان وصمت وتركتها حتى تهدأ.

توترت الجلسة بيننا، حاولتُ احتواء الموقف، وحاولتُ أن تنهى اللقاء وكأنه لم يحدث، ولكن محاولتنا بائت بالفشل كفشلها فى أن تعيد شعرها على ما كان عليه.

- "خلاص يا شريف بقى أنت عارف، أنا ماينفعش اكذب عليك واقولك هافكر وكده، أنا وأنت ماينفعش نكون مع بعض".

حاولت أن تنهى حرارة المشهد ولكنى كنت قد رحلت محملاً بخيبة أمل وجرح ازداد يوماً بعد يوم، كنت أتساءل دوماً ألم تحلم عادة بمشهد كهذا طوال حياتها لماذا رفضت إذا؟!!

نظر شريف إلى شاشة الحاسب وعاد بظهره إلى الوراء، حاول أن يستعيد عادة من ذاكرته، على الرغم من مرور أعوام على هذا اللقاء إلا أن عادة تركت له شيئاً لم يمحى الزمن، أخذ نفساً عميقاً ثم عاود الكتابة.

مها لم تتغير مثل عادة، وظلت صاحبة الابتسامة والروح الأجل، وبقيت على مبدئها ورفضت فكرة الارتباط، حتى خالد الذى حلمت به منذ صغرها رفضته كثيراً ليس هو وإنما العلاقة، كانت ترى أن الارتباط نشوة لحظية تختفى

مع الوقت، أو علاقة محكوم عليها بالفشل بحكم تجارب صديقاتها، ظلت متحفظة في علاقتها بخالد ولكن تحت إصراره ومصارحته لوالدتها وافقت على الارتباط وإخفاء الأمر عن الأسرتين إلا من والدتها، وبدأ أن نهراً من الحب قد انفجر، حتى أصبحت تهتم بأدق تفاصيل حياته، كانت تحبه لدرجة أنها عاشت تفاصيله حتى صار قلبها تفصيلاً في حياة خالد.

- "خالد أنا قلت لماما إني نازلة اشترى حاجة وراجعة على طول وماقلتلهاش إني نازلة اشوفك".

- "أنت بتضحكي على حماقي، طب لما نتجوز يا مها هاقولها".

لا زالت تخجل عند كلمة زواج، تلفتت رغم علمها أنه لا يوجد أحد جانبها ومسكت سماعة الهاتف بكلتا يديها.

- "مممكن تحلف بحياتي إنك هاتسمع كلامي؟"

- "ما أنا بسمعه على طول".

- "أحلف".

- "والله هاسمع".

- "الساعة دلوقت اربعة ممكن نتقابل كمان ساعة؟"

انتهت المكالمة لتلتقي به، ولم تمر الساعة إلا وهي أمامه.

- "بص أنت حلفت إنك هاتسمع كلامي".

وضع يديه على كتفها.

- "قولى بقى فى ايه؟"

أزاحت يده وهى تتلفت حولها وتبتسم خجلاً.

- "أنا بقالى شوية باحوش عشان كنت ناوية اجيب البدلة الى هتخطبنى بيها هدية، بس الصراحة الشركة الى أنت رايحها كبيرة زى ما أنت فهمتنى".

- "مها، ماينفعش فلوس لا".

- "أنت حلفت بحياتى".

- "يا مها بس....".

مسكت يده وبدأت فى السير.

- "مافيش بس، أنا معايا ألف جنيه".

توقف ووقف أمامها وهو ممسك بيديها.

- "بشرط".

- "كمان هتتشرط".

- "اوه".

- "اشرط يا سيدى".

- "توافقى ابوسك يوم الخطوبة".

مر الوقت سريعاً ولكنها اختارت الشكل الذى حلمت به، بدلة سوداء ورباط

عنق أزرق بلون أفتح من لون السماء لحظة صفائها، وقميصين واحد للمقابلة والآخر للخطبة، وبقي مبلغ صغير كان يكفي لشراء ساعة شكلها لا يوحي بأنها صينية المنشأ.

ساعة أخرى كانت هدية هبة لعماد بمناسبة عيد مولده، وإن كانت هذه ساعة يتعدى ثمنها الآلف جنيه، في إحدى كافيهات الزمالك جلست هبة في أبهى صورها تحتفل بعيد ميلاد عماد بمفردهما قبل أن يحتفلا في اليوم التالي مع أصدقائهم، طقوس خاصة يتبعانها منذ المرحلة الثانوية حين بدأت علاقتهما.

- "كل سنة وأنت طيب يا حبيبي، ممكن تفتح الهدية؟"

- "دلوقتي؟"

- "اوه".

فتح الغلاف ثم أبدى اندهاشه وهو يرى نفس الساعة التي أعجب بها معها من قبل.

- "و أنت طيبة، بس الساعة دى غالية جدًا".

- "مافيش حاجة تغلا عليك، تعرف امبارح كنت قاعدة كده بافتكر أول مرة كان عيد ميلادك واحنا في ثانوى فاكر عملت ايه فيه؟"

- "لا مش فاكر!!"

- "لما خرجت مع البنت دى الى كنت مصاحبها قبل ما تحبنى".

أشعل سيجارة وهو يضع يديه أسفل ذقنه.



- «ايه الى فكرك بيها دلوقتي؟!»

- «لا بجد كان اسمها ايه؟ كانت ملزقة جدًا فظيعة مش ممكن».

- «أنت عايزة تتخانقي؟»

- «لا والله يا حبيبي أنا بس باهرج وكنت قاعدة امبارح نفسى افكر اسمها».

- «ياسمين، كان اسمها ياسمين وماتفتحيش الموضوع ده تانى، عشان أنت وبس الى فى حياتى وأنا عمري ما خنتك».

أشارت هبة إلى مدير المحل لتدخل تورتة كبيرة محاطة بعمال الكافية، واهتز المكان «سنة حلوة يا جميل سنة حلوة يا جميل»، لتختلس هبة لحظة بين هذا الصخب لتقول: «كل سنة و أنت حبيبي»، ليرسل لها قبلة فى الهواء، كانت من المرات القليلة التى توافق أن تركب معه فى سيارته بمفردهما، كانا على وشك إعلان خطبتهما رسميًا، فقد التقى بوالدتها وكانت باقى الترتيبات مجرد مسألة وقت، بمجرد أن ركبت معه فى السيارة رن هاتفه المحمول ليسمع صوت إحدى صديقاته على الطرف الآخر، يستطيع هذا الفتى أن يسيطر على مشاعره سريعًا.

- «ايه يا عماد أنت فين؟»

- «أنا فى الزمالك».

- «ايه ده أفكرتك هتكذب، طب أنا راكنة وراك، انزل لما اسلم عليك وابوسك ولا بطلت تتباس؟»

لم يتوتر عماد هو لم يتوتر قط فى حياته، نظرت هبة إليه.

- «في ايه؟»

- «لا يا حبيبتي ولا حاجة، دى واحدة معنا فى الشغل شافتنى وهى معدية وكانت بتروش يعنى، بقولك هنزل اجيب حاجة من شنطة العربية».

- «ماشى».

خرج من السيارة وفتح الشنطة لتحجب الرؤية عن هبة ثم نظر خلفه.

- «ايه يا بنتى أنت فين؟»

- «أنا عايشة أنت اللى بطلت تكلمنى، مين معاك؟»

- «واحدة صاحبتى كنا قاعدين مع جماعة صحابنا جوه».

- «صحابتك ماييخلصوش، لولا بس أن احنا فى الشارع والله كنت حضنتك».

- «لا هاكلملك أنا بليل ونتقابل نحضن زى ما أنت عايزة».

لقاء لم يتعد الخمس دقائق استطاع أن يسيطر على انفعالاته وتمر كأن شيئاً لم يكن.

توقف شريف عن الكتابة وهو ينظر إلى صورة والده وسرعان ما توالى الكلمات أمامه.

\*\*\*

نظرت حبيبة بدهشة

- «هو عماد كان مصاحب ياسمين صاحبة هبة، الاثنين فى نفس الوقت يعنى؟»

- «أنا مش قلت لك يا حبيبة هم عمرهم ما كانوا أصحاب، بس البنت الملزقة اللي ما كنتش عاجبة هبة دى كانت شبه صاحبة عمرها، بس احنا بنحب و بنكره على حسب الموقف، أحنا بنحب ونكره نفس الشخصية فى نفس الوقت عشان الموقف».

\*\*\*

واشل لا يمتلك تلك القدرة على التحكم فى قرارته أو انفعالاته، يتحول وجهه إلى اللون الأحمر ويفقد القدرة على التركيز بمجرد أن يشعر بأى ضغط، والده كان أحد أهم الأسباب التى فقد بسببها القدرة على التحكم فى انفعالاته، بمجرد أن تخرج من الكلية قرر والده أنه سيتزوج وعلى الرغم من رفضه لفكرة الزواج إلا أن والده أصر على اختيار عروسًا له، كانت مها ابنة صديق له، فتاة جميلة أعجب الأب بها وقرر أن يخطبها لوائل، أصبح خاضعًا لسيطرة والده حتى فقد القدرة على الرفض، لم تعلم مها بهذا اللقاء سوى صباح نفس اليوم، تحدثت مع خالد مباشرة.

- «خالد عايزة اقابلك».

- «دلوقتى؟»

- «يا ريت».

- «بقولك ايه أنا جنبكم نص ساعة كده واجى، هو مال صوتك خايف كده فى ايه؟»

- «لما تيجى».

مرت النصف ساعة وكان خالد ومها في الشرفة كعادتهما.

- "جايلي عريس النهارده".

- "أنت اتجننتِ ولا ايه؟"

- "بابا لسه قايل لى فى حد هاييجى النهارده، غالبًا يتفرجوا على".

- "يتفرج عليك!! بقولك ايه احنا فيها أنا هاخرج أقوله".

اقتحمت والدته مها المشهد وهى تعلم عن ماذا يدور الحوار.

- "أنتم عاملين موضوع ليه؟ دى حاجة بسيطة جدًا، هو عمك بس الى ماقلش غير النهارده والناس جاينين النهارده، ما أنت عارف عمك مش بيركز فى الحاجات دى".

- "طب ينفع احضر معاكم؟"

- "مايصحش يا ابنى".

كان الحوار أكثر ندية مع وائل.

دخل والد وائل الغرفة بعد أن طرق الباب دون انتظار رد كعادته.

- "فضى نفسك بكرة، انزل هات بدلة على حسابى".

نظر وائل إلى والده وهو يجلس أمام حاسبه الآلى:

- "ايه عندنا فرح؟"

- «هانشوف عروسة».

- «عروسة!!»

وقف ليعترض ولكن قاطعه كالعادة:

- «أنت كبرت خلاص واحنا رايمين نقابل الناس بكرة».

كان الحوار يبدو هادئًا بين وائل ووالده لكنه كان مليئًا بغضب داخلي، على الجانب الآخر كان الحوار أكثر هدوءً بين مها ووالدتها بعد أن رحل خالد وهو يستشيط غضبًا.

- «ما تخافيش يا حبيبتى هنلاقي سبب ونرفضه».

جلست مها على سريرها.

- «أنا خايفه يا مامتي لبابا يحكم دماغه».

- «لا يا مها ما تخافيش ده كان زمان، بس لازم نقابل الناس عشان بابا إدهم كلمة».

- «ماما أنت عارفة...»

- «خلاص قلت أنا هاتصرف».

لا يستطيع وائل الرفض كان يحدث نفسه: «لا مش معقول بقي كده حرام، حتى الجواز هاتحكم فيه»، ورغم اعتارضه إلا أن اللقاء تم،

في تمام السادسة وصل وائل ووالده، وكانت مها لا تزال على سريرها، لم ترد

سوى جينز وشعرها حجمته برباط شعر.

- "بسم الله ما شاء الله".

ابتسامة بلا روح كانت الرد على والد وائل.

- "أهلاً يا عمو".

نظر وائل إلى والده ومها:

- "أهلاً وسهلاً".

اعتدل والد وائل في جلسته وهو يربت على ظهر وائل.

- "يعنى أنت عندك بنوتة زى القمر كده ومانعرفش؟"

ثم نظر لوائل.

- "ربنا يجعلها من نصيبك".

نظرت مها إلى والدتها بدهشة حين طلب منها والدها الجلوس مع وائل منفردين، فأشارت لها بالموافقة برأسها.

- "ازيك يا مها عاملة ايه؟ تحبى تشربى حاجة؟"

واستمر مسلسل الابتسامات السخيفة من مها.

- "لا أنا تمام، أنت شربت حاجة؟"

- "والله بيتك ومطرحك اجيب لك ايه؟"

توجه وائل إلى السفرة ووضع كأسين من العصير، وعاد وهو يحملهما وهو يصطنع خجل البنات وهن يقدمن القهوة، ضحكت هذه المرة فهذا ما يجيده وائل، التفت الجميع لهم وكان أول رد فعل لوالد وائل.

- « على بركة الله نقرأ الفاتحة بقي ».

لتتدخل الأم:

- « لأ حضرتك لازم نستنى لما البنت تفكر وناخد رأيها ».

تغير والد مها كثيراً، لم يقاطع زوجته، فبعد أن اكتشفت الأم زواجه بأخرى ووقفت مها بجانبها لحظة أن طلبت الانفصال، وكادا أن ينفصلا لولا أنه اكتشف كغيره من الرجال حقيقة ما كان يملكه بعد فقده، وظل عامًا كاملاً يحاول استعادة العلاقة حتى نجح ولكن الأم أصبحت أقوى الآن.

- « خلاص هنتظر رأى بنتنا فى وائل، وإن شاء الله خير ».

- « كلك ذوق حضرتك وإن شاء الله نشوف رأى البنت ونتكلم ».

غادر وائل وترك والده متجهًا إلى القهوة محملاً بلا مبالاة ونشوة إضحاك إحداهن.

لم يتوقف شريف عن الكتابة، والصمت يخيم على المكان حوله، وتوالت الأحرف سريعًا عندما بدأ فى الكتابة عن ياسمين.

توقفت ياسمين عن الضحك وأغلقت المكاملة سريعًا بمجرد أن فتحت باب الشقة، وهى تستمتع إلى صوت آهات مكتومة، توجهت مباشرة إلى غرفة أختها ولكن الغرفة كانت فارغة، والصوت يخرج من حجرة والدتها، نظرت خلسة

داخل الغرفة وهى تضع يديها على فمها خشية أن يخرج منها صوت، كاد قلبها أن ينفجر من نبضاته المتلاحقة، وهى ترى رجلاً عارياً لم تكن المرة الأولى التى ترى فيها رجلاً بهذه الصورة، ولكنها كانت المرة الأولى التى ترى فيها والدتها عارية تماماً، وكلماتها التى ظلت تلقنها لها طوال حياتها، "حافظى على نفسك"، توقفت أنفاسها وهى ترى أمها تتلوى تحت هذا الرجل، وهو لا يتوقف عن التهامها، لم يخرج منها صوت ولكن خرجت دموع من عينيها، امتزجت مع ضحكات أمها وصوت هذا الرجل: "أنا ما كنتش عارف إنك جامدة كده"، والأُم ترد تحت تهديد جسده: "وأنا كان واحشنى الاحساس ده قوى"، خرجت ياسمين من الشقة واتصلت بعماد.

- "أنت فين؟"

- "أنا فى البيت".

- "فى حد معاك؟"

- "لا، أنا لوحدى".

- "طيب أنا جايه أبات عندك".

\*\*\*

تركت حبيبة الغرفة لدقائق وعادت فى يديها بعض السندويشات ولكن قبل أن تضعها أمامه.

- "حلمى هو أنت مش قلت انهم مش أصحاب؟"

- "أه".



- «طَب أنتِ ليه بتستخدم نفس الأسماء، ليه ماتغيرهمش؟»
- «عشان عمر الأسماء ما كانت مهمة».
- وضعت أمامه ساندوتش وكوبًا من العصير.
- «أنا عرفاك يا حلمى وعارفة إني مش هاوصل لتفكيرك بس هاحاول».
- ابتسم حلمى.
- «أنت دماغك أكبر منى بكثير».
- «طَب سؤال كمان، هم كل واحد فيهم كان عنده نوع واحد من الحب؟»
- «كل واحد فيهم مر بكل أنواع الحب، حب القلب، والعقل، والروح إلا عماد وياسمين».
- «قصداك الاثنين الى مش مضبوطين دول؟»
- «أه».
- «ازاى بقى؟»
- «النوع ده بيبكون عايز يعيش الحب بكل أنواعه، رومانسى لدرجة إنه بيخاف حد يشوفه كده، عشان دى أضعف نقطة وشهوانى لدرجة أن الشهوة بتتحكم فيه، هو أكيد مش مبرر لتصرفاتهم بس هم عايزين يحبوا بكل تفاصيلهم يحبوا بقلبهم وروحهم، بيحبوا بكيانهم بس تعرفى أن الجزء الوحيد الى استخدموه قدام الناس فى الحب كان عقلهم، عشان كده كل علاقاتهم الى كانت فى النور فشلت.

\*\*\*

قارب العام الدراسى ٤٠٢٠-٥٠٢٠ على الانتهاء، وإن كانت لقاءاتهم قليلة ولكن مستمرة، حافظوا على صداقاتهم ولكن كان جميعهم فى مرحلة التغيير، فى نفس الغرفة التى التقين فيها لسنوات، كانت عادة تحاول تشغيل أسطوانة مدمجة كتب عليها أجمل أغانى التسعينات، قطعت محاولاتها ياسمين.

- "سيبك من البتاع ده دلوقتى، الكحل الأسود ده حلو؟"

نظرت عادة إليها.

- "ياسمين الاسود مبقاش موضة، الموضة دلوقتى الكحل الألوان والرموش كمان".

التفتت عادة على صوت هبة التى أغلقت للتو مكالمة مع عماد.

- "أش، أش، أش، وبتكلم فى الموضة كمان".

أخرجت ياسمين لسانها لهبة وهى تقول:

- "خليكى أنت متابعة عماد وسيبيننا نتابع احنا الموضة".

وقفت عادة بثقة لم تكن تعهدها من قبل فى هذه الغرفة، وكادت أن تتحدث ولكن قاطعتها مها:

- "حلاوتك يا عادة يا جامد، بس هو أنا مش متابعة الموضة، كده أنا ابقى ايه؟"

جلست ياسمين على قدم مها.

- "تصدق بلبسك ده تنفعى تبقى صاحبي".
- أزاحت مها قدمها فسقطت ياسمين على الأرض.
- "يالله يا بت يا قليلة الأدب، صاحبك ولا صاحبتك".
- ضحكت هبة بصوت مرتفع.
- "ايه يا ياسمين أنت بقى ليكى فى كله؟"
- نظرت إليهم ياسمين.
- "الله يخرب بيتكم، بت يا غادة احط الروح الأحمر".
- "بقولك ايه، اقعدى أنا هاعمل لك المكياج اقعدى".
- كانت هبة تنظر باستغراب إلى التغيير الذى طرأ على غادة، ومها تمارس عاداتها فى تحويل كل شىء إلى سخرية وهى تقول:
- "الله عليكى يا غادة يا كايداهم".
- رحلت مها وهبة وبقيت غادة وهى تضع المكياج على وجه ياسمين، باتت العلاقة بينهما أقرب، اهتمامات غادة وياسمين أصبحت متشابهة، انتهت غادة وجلست على السرير.
- "بقولك ايه يا ياسمين ما تشغلى اى حاجة".
- "مالك مش عجبانى".
- "مافيش".

- «انجزى، بلاش تحوير».
- «شريف».
- «الواد الى لازق لك ده؟»
- «مش لازق، احنا أصحاب جدّا».
- جلست ياسمين جانبها.
- «طيب ماله صاحبك جدّا ده؟»
- «قال لى إنه بيعبنى».
- «يا فرج الله، أخيراً».
- «قصدك ايه؟»
- توجهت ياسمين أمام المرأة وهى تحاول شد حامل صدرها على أضييق وضع له.
- «أنت يا بت مش عايزة حد يجبك وتحبيه».
- «ما هو أنا ... بحب حد تانى ... أسمه وائل».
- «عملتى ايه مع سى وائل ده ولا حاجة، صح؟»
- «صح».
- «يبقى جربى».
- «لا ما هو أنا قلت له إنى مش بحبه».

- "أنت هبلّة، ما تجربي، حب ايه!"
- ضمت قدمها إلى صدرها واحتضنتها.
- "مش بحبه يا ياسمين، شريف زى أخويا عمرى ما تخيلت نفسى وهو ماسك ايديا أو حاطة راسى على كتفه، لا، لا، مش بحبه".
- "يا عبيطة جربي".
- "هاخسر الحلم الى طول عمرى حلمت بيه".
- "هتعيشى وتموتى هبلّة".
- "شريف محترم وجدع".
- نظرت ياسمين إلى غادة وهى تحدث نفسها: "أنا طول عمرى نفسى اصاحب حد محترم، ولما حبيت واحد مش عايز يعبرنى"، قطعت غادة تفكيرها.
- "روحى فين؟"
- "لا مافيش، أنت وراكى حاجة".
- "لا، أنا كنت بجرب بس الميكب اب الجديد".
- "طيب هبات معاكى".
- "باقى".
- رفعت غادة سماعة التليفون لتخبر والدتها أنها ستقضى ليلتها مع ياسمين.

\*\*\*

وقف شريف منتظرًا بقيتهم قبل صلاة الجمعة عند مسجد قريب من صالة  
البياردو التي جمعتهم كثيرًا، اعتادوا اللقاء في هذا التوقيت حرصًا منهم على  
إبقاء علاقتهم مستمرة، كان أول من وصل خالد أشعل سيجارة ونظر إلى شريف.

- «ايه الى في ايدك ده؟»

ابتسم شريف ابتسامة ثقة.

- «أنا جبت هارد جديد».

- «حطيت عليه حاجة؟»

- «حطيت طبعًا، بس مش عايز يتملى دول ٢٠ جيجا».

- «يا ابن اللعيبة، في أفلام؟»

- «لسه جايب شوية امبارح».

وصل واثل على حديث الأفلام.

- «لا ماتقولش إنك جبت أفلام جديدة».

احتضن شريف الهارد.

- «اه، فيه فيلم بتاع الممرضات الى أنت كنت هتموت عليه».

- «حلاوتك يا شريف يا مظبطنا».

حاول وائل أن يطبع قبلة على وجه شريف في لحظة وصول عماد.

- "في ايه مالكم؟"

نظر وائل إليه.

- "لا مالكش دعوة أنت بتطبق عملي".

ابتسم عماد ابتسامة لم يعلم وقتها هل كانت غرور أم ثقة أو ربما ندم، قاطعهم خالد:

- "يلا نصلي ونروح على القهوة".

ما أن انتهت الصلاة إلا واتجه شريف إلى خالد ليسيرا بعيداً عن وائل وعماد.

- "عامل ايه مع مها؟"

- "كويس".

- "قلت لحد ولا لسه؟"

- "رافضة أى حد يعرف أنا مش عارف ليه! أنا بفكر اروح اقول لعمرى واخلص الموضوع بقى".

- "يمكن عايزة تستنى لما تخلص الكلية".

- "مش عارف لها حاجة، أنت ايه اخبار البت اللي بتحبها دى؟"

- "لا خلاص فكك".

- «ازای یعنی؟»
- «یا عم فکک أنا مش بتاع الكلام ده».
- على الجانب الآخر كان عماد يتحدث مع وائل:
- «أنت يا وائل مش هتصاحب، ياد ده أنت خرجت معايا مليون مرة وما فيش مرة شبكت».
- «أنا ما ينفعش اصاحب يا عماد».
- «ليه إن شاء الله!»
- «عشان هابقى زى زيها».
- «أنت مخبي علينا حاجة ولا ايه؟»
- قالها وهو يشير بأحد أصابعه، قاطعه وائل بسباب:
- «لا يا اهيل، قصدى إن ابويا قرفنى فى موضوع المواعيد، تخيل بقى هى تكون بتعرف تخرج أو تطلب منى نخرج، واقولها اصل ابويا مخرج عليه، فبلاش قلة قيمة لحد ما أشوف للرجل ده حل».
- «والله أنت اللي عامل فى نفسك كده، هى مرة واحدة اعمل فيها اللي أنت عايزه وواجهه ونخلص».
- «بخاف يا عماد، بخاف ومش عارف ايه السبب!»
- «ايه هيموتك يعنى؟»



- "لا مش الفكرة، هو عمره ما ضربني بس مش عارف ليه الخوف ده، كان نفسى اكون باسمع كلامه عشان بحبه مثلاً أو احترام أو حتى عشان ابويا، بس كل ده بخ مش موجود، ما عنديش احساس قصاده غير الخوف".

- "ياد أنت هتتخرج خلاص ولسه بتخاف؟!!"

- "ما عرفش بقى".

كان مقهى الصعيدى على بعد دقائق ما أن وصلوا حتى نادى عماد على سيد:

- "يا سيد هات حته امسح الطرايزة، وهات دستة "كوتشينة" وورقة وقلم".

\*\*\*

(حلمى وحببية)

حلمى هو جزء من روايتهم هو صديقهم جميعاً، الصديق الذى فقد فى شركاء حياتهم هو حلم السعادة، هو لحظة المتعة وونحن نزيح همومنا عن كواهلنا، هو الصديق الذى ربما نصحنا بنصيحة غيرت مسار حياتنا، أنا حلمى ولكن لم يكن حلمى يوماً أنا.

تزوج حلمى من حبيبة بعقله فى لقاء عائلى وتعارف أشبه للصورة المعتادة من جواز الصالونات، لم تلفت حبيبة نظر حلمى ولا العكس لم تشعر حبيبة وقتها أنه من الممكن أن يشاركها العمر، ولكن كانت المعادلة حسابية بين الأسرتين، ولم تتطور العلاقة بينهما ما قبل الزواج، حتى أن المرة الأولى التى يداعب فيها حبيبة كانت بعد زفافهم، كانت زيجة تقليدية مرت أيامها الأولى بدفعة من متعة الاكتشاف وبدا أنهما فى حالة حب، ومع الوقت انتهت المتع

حتى متعة الاختلاف فُقدت، أصبحا اثنين لا يجمعهما سوى سرير في لحظات التنفيس عن رغبات مكبوتة، مرات ليفرغ شهوته وأخرى لتشعر أنها لا زالت أنثى، انفصل عالم كل منهما عن الآخر، هو يقارن جميع نساء الأرض بها وهي تشك أنه يجب أخرى، ظل يقارنها بأخريات وظلت تندم على الزواج منه.

بعد سنوات ليست كثيرة من زواجهما دار هذا الحوار قبل نومهما، حاول حلمى مداعبة حبيبة قبل النوم ولكنها دون سابق إنذار أزاحت يده وأنارت الغرفة ونظرت إلى حلمى.

- «أنا عايز أقول لك حاجة».

- «خير».

- «ماتيجى نطلق وكفاية كذب؟»

- «نطلق، أنت عمرك ماجبتي سيرة الطلاق، وجاية تطلبى الطلاق دلوقتى ازاي يعنى؟»

- «عشان أنت هتطلقنى».

- «لا طبعاً!! مافيش بينا أى مشاكل».

- «بلاش نكذب على نفسنا».

- «نكذب فى ايه بس؟!»

- «حلمى أنا وأنت أتجوزنا بمعادلة حسابية واحنا عارفين ده، حسبناها كويس بس تعرف بعد سنين جوازنا دى اكتشفت أن الجواز مالوش حسبة، مالوش

أرقام ثابتة نخطها على ورق عشان نضمن إننا نكون مبسوطين، أنت مش مبسوط معايا.

- "ماتقوليش حاجة على لسانى".

- "لا أنت مش مبسوط، عشان أنا بشوف حزنك مع كل واحدة بتبص عليها".

- "تانى موضوع الخيانة وإنى اعرف بنات؟"

- "ممكّن الخيانة تكون بالعقل، واحنا اتجوزنا بعقلنا مش بقلبنا، فامينفعش اعيش معاك والحاجة الوحيدة اللى بيننا مش موجودة".

- "هو أنت جايبة الكلام ده منين؟"

- "تانى، اقول تانى، الحسبة طلعت غلط، وأنا بشوف حزنك فى كل واحدة بتشوفها، وبشوف حزنك ولمعة عينيك وأنت قاعد لوحذك، ممكن أكون غلط بس ده اللى أنا حساه".

ترك حلمى الغرفة غاضبًا وهو يردد:

- "أنا مش عارف هاخلص من الجنان ده أمتى؟ مش عارف ارضيكي ازاي؟"

وقفت حبيبة على باب الغرفة.

- "الى بيحب حد بيعرف يرضيه ازاي، أنا قدام اختيار من اتنين نكمل عشان شوية حاجات أو نسيب بعض ونكمل بعاد عن بعض ويبقى لينا حياة".



٧

تفاصيل

"بعيش"

تامر حسنى

ألبوم عينا بتحبك - ٢٠٠٦



النسيان هو أقصى مراحل الألم.

بعد انتهاء المرحلة الجامعية،

الساعة الواحدة صباحًا، رن هاتف شريف المحمول.

- «الومين؟»

- «عايز اشوفك دلوقتى».

- «فى ايه يا خالد مالك؟»

- «هاعدى عليك نلف بالعربية شوية».

- «يا ابن الجزمة الساعة ١».

- «هتنزل ولا لا؟»

- «هاقوم البس، أنت فين؟»

- «أنا تحت البيت مستنيك».

مرت عشر دقائق كانت كافية أن تثير أعصاب خالد.

- «ايه يا شريف كل ده؟ بقولك عايز أتكلم».

غضب لم يعهده من خالد.

- «فى ايه يا عم أنت! هم عشر دقائق».



نظر شريف لخالد في مدة زمنية أقل من الثانية أدرك أن هناك كارثة.

- «مالك؟»

- «أنا هاسيب مها».

- «أنت أهبل ولا مجنون ولا شارب الخرى اللي بتشربوه ده؟»

- «مش بهرج، أنا هاسيب مها».

- «أزاي؟»

- «هاسيبها، يعنى هاسيبها».

- «وهى عرفت؟»

- «لا».

نظر شريف من شباك السيارة،

- «طيب مدام بتعيط كده يبقى بلاش جنان».

- «بجبها مجنون يا شريف بس مش متخيلها تكون مراتي».

- «لا جنان مش عايز، أنت مش كنت بتقولى إنك بتعمل المستحيل عشان تتجوزها».

- «اوه».

- «ايه الى حصل؟»

- "لقيتها مش مناسبة".

- «يا سلام فجأة كده لقيتها مش مناسبة، بعد اكثر من عشر سنين حسيت إنها مش مناسبة؟»

— «مش ھتفہم».

- «ليه شايفنى غبي، أنت لقيت شغلانة كويسة ومستويات أعلى طبعًا، وسوق بالراحة هتموتنا».

- «شششششششش، بلاش عبط هو ايه الى مستويات؟!»

— «امال ايه؟»

- "قابلت واحدة ثانية".

وضع شریف یدہ علی جہتہ.

– "قول کده".

- "واحدة معايا فى الشغل فيها كل حاجة حلمت بيها فى بنت".

- «كل حاجة حلمت بيها في بنت!! ومها كانت ايه؟»

فرمل خالد بقوة ونظر بغضب إلى شريف،

- "مها ماحلمتش بيها، مها كبرت جوه قلبي، مها ماخترتهاش الى اختارها قلبي وأنا كنت صغير، مها كبرت جواه كبرت كثير وعارف إني هتوجع".

ارتفع صوت شريف أكثر،

- "أنت بتقتل نفسك يا خالد فوق، دى مش حاجة لازم تكسبها، مش لازم تبقى على الشعرة زى كل حاجة تانية".

- "أنا هاسيب مها وهاتجوز ياسمين يا شريف ده قرار".

- "ياسمين!! مش عارف ليه حتى الاسم مش لايق عليك يا اخى".

- "شريف أنا رايح بكره أتقدم".

- "ده أنت واخذ القرار طب بتكلمنى ليه؟"

أشعل شريف سيجارة بينما أخذ خالد سيجارة وداعبها بين أصابعه منذ فترة كان قد ألقع عن التدخين بسبب مها ولكنه وضعها فى فمه.

- "تعرف يا خالد لما حببت غادة، البنت الى رفضتنى دى، كنت مستعد أعمل المستحيل عشان توافق، كنت مستعد إنى اتذل قدمها"، أخذ نفس من السيجارة وأكمل: "هو أنا فعلاً اتذليت وكنت مستعد لأى نوع من أنواع التضحية عشان ترضى، ولما رفضت تعبت وتعبت جامد قوى، بس عشان ماكانش بيننا حب يوم بعد يوم عرفت اعيش، بس فى حالتك دى بقى أنت هتموت، عشان مها كبرت جوه قلبك والحل الوحيد أن قلبك يفضل عايش هو إنك تفضل مع مها".

- "أنا اخدت القرار وسيبك من الروايات الى أنت عايش فيها".

- "ما أنا عارف إنك اخدت القرار، بس أنا بقول لك عشان فى يوم هافكرك ولو تحب اكلم مها".

- "لا، هى هاتعرف لوحدها".

\*\*\*

- "حلمى هو لو كان خالد و مها اتجوزا تفتكر كانوا هايعيشوا مبسوطين؟"
- "مافيش قاعدة ثابتة يا حبيبة، بس على الأقل كان زمان قلبهم لسه عايش".
- "تفتكر؟!"

\*\*\*

- نامت ياسمين على الشيزلونج ولكن حلمى لم يهتم بهذه المنحنيات التى ظهرت،
- "ياسمين أنا عايز اشوفك مبسوطه".
- "صعب يا حلمى تشوفنى مبسوطه عشان الذكريات بتوجع".
- "أنت ممكن تنسى الذكريات بس بشوية خطوات صعبة".
- "مش هاقدر".
- نظر حلمى إلى الحائط فى اتجاه إحدى شهاداته.
- "ابدئى أنت بس".
- "حلمى، الذكريات بتوجع وبتسيب جوانا علامات مابتتنسيش".
- "لو عشت الحاضر هتنسى الماضى".
- "ولو عشنا ألف حاضر مش هتنسى، الألم الى جويا سيبه إنى يحاول أنسى

ومش هـيـحصل ، مش هـانـسى".

وميض المؤشر على شاشة الحاسب الآلى يتوحد مع دقات قلبها وجفنى عينيها ونقر أصابعها على الطاولة، ياسمين لا تعلم كيف تحولت إلى هذا الكائن الأنانى، أخذت نفس من سيجارتها ثم بدأت فى الكتابة.

\*\*\*

جلس شريف يتابع تدفق زملائنا فى العمل منتظرًا قدومى، لم يستطع رؤيتى طوال أسبوعين، الفترة التى قضيتها مع أمى فى المستشفى، تحملت مسؤوليتها بعد زواج أختى وغفرت لها المشهد الذى علق بذهنى لسنوات وهى بين أحضان رجل غريب، وزرعت مبررات واهية داخل عقلى لتقبل فعلتها، حتى وصلت إلى قناعة أنها لم تكن مخطئة، تركها أبى وهى أنثى وكانت أنوثتها تصرخ كل ليلة منفردة، أنا لا أمتلك الحكم على أحد ولا حتى على أمى، فى تلك الفترة فقدت اهتمامى بنفسى وازداد وزنى بشكل ملحوظ، ومع غياب هذا الأب والذى تتلخص علاقته بى باسم مكتوب بعد اسمى فى البطاقة، تحملت وحدى الحفاظ على مستوى أسرتى المادى، والذى حافظت عليه أمى لسنوات، ولكن مرضها منعها من الاستمرار فكان على أن أحمل هذه الراية.

فى أول حياتى المهنية كنت ما أزال أتمتع بإغراء حافظت عليه سنوات عمرى، وعلى أن أعترف أننى استخدمته لأصل إلى ما أريد، هذا السلاح الذى نجح لسنوات، أصبح لى راتب كبير ليس لكفائى الوظيفية فحسب، ولكن أيضًا لكفائى كائننى أعلم نقاط ضعف الرجال، ومع مرور الوقت أصبحت ما كنت عليه فى تلك الفترة وفقدت جسدى وأصبحت بدينة، شريف كان الوحيد الذى استطاع أن يرى ملامح شخصية واريثها لسنوات خلف جسد أنثوى صارخ،

لم يهتم بالوزن أو يعقب على شكلي، كان اهتمامه مُنصبًا على شخصي وشخصي فقط، والحقيقة مع افتقادي للمشاعر وافتقادي للنظرة التي لم أعد أراها في أعين الرجال؛ لم أنظر إلى الفوارق المادية أو الفكرية بيننا، ولكن كان هناك إصرار من جانبي أن تبقى العلاقة في الخفاء دون تحديد موعد للإعلان عنها، حاول شريف كثيرًا أن يخفي مشاعره أمام زملائنا، كان ينجح أحيانًا ويفشل كثيرًا ولكن بمجرد أن وصلت توجهه إلي، ولكن سبقه عماد صديقي القديم وإن تخطينا حدود الصداقة أحيانًا عندما كنت في كامل لياقتي، نظرت إليه مشيرة أن ينتظر حتى لا تُفضح مشاعره أمامه، لم يكن عماد وشريف سوى زميلين يجمعهما نفس المبنى، رحل عماد بعد نصف ساعة كاملة.

- "ايه هو كان بيعمل ايه كل ده؟؟"

- "قصداك عماد !! احنا اصحاب من زمان ما أنت عارف، في ايه؟!!"

- "مافيش بس عايز اكلكم، وحشتيني دول أسبوعين".

- "معلش والله غصب عني".

- "طنط اخبارها ايه؟"

- "تعبانة".

- "طيب ممكن اجي ازورها النهارده؟"

- "تنور أي وقت، بس ماتفتحش أي مواضيع".

- "و ده ظرف حد يتكلم فيه ماينفعش".

شريف يجعلنى ابتسم وأتحول معه إلى شخصية لا أعرفها وإن كنت أستمتع بها، رغم اختلاف فترة مراهقتنا، واختلاف طباعنا لكن شريف بفطرته استطاع أن يأخذنى إلى موضع لم أعتد عليه، أشعر فيه أن لى روح وجمال داخلى أو بالأصح أشعر أننى شخصية محترمة، دائماً ما كان شريف جانبى رهن إشارتى يلبي قبل أن أتمنى، على أن أعترف أننى أحببته، ولكن ذلك لم يكن يكفينى، أنا لم أعتد على المشاعر فقط، أنا امرأة كاملة وهو بعيد كل البعد عن كمالى، ولكنى حاولت أن أعطيه ما أستطيع.

- «شريف أنا هاقدم فى شركة جديدة».

- «ليه يا بنتى؟»

- «وهقدم لك معايا، أنا معايا ال CV وهابعته».

- «كمان؟!»

لم يكن متحمساً للفكرة وكان واضحاً جداً أثناء المقابلة عدم اهتمامه وتم رفضه وقبولى، كانت لحظة فارقة فى حياتى أنا، وخالد، ومها، وشريف.

\*\*\*

كانت اللحظة التى قرر فيها خالد أن أولويته فى الحب نابعة من عقله، وأن عليه التنازل عن حب قلبه، وكانت تلك اللحظة هى لحظة تنازله عن الحياة مقابل المادة.

- «حلمى هو ياسمين وخالد اتجوزوا؟»

- «للأسف».

- "ازای! ده بیحب مها، أنا حسیت بالحب ده لما راح لها أول مرة عند المدرسة واعترف بحبه".

- "ما هو حب القلب مش كل حاجة".

- "طب، هو شريف وخالد مش أصحاب. ازای شريف بيحب ياسمين وخالد اتجوزها؟"

- "انسى الأسامى، انسيها".

- "طيب".

- "خالد وياسمين هم جزء العقل فى دفتر الملاحظات ده، الاثنين اتجوزا بعقلهم وكانوا عايزين جوازهم ينجح بقلبهم".

\*\*\*

أشعلت ياسمين سيجارة واستمرت فى الكتابة،

لم تسمع مها عنه منذ أكثر من شهر، هى المرة الأولى التى يغيب فيها كل تلك الفترة، حتى أن آخر لقاء عاشلى لم يتواجد فيه، بدأ القلق يقترب من تلك المنطقة بين الثقة والشك، ولكن ظل قلبها يؤكد استحالة ما يدور فى عقلها، إلى أن كانت المكالمة التى فقدت بعدها مشاعرهما.

- "ألف ألف مبروك يا أبو خالد، الواد خالد راجل ويستاهل كل خير".

تابعت المكالمة بكامل حواسها وهى تحاول أن تحللها، هل وفق فى الحصول على تأشيرة للولايات المتحدة! هل خاف أن يخبرنى لأنه يعلم برفضى للفكرة!



هل قدم دون علمي! ألف سؤال بدأ يتسرب ولاحظت والدتها كم الدهول في عينيها حين قررت أن تقطع هذا الشك باليقين.

- "خير ماله خالد؟"

- "الواد خالد خطب".

صمتت الأم للحظات ثم رددت:

- "خالد هيتجوز! هو خالد هيتجوز؟"

نظرت مها إلى والدها وحاولت رسم ابتسامة وهي تخفي دموعها وتحاول أن تسيطر على قشعريرة تسرى في جسدها.

- "بجد يا بابا هو خالد هيتجوز؟"

نظر الأب إلى وجهها وهو يحاول أن يفهم هذا التعبير.

- "اه، عمك لسه قايل لى أن فرحه كمان شهر، هم لبسوا الدبل من أسبوع".

بصوت مخنوق وهي تضغط على شفتيها وتحاول احتضان نفسها بيديها.

- "من أسبوع، مبروك".

توجهت مها إلى غرفتها، لم تستطع الأم النظر إلى عينيها، حاولت فقط احتضانها، حاولت أن تعطيها دفء مشاعر، بعد أن بات جسدها ينتفض من برودة الموقف، تمنّت أن تراها تبكي أو تصرخ، أغلقت الباب ولكنها كتمت مشاعرها وتحولت ملامحها إلى ملامح أقرب للتماثيل النحاسية، مها لم يهتز لحنها رمش، رفضت أن تبقى بين أحضان أمها حين توجهت إلى باب المنزل.

- «رايحة فين يا بنتي؟»

فتحت الباب ودون رد تركت المنزل، شعرت باحتياجها للهواء، للحظات ظنت أن حضن والدتها يخنقها أو يبقّيها مغلولة، بقيت لساعات تتجول بين الطرقات وسؤال وحيد يتردد داخلها: «ليه يا خالد ليه؟ أنا عملت فيك ايه؟، ده أنا كسرت كل قواعدى عشانك، أنا رفضت الارتباط عشان ما اتكسرش، ليه يا خالد؟ أنا ماعملتش فيك حاجة وحشة ليه؟ ليه يا خالد؟ امتي يا خالد عرفتھا؟ عرفتھا وأنت معايا ليه؟!» لم يرد عليها سوى صوتھا: «أنت اللى عملتى كده فى نفسك لما وافقتى»، وبدأ حوار بينها وبين نفسها.

- «أنا بفكر اكلمه».

- «لا طبعا، هتكلميه ليه إن شاء الله الكلب ده؟»

- «بس هو مش كلب وأنا بحبه والله بحبه».

- «ده راح خطب، ده باعك».

- «عايزة أعرف أنا غلطت فى ايه؟!»

- «بتلومى نفسك ازاي يا مجنونة أنت؟ ده أنت كنت قايد له صوابك شمع، ده كلب وستين كلب كمان».

- «لا، اكيد كان فى حاجة غلط».

- «بطلى تلومى نفسك، بطلى».

- «أنا مصدومة والله، مصدومة هو عمل كده ليه؟ ده حتى ماقلش نسيب

بعض، ايه احساس العجز الى أنا فيه ده؟ ليه مغلولة كده؟ طب اروح له؟  
اشتمه؟ اضربه أو اتف في خلخته؟»

- "بطل اجمدى بقى، ده مش راجل ولو راجل بجد كان على الاقل قال لك نسيب  
بعض، مش راجل، فاهمة، مش راجل".

ظلت تحدث نفسها لساعات ولم تجد سبب وحيد لفعلته، ظلت في صراع  
نفسى حتى كان فرح خالد، واستمر الصراع في الحضور من عدمه إلى أن جمعتهم  
عيناهم بعد انقطاع طويل، اندهشت منها من هذا الفرع الصاخب، لا يجب  
خالد هذه النوعية من الأفراح، اختفى اندهاشها وتوقف الصراع النفسى حين  
التقطت يدها وهى تسترد روحها من يده هذه المرة، وبابتسامة قوة أتت من  
ضعفها، مالت عليه حتى ظن البعض أنها تقبله

- "مش هسأل عملت كده ليه، بس أنا هنسأك وأنت مش هتعرف تنسأنى،  
والله العظيم مش هتنسأنى".

لم يرد خالد إلا بابتسامة محاولاً إخفاء حسرة مكبوتة، في دمعة رفض أن يطلق  
لها العنان، مالت مها على ياسمين لتقبلها.

- "خلى بالك من خالد، ده اجدع واحد في العائلة كلها".

تابع شريف المشهد وهو لا يدري ماذا يفعل إلا أنه توجه لمها.

- "مها، أنا شريف فاكرانى؟"

- "اه، ازيك؟"

- "أنا آسف إني ماقدرتش اغير قراره".

- "كويس إنك ماقدرتش".

فقدت مها اتزانها مع توالى الأحداث، لم تواجه هذا الكم من الفشل طوال حياتها ولم تكن ضعيفة، كان أقصى مراحل ألمها وهى تحاول أن تنسى خالد، لكن رغم شخصيتها المتفردة إلا أنها فقدت السيطرة على مشاعرها، ومع كل يوم مر كان يزداد انهيارها، ولم يكن هناك بديل إلا الموافقة على واثل.

- "يا بنتى بلاش تغلطى".

- "يا مامتى مش فارقة وأنا تعبانة قوى وعاييزة اخرج من اللى أنا فيه".

- "ماينفعش تخرجى بعلاقة ثانية".

- "واثل شكله كويس ودمه خفيف، ده مستنى ردى من فترة وأنا محتاجه حد زى كده يمكن اخرج يمكن انسى، أنا مش متخيلة يا ماما إنه مع واحدة ثانية دلوقتى والله مش مصدقة والله".

لم يكن هناك أحد يعلم بتلك العلاقة سوى مها وخالد ووالدتها، كانت مها تحتاج شخص تبكى له ولكن لسوء حظها إنه لم يكن هناك أحد تشتكى إليه.

أرسل والد مها بالموافقة لوالد واثل، وكانت الخطبة فى المنزل، كانت ملامحها تكتسى بانكسار حزين، تتابع الأحداث أرهقها فاشتربت أن الحضور يقتصر فقط على الأسرتين ودون الأصدقاء، اندهشت مها كثيرًا وهى ترى واثل صامت وبلا رأى فى لحظات الاتفاق ما قبل الفاتحة، لم يبد أى تعليق على والده، كانت مها تناقش والده بنفسها فى الوقت الذى كان يجلس كضيف، وحين انتهت الخطبة أخبرته والدها عن ضعف شخصيته، حاولت أن تخرج من العلاقة ولكن انكسارها كان أقوى فاستسلمت لرد والدها.

- "لا يا بنتى شخصيته مش ضعيفة، ما شاء الله الولد بيكبر باباه ولد مترى".

كشفت الأيام غير ذلك فى اللحظة التى طلب منها والد وائل أن يجلسا بمفردهما.

- "هو أنت ليه مش بتقعدى مع وائل لوحدهم؟ ده أنتم بحكم المتجوزين يا بنتى".

- "أنا أسفة يا عمو، بس ايه دخل حضرتك؟ وائل ما طلبش ده منى".

- "أنت إزاي تكلميني كده؟"

- "الى هو ازاي يعنى كده؟ هو وائل ما عندوش لسان يطلب؟ وائل المفروض جوزى هو الى يطلب".

تابعت والدتها المكالمة.

- "أنت بتكلمى حماكى كده ليه؟"

- "مش هيبقى، ماتخافيش".

- "نعم، أنت قصدك ايه؟"

- "مش هكمل مع وائل ده".

- "يا بنتى أنت مكتوب كتابك".

- "مش فارقة، مافيش حاجة فارقة يا ماما".

صُدمت الأم بعد أن فقدت معها حياتها، وُصِدمت معها من هذا التدخل، حاولت

الاتصال بوائل كثيرًا لتنهى العلاقة، إلى أن رد والده عليها:

- «أنتم بتتصلوا بوائل كثير ليه؟»

كان هذا السؤال ما طرحه والده على مها، ضعف وائل جعله يهرب من المواجهة ولكن كان لا بد للزيجة أن تنتهى، لم يفعل شىء سوى أنه وُكِّل والده لتطليقها ولم يؤثر فيه إلا اتصال من مها.

- «وائل ازيك؟»

- «ازيك يا مها؟»

- «مستغرب إني بكلمك؟»

- «أنا مابقتش استغرب اى حاجة فى حياتى».

- «أنا عايز اقولك حاجة واحدة بس، الحمد لله إن احنا اطلقنا، عشان الراجل الى مايعرفش يطلق لوحده، اكيد ماكانش هايعرف يتجوز لوحده».

- «عندك حق، يمكن فى يوم اقدر اعتذر لك».

- «مش عايزة اعتذار، أنا بس حبيت افهمك».

- «يمكن فى يوم أقدر أفهمك بس والله أنا مش وحش، بس أنا لا كان لى رأى فى الجواز ولا فى الطلاق».

توقفت ياسمين قليلاً عن الكتابة، ولم تتوقف دموعها حين أدركت أنها كانت سببا فى كثير من الآلام، لم تتوقف عن التهام سجائرهما وهى تعاود الكتابة.

لم تكن هبة ترى سوى عماد في حياتها، هبة كان لها تأثير كبير عليه، عماد كان قبلها شخصًا وبعدها شخص آخر، كانت تمتلكه وكان شابًا وسيماً، كانت محظوظة به وكان محظوظ بعلاقتهما، تغير كل شيء حين رأتني معه، وكأني تتبع كل خيط حتى رأت ما غضت بصرها عنه، رسائل وبريد إلكتروني بيني أنا وعماد، هذا ما جعلها تواجهه بالحقيقة.

- "عماد مين ياسمين؟"

- "ياسمين مين؟"

- "أرجوك يا عماد رد على، مين ياسمين؟"

- "مالك يا هبة في ايه؟"

حاولت جاهدة ألا تبكي وهي تفرك يديها بقوة.

- "مين ياسمين يا عماد؟"

- "هبة، في ايه يا حبيبتي؟"

- "ياسمين دى صاحبك القديمة؟"

- "...".

- "بتكلمها من امتي؟"

توتر عماد ربما للمرة الأولى في حياته.

- "...".

- "رد على".

- "دى اشتغلت معايا فى الشركة بالصدفة".

- "وبالنسبة للإيميلات الى أنا قريتها دى ايه؟"

- "إيميلات ايه؟"

أخرجت من حقيبتها ورق مصور.

- "دى، عماد أنا فتحت الإيميل بتاعك، عرفت كلمة السر بسهولة قوى، وقرأت كل الرسائل بينكم وفيها رسائل حب ورسائل قلة أدب، وفيهم إيميل يا عماد بتقولها مش مهم هبة دلوقتى، أنا مش مهم أنا يا عماد؟ جالك قلب تقول أنا مش مهم؟"

- "يا هبة، أنا غلطت".

- "تعرف المشكلة فى ايه؟"

- "مين قال أن فى مشكلة؟"

- "مممكن تسمعنى من غير مقاطعة لو سمحت؟"

- "ايه الرسمية دى؟"

- "قلت لك اسكت واسمع".

- "حاضر".

لم تتمالك نفسها أكثر من هذا وتركت لدموعها المجال لترسم أكثر مشهد



حزين مر على عماد، وعلى هذا الكافيه الذى جمعهم لسنوات.

- «المشكلة بيننا إنك راسم لنفسك حلم معايا، حلم بس إنما أنا رسمت معاك حياة، رسمت حياتى معاك دلوقتى وقبل كده وبعد ٢٠ سنة ولحد آخر يوم فى عمرى، رسمت صورتى معاك وأنا كبيرة وعجوزة وحلفت إني هاخليك دائماً مبسوط، كنت أبص على اى اثنين متجوزين واقسم بينى وبين نفسى أن حياتى هتكون اسعد منهم كلهم، أنا عارفاك كويس أنا عشت مع حبك من ساعة لما كنت فى المدرسة، كبرت معاك وأنت كبرت جوايا وحببت كل حاجة فيك، الوحش فيك قبل الحلوى، أنا أول مرة افكر كده بس أنا كبرت يا حبيبى، واسمح لى أقولك يا حبيبى لآخر مرة».

حاول عماد أن يمسك يديها ولكنها سحبتها سريعاً.

- «طب مدام بتحبينى، ارجوكى ساحبينى، غلطة».

- «للأسف المرة دى مختلفة، المرة دى أنت مشاعرك راحت لواحدة ثانية، أو عشان اكون صريحة مع نفسى أنت حببت واحدة معايا، يمكن أنت كراجل تقدر تعمل ده بس أنت كنت مختلف، أنا كنت مؤمنة بيبك قوى، أنا أول مرة فى حياتى من يوم ماعرفتك احس إني روحى مش معايا، احس إني مخنوقة ومخنوقة قوى كمان».

- «مممكن طلب».

- «للأسف لا عشان أنا اضعف من إني أرفض لك طلب، أنا لسه ضعيفة بحبك ومش متخيلة حياتى من غيرك، لأنك ببساطة كنت حياتى».

- «أنا عمرى ما هاختر حد ولا..، بطل عياط».

شاركها عماد دموعها.

- "اسكت وسيبني اتكلم معاك للمرة الأخيرة، سيبني أقول لك الى أنت ماعرفتوش طول السنين الكثير الى فانت، ايوه أنا بحبك وايوه استنيت اليوم الى تبوسنى فيه، كان نفسى ابوسك وأنا عارفة إنك بتبوس غيرى، وكان نفسى اكون فى حضنك، كنت بامنع نفسى عنك كل يوم، عشان مستنيه استمتع بحضنك فى الوقت الى احس فيه بحبك بس واضح انها هتفضل أمنية، أنت النهارده بقيت حلم الطفولة وهاحاول ارسم حياقي من جديد، هاحاول".

- "هبة أنا، ماينفعش، ماينفعش تسيبيني، هبة أنت أنت، أنا مش عارف اقولك ايه!"

- "عماد ممكن ماتعيطش، عشان خاطرى".

- "طيب مش هاعمل كده تانى والله العظيم، بس بلاش يا حبيبتي بلاش".

- "تفتكر أن دى أول مرة اعرف حاجة واسامحك بعدها، لا يا عماد كان فيه بس دى كانت الأخيرة، لازم يبقى فيه محطة أخيرة نقف فيها، أو مرحلة نعيدها، كنت مستنيه اننا نتجوز عشان نبدأ رحلة جديدة فى حياتنا بس شكل الموضوع مستحيل، على قد ما بحبك وبجنون يا عماد ولسه بحبك ومش عارفة هابطل امتى احبك، بس خلاص مش هينفع".

- "هبة، هانتحر".

- "وتفتكر أنا عايشة، أنا انتحرت لما قررت إني اسيبك".

- "بحبك".

- "وأنا مجبك بس مش بإيدى والله".

- "أنا هاروح اطلبك دلوقتى من باباكى".

- "هارفض يا عماد، ارجوك بقى كفاية لحد كده، كفاية".

توقفت ياسمين قليلاً عن الكتابة لتهدأ قليلاً وعادت بعد أن شربت فنجان قهوة.

صدمة عماد لا تختلف كثيراً عن صدمة غادة بعد أن صدت شريف، بعد فترة التقت بشريف صدفة وهو يجلس معي، لم تكن غادة ارتبطت حتى ذلك الوقت، ولم تتردد كثيراً وهي تتوجه إليه.

نظرت غادة باندهاش.

- "شريف ازيك؟"

نظر شريف فى ذهول لغادة وتذكر لقائهما الأخير.

- "غادة احنا مش أصحاب زى ما أنت قلتي؟"

- "طبعاً يا شريف أنت اللي بعدت".

- "مش مهم بعدت ولا لا، المهم شكلك بقى وحش قوى، خلى بالك على منظر".

- "أنت بتقول ايه؟"

- "غادة الموضوع باين قوى وأنت بتجربى وراه".

- «ورا مين؟!»

- «غادة، كل أصحابنا بيترقوا عليك من ضهرك، عشان الولد الى اسمه وائل، وأنت بتحاولى تكونى معاه على طول، وبتجرى وراه».

- «شريف، مافيش حد يبحب حد يقول له الكلام ده!»

- «أنا خايف عليك».

- «شريف أنت مش فاهم، أرجوك المرة دى ياريت مانتكلمش تانى خالص».

توقف وميض المؤشر قليلاً، وفتحت ياسمين علبة سجائر جديدة وخلعت آخر ما ترتديه، ولم يتبق سوى ملابسها الداخلية، وعادت للكتابة.

عاد شريف سريعاً إلى أرض الواقع، لم يقف وإنما اكتفى برد التحية، ثم وجه نظره إلى.

- «ياسمين، خطيبتى».

لا أعلم لماذا وصفنى شريف بخطيبته رغم أن اللقاء كان لأخبره بغير ذلك، كانت الصدمة الثانية التى يتعرض لها حين أخبرته أننى سأتزوج، صدمة كانت كافية أن يستعيد معها حزن علاقته بغادة، دون سابق إنذار أنهيت علاقة الحب الوحيدة التى عشتها بصدق، لكن المدهش إنه رغم صدمته قرر أنه لن يكرر خطأه حين ترك غادة ترحل، ولم ييأس ظل يحاول أن يثني عن قرارى، ومارس كل أساليب الضغط على، ظل يلح، حاول جاهداً أن يعيدنى إليه لكنى رفضت كل محاولاته، لم يكن شريف يدرك أن طموحى لا يتوقف، لم يدرك أننى لم أكن مستعدة أن أخسر حلمى بالارتباط برجل وسيم وطموح،

أنا ياسمين رجال كثر توقفوا أمام أنوثتي، ولم أكن لأقبل أن تنتهي حياتي مع شريف، وعلى الرغم من كل هذا، كان داخلي صراع كبير بين زواجي وشريف الذي لم يجد مبررًا لإصراري على الزواج، إلى أن تبقت أيام على زفافي.

- "أنت بتتصلي ليه دلوقتى؟"

- "أنا تعبانة يا شريف وخايفة".

- "بلاش تتجوزى خالد ده، بلاش ومش عايز اتجوزك، بس بلاش".

- "مش هاينفع".

- "ليه؟"

- "مش هاينفع، شكل بابا وماما هيكون وحش قدام العائلة".

- "بابا! أنت من أمتى بتهتمى ببابا؟"

- "ده برده أبويا".

- "ياسمين أنا مستعد أتكوزك دلوقتى حالا، وأفتكرى كلامى ده، الى أنت بتعمليله ده غلط، وغلط كبير قوى".

\*\*\*

- "هو أنا ليه حاسة يا حلمى أن فيه تفاصيل ناقصة؟"

- "تفاصيل!! زى ايه؟"

- "يعنى ليه خالد ساب مها؟ وليه ياسمين سابت شريف؟"

- "عشان هم نفسهم ماكنوش عارفين هم بيعملوا كده ليه، لو كانوا فكروا  
ماكنوش عاملوا كده، فى ناس بتخاف لما يكون الحب أكبر منهم، خالد  
وياسمين الحب كان أكبر منهم بكثير".

\*\*\*

توقفت ياسمين عن الكتابة، توجهت إلى غرفة ملابسها ونظرت إلى الجزء  
الخاص بفساتينها، بحثت عن أكثرهم إغراءً، فستان وردى اللون فوق الركبة  
بقليل، يكشف عن نصف ظهرها وساعد فى تجسيد المنحنيات حافظت عليها  
بعد أن فقدت وزنها، ارتدت تالون ووضعت حول رقبتها سلسلة ذهبية لتزين  
ظهرها، ولم تنس أن ترتدى أخرى لتعلن عن التقاء نهديها، وقفت أمام المرأة  
لتستعيد ثقته وعادت للكتابة وهى فى كامل زينتها.

- "أنت كنت فىن يا حلمى وأنا باختار؟"

- "أنت ماديتش فرصة لحد إنه يساعدك".

- "لا واضح إنك مش فاكِر، أنت كنت بتبعد بينى وبينه، تحب افكرك فاكِر  
الحوار ده؟"

عادت ياسمين وحلمى بذاكِرتهما.

- "الو، حلمى، أنت فى الشغل ولا فىن؟"

- "لا أنا قاعد على البحر باخد تان".

- "يا سخيّف".

- "ما هو ده مش سؤال برده، قاعد شغال".
- "ممکن طلب".
- "ياسمين، أنا عارف أنت عايزة ايه، شريف كويس".
- "والله مش بحبه خلاص، بس صعبان على وندمانه إني سبته".
- "تعرفي أنت سألتيني السؤال ده كام مرة؟"
- "عارفة".
- "طيب والإجابة بتكون ايه؟"
- "لازم نتحمل نتائج اختياراتنا ونتقبل البدائل، مش قادرة اتقبل، ده أنت مش متخيل خالد بيعاملني ازاي؟"
- "ياسمين كونك متجوزه يمنع يكون عندك علاقة تانية".
- رغم زواجى من خالد ومرور وقت طويل إلا أننى أفقد بشدة لمشاعرى مع شريف، اتخذت قرار السيطرة عليه من جديد، استطعت أن أوثر سريعاً عليه، حتى نسى أننى متزوجة أفنعتة أن الطلاق قريب لا محالة، وبدأ شريف الاستعداد للمواجهة، فبمجرد أن أطلق سيتزوجنى، كان سيفعلها من قبل ويتزوجنى دون علم أحد، شريف جرىء فى حبه لى ولكن ظل حلمى عائق بيننا وحاول بشتى الطرق.
- "حلمى أنا لسه بحب شريف ومش قادرة اعيش من غيره".
- "اطلقى الأول يا ياسمين".

- "تفتكر لو اطلقت، شريف يستاهل واحدة زي؟"

- "مالك أنت؟ واحدة غلطى فى اختيار ومش معناه انها اخر الحياة بس لازم تطلقى".

- "شريف انضف منى بكثير وأنا ما استاهلش واحد زيه".

لم يقف حلمى عند هذا الحد، فقد حاول أيضًا الضغط على شريف.

- "شريف، ياسمين متجوزة واللى أنت بتعمله ده غلط".

- "عارف بس تعرف لما تبص فى عين واحدة وروحك تنوه منك ونَفْسك يروح منك وعينك تغمض لوحدها؛ عشان مش قادر تبص لها كثير، لما تكون عارف أن حبها غلط بس مش قادر تمنع نفسك عنه ومش قادر تبعده عن قلبك، لما تكون مسيطرة على مشاعرك، لما يكون قلبك هو اللى بيحرك فيك كل حاجة، أنا مش بأيدى إني امنع نفسى عنها حلّى الوحيد إني ماشوفهاش، مجاول ابعده بس الظروف بتمنعنى، مجاول اكون مش خاين بس أنا ضعيف قوى، أنا بدعى كل يوم إني انسى حبها، بس جوايا مش بيامن على الدعاء".

- "ايه المشاعر دى؟"

- "تعرف يا حلمى أنا قلت لها روى اتطلقى ولما تطلقى هاتجوزك بس أنا بحبها".

استمرت ياسمين فى الكتابة وهى تحاول أن تجد شماعة لفشلها.

- "أفتكرت؟"



- "ياسمين أنا عشان عارفك كويس فكان لازم اتحكم فى مشاعرك".

- "أنت كنت بتتحكم فى سعادتي".

- "ازاى سعادتك تكون فى الخيانة؟"

- "أنا عملت كده عشان كنت، كنت.....".

- "ياسمين أنت عندك شخصيتين، كل واحدة ليها حركاتها وتصرفاتها وقناعاتها، ياسمين اللى عايزة تكسب كل حاجة وبأى وسيلة، ممكن تلاقى لنفسها مبرر لأى حاجة، زى كده لما بطلت تلوم والدتها على المشهد اللى شافته".

- "حلمى".

- "سيبيني اكمل، وياسمين الطيبة اللى حبت فى يوم من الأيام شريف بجدة ومن قلبها وخلاقي تشوفى نفسك كويس، فى ياسمين اللى بتحب وياسمين اللى بتخون والخيانة عمرها ما جابت سعادة".

- "أنت قاسى قوى".

- "أنت اللى كنتِ قاسية على نفسك أكثر من أى حد".

- "ندمانه، قوى".

توقفت عن الكتابة وعاد وميض المؤشر أمامها وهى تتحدث بصوت مرتفع: "فاكر يا حلمى ولا نسيت؟ أيوه يا حلمى أنا حبيت شريف، أنا كنت بعشقه، شريف كان انضف حاجة فى حياتي، عمرى ما تخيلت فى يوم أن ممكن حد يحبني الحب ده كله عشان أنا ما استاهلش، أنا وحشة قوى بس ضعيفة قوى

يا حلمى، ضعيفة».

\*\*\*

كانت الساعة تشير إلى السابعة مساءً، حين رن جرس منزل ياسمين.

- «هبة!»

- «مستغربة ليه؟»

- «أصلك ماتصلتيش».

- «وأنا لازم اتصل؟»

- «لا طبعاً أنت هبلة، عشان بس لو كنت مش موجودة».

- «وراكى حاجة. امشى؟»

- «حقى لو ورايا، ايه يا هبة أنا ياسمين مالك حساسة قوى كده؟»

دخلت هبة الغرفة وألقت نفسها على السرير، نظرت إليها ياسمين.

- «عماد».

- «ايوه، ايه اللي حصل؟»

- «سبنا بعض».

- «تعالى اقعدى على الكرسى ده وفهمينى واحدة واحدة».

- «أنا هاقعد على الكنبه».

أشارت إلى التسريحة.

- «لا اقعدى هنا ها عمل لك مكياج».

- «هو ده وقته؟»

- «تعالى بس».

جلست هبة أمام التسريحة ونظرت إلى المرأة وياسمين وهى تخرج إحدى علبها السحرية.

- «أنت بتعمل ايه يا ياسمين؟»

- «لما اخلص اللى بعمله هاتعرفى إنه وقته، ايه اللى حصل بقى؟»

- «عماد بيخونى».

- «طب ما أنا قلت لك قبل كده إنه بيخونك وأنت عمرك ما صدقتى».

- «عشان بجه».

- «طب ايه الجديد؟ كرهتيه مثلاً؟»

- «لا».

- «ايه اللى حصل؟»

- «كنت دايمًا بحس إنى مبسوفة حتى لما كنت باعرف إنه بيخونى، ما كنتش بصدق، ما كنتش عايزة اخرج من السعادة دى، بس المرة دى بعد ما عرفت حسيت إنى حزينه من غير سبب، والله من غير سبب».

- "بتعيطى ليه طيب؟ الميك اب هيبوط".
- "ما يبوط يا ياسمين فى داهية".
- "روحى اغسلى وشك واهدى وتعالى اقعدى".
- مرت دقائق وعادت هبة وجلست مكانها.
- "أنا آسفة إنى زعقت لك".
- "بلاش هبل".
- "تفتكرى ممكن يكلمنى تانى؟"
- "اكيد هيكلملك ده عماد وأنا عرفاه كويس".
- "بس أنا قفلت كل البيان، كلها".
- "هيرجع".
- "مش هيرجع المرة دى صدقيني مش هيرجع، أنا فعلاً قفلت فى وشه كل حاجة، مع إنه لو كلمنى واعتذر هاضعف".
- انتهت ياسمين من وضع المكياج على وجه هبة حتى عادت أميرة كما كانت فى صغرها، ورسمت على وجه هبة ابتسامة ثقة أعادت إليها جزءاً من روحها.

\*\*\*

(حلمى وحبيبة)

- "حلمي بس قبل ما تكمل، أنت ليه أفكرت اليوم الى طلبت فيه الطلاق؟"

- "فى لحظة بتفرق فى حياتنا يا حبيبة، يا اما ناخذ القرار الصح ونكمل حياتنا، أو نغلط ونقتل روحنا قبل ما نموت بسنين".

- "قصدك أن طلبي كان غلط".

- "لا طلبك كان صح، بس لو كنت وافقت عليه كان هيبقى غلط".

- "فزورة دى؟"

- "لا بس أنا كان قدامى اختيارين أسهلهم أصعب من التانى، بس تعرفى بعد ما طلبتى الطلاق حسيت بقلق أول مرة أحس بيه، أنا كنت عايش معاكى وجوايا سكيينة كنت مرتاح على قد ما إحنا كنا بعاد عن بعض، شعور القلق ده خلانى افكر هو أنا لو سيبتك هاكون مبسوط".

- "أنت كنت عايز تسيبنى يا حلمى؟"

- "فكرت يا حبيبة القلب مش هانكر، بس صدقيني لو قلت لك إني لما رفضت الطلاق شعور القلق راح، وعلى قد المشاكل الى حصلت بعدها، بس ماكنتش قلقان خالص".

- "ده كان أهم قرار أنت أخذته فى حياتك وصدقنى أنا فعلاً طلبت الطلاق وكنت بادعى إنك ترفض، كان نفسى اعيش معاك، عشان على قد البعد الى ما بيننا بس كان فيه حلم جوايا وأنت الى اتمسكت بيه".



(٨)

أساطير السعادة

"إحساس جديد"

نانسى عجرم

ألبوم الدنيا حلوة - ٢٠٠٧





لم يُمرَّ يومٌ إلا وهو يجب، ولم يعيش يوماً للحب إلا وحيداً.

جلست مها بكل ثقة أما حلمي

- "أنا فخور بيك فعلاً".

- "ليه يا دكتور؟"

- "عشان الواحد لما يتعلم من أخطأه بيكون إنسان مختلف".

- "أنا حاولت احافظ على بيتي بس".

- "مها، أنت عملتي حاجتين صعب جدًّا على اى واحدة تعملهم، أنت اعترفت  
إنك غلطانة وسامحت جوزك رغم إنك متأكدة أن غلطته لا تغتفر، أنت فعلاً  
قوية وأنا فخور بيك جدًّا".

- "شكرًا يا دكتور".

- "عندى سؤال ممكن يكون بره موضعنا شوية".

- "أفضل يا دكتور أسأل زى ما أنت عايز".

- "إحساسك ايه بخالد دلوقتي؟"

- "خالد؟"

أخرجت لسانها وداعبت به شفيتها.

- "عيب اقول كده وأنا متجوزة بس هاكون صريحة معاك يا دكتور، خالد هو أول شروق على قلبي، خالد هو اللى فتح قلبي لحاجات كثير، هو حبي الأول، مش هانكر إني بفكر فيه أحياناً، بس مش خالد اللى سابني، فيه خالد تانى بيوحشني، خالد اللى كنت بحس بروحي بتخرج في ايديه لما ببسلم على أو لما عينه تيجي في عيني، أنا بقولك أنت بس عشان أنت دكتورى، لكن أنا مش باعترف بده حتى لنفسى، أنا ست متجوزة ودى خيانة وأنا معترفة بس أنا مش لاقية طريقة اتحكم بيها في ذكرياتي".

- "أى حاجة ممكن نتعود عليها".

- "عارف يا دكتور المشكلة الوحيدة أن الحب ده بيبقى حب built in مشاعر موجودة في القلب بتموت مع موت القلب".

\*\*\*

توقفت مها قليلاً حتى تضع السماعات في أذنها وبدأت تنظر إلى وميض المؤشر وتستمر فيما تكتب وهي تبتسم ابتسامة أظهرت أحلى ما في وجهها.

عدت من رحلة العمرة بعد طلاق مباشرة، كنت أظن أننى بعدها سأترك همومى فقط، ولكنى تركت معها قلبي الذى لم يعد لديه القدرة على الحب، خرج خالد من حياتى أو هكذا كنت أظن وقتها فقد عانيت كثيراً بعده، أما وائل فلم يكن يشغل هذا الحيز الذى كنت أظن أنه يملؤه وبت أبحث في الزواج عن شيئين رجل كلمته من رأسه وعقليته تتناسب مع جنون تفكيرى، نعم أعترف أننى بحثت عن الجنون بعد كل ما عانيت، رفضت الكثير من الزيجات لم أعد أبكى على شىء، أنا عاشقة مجروحة وعروس مطلقة، كانت أمى تدعمنى بشقى الطرق إلا أنها كانت رافضة فكرتى عن الزواج.

- "يا بنتى أنت بتدورى فى كوم قش على عريس شبهك وربنا خلقنا مش شبه بعض".

- "ماما، أنا جريت مرتين وعكت الدنيا معايا، عشان خاطرى المرة دى بلاش ضغط لحد ما ألاقى حد مناسب".

- "مناسب ازاي يعنى عشان ابقى عارفة؟"

- "ماما إحنا أصحاب طول عمرنا صح؟"

- "صح".

- "يبقى مش هتزعلى من اللى هاقوله، فاكرة زمان أنت وبابا كنتم عاملين أزاى؟"

- "فاكرة، وفاكرة كمان إنك كنت جنبى وضهرى فى عز المشاكل".

- "يبقى خليك فى ضهرى يا ماما دلوقتى عشان فعلاً محتاجة ضهر".

- "ما هو عشان أنا فى ضهرك يا بنتى بقولك المناسب ده إحنا اللى بنخلقه، احنا اللى بنعمل المناسب، طب ما أنا وباباكي بقينا مناسبين لبعض بعد كل المشاكل اللى عدت".

- "وأنا ما عنديش طاقة يا مامتى عشان أفصل المناسب ده".

كانت رحلتى عن السعادة مجرد حلم عشته مع نفسى ورأيتة فى الآخرين.

(دفتر الملاحظات - الملف الرابع - الاحتياج)

عماد أيضًا كان في رحلة البحث عن السعادة في فتاة بلا علاقات سابقة، صدمته هبة بانسحابها وفقد ياسمين بعد زواجها، اثنتين عشقهن لأن في الاثنتين كل ما كان يحلم به، هبة التي تعيش كالأميرات وياسمين التي تمتلك الأنوثة وتجيد استخدامها، ولكن عماد رأى أنه بعد هذا العمر وبعد كل ما مر به، عليه أن يستقر وكان اللقاء بيننا، لم يكن عماد يبحث عن أنثى، عماد كان يبحث عن زوجة وكنت أنا، لا يزال يتمتع بوسامته منذ صغره إلا أن علاقاته النسائية باتت منعدمة، ولكن بمجرد أن رآني - أعترف أني أمتلك حيزًا من الغرور - في لقاء مُدبر من أحد أصدقائنا.

- "هو ايه احتمالية أن واحدة جميلة قوى زيك كده تكلم واحد وحش قوى زي كده؟"

نظرت إلى صاحب الصوت بدهشة وصمت قليلًا من وسامته.

- "أنا عماد صاحب حلمي".

- "أهلاً وسهلاً".

أشار إلى مكان بعيد ولوح بيديه إلى حلمي.

- "هو الي قالى استناه معاك".

- "تنور اتفضل، بس ايه الدخلة الغريبة دي؟"

- "غريبة ازاي؟"

- "لا مافيش بعدين، أنا هاكلم حلمي".

استمتعت بنصف ساعة من الحديث مع عماد، بدا أنه لا يريد أكثر من الاستقرار ولا مانع لدى أن أستقر معه، الحقيقة أننى أعجبت به ولكن لى أكون أكثر صراحة فقد قارنته بخالد ووائل وشتان ما بينهم، رجل وسيم، كانت أول دقائق كافية ليظهر قوة شخصيته ويرسم ابتسامة فرحة على وجهى.

\*\*\*

كانت مها وعماد قصتي الرابعة التى لم أجد لها عنوانًا، زواج بحث عن الزواج، ليكمل شيئًا مفقودًا بداخلهما، لم يجدها فى تجاربهما السابقة، زواج فيه كل الاحتمالات متاحة الفشل والنجاح، الحب والكراهة، السعادة والغضب، المتعة والفتور، دافعهما كان البحث عن كل هذا.

- "حلمى استنى شوية".

- "فى ايه يا حبيبة؟"

- "هو أنت ايه علاقتك بجوازهم؟"

- "فى مليون حلمى غيرى يا حبيبة ومش مهم الأسمى متنسش".

- "وحلمى الى فى الرواية كان عايز ايه؟"

- "كان عايزهم يعيشوا مبسوطين".

- "السعادة لا تصنع".

- "لا يا حبيبة احنا ممكن نصنع السعادة بس لما نفهمها".

- "يعنى القصة الرابعة ممكن تسميها السعادة؟"

- "مش السعادة، عماد ومها التجوزوا عشان الاحتياج ودى انقى انواع العلاقات".

\*\*\*

مرت الأيام وأنا وعماد نتقارب بحذر شديد، حاول كلانا أن يكون واقعى نقاشاتنا أكثر عقلانية، أناقشه فى شخصيته ويحلل شخصيتى، نتقبل الاختلاف بمنتهى الوضوح، باتت العلاقة أقرب إلى لوحة زيتية بألوان متناسقة ولكن غير مفهومة.

- "مها احنا كل حاجة بيننا واضحة، بس أنا مش مبسوط".

- "يعنى ايه؟"

- "يعنى مش حاسس إننا هنكون مبسوتين، مع إن فيك كل الى أنا محتاجه من زوجة".

- "وأنت فيك كل الى أنا محتاجه من زوج ، فين المشكلة؟!"

- "مش هنبقى مبسوتين".

كان قرارى بعد هذا اللقاء مختلفاً، قررت أن أقاتل على ما أريد.

- "حلمى هو مش عماد صاحبك؟"

- "أه".

- "قوى ولا عادى؟"

- "فى ايه يا مها؟"

- "أنا وعماد اتكلمنا وقال لى إنه مش عايز نكمل مع بعض عشان مش مرتاح لفكرة الالتزام".

- "و؟!"

- "وأنا مش عايزة اسببه يا حلمى، ممكن تساعدنى أنا فعلاً مش عارفة أرد عليه إزاي، ومش عارفة أوافقه أو عشان أكون واضحة أنا مش هوافق إني أسببه، بس فى نفس الوقت مش عايزة أبان مذلوله".

- "وأنت مذلوله؟"

- "ايوه، بس مش حب، أنا ممكن اكون ماحبتوش بس شايفة حياى معاه مناسبة".

تابع حلمى علاقتى بعماد فى هذه الفترة وأصبح يلقننى ما على قوله أو إرساله حتى أن آخر رسالة كتبها هو وأرسلتها أنا من هاتفى، "عماد أنا عملت لك كل حاجة فى الدنيا عشان نفضل مع بعض، عايز نفضل تمام، مش عايز تمام، يمكن هازعل شوية بس لما افتكرك مش هاندم، عشان عملت كل المحاولات إننا نفضل مع بعض وانت ماعملتش".

توقفت مها مجدداً لتحسنى فنجائاً من العصير وهى تدلك رقبتها وتبتسم حين تذكرت وائل.

لم أشعر بغضب من وائل رغم أننى أعتبر طليقته، ولكن كان المسيطر آنذاك إحساس بالشفقة، تأكد لى - بعد أن ترك والده يكمل إجراءات الطلاق - أنه لا حيلة له، وائل كان راضعاً لولا تدخل والده، لا أنكر أننى أعجبت به للحظات، لم يكن فى قلبه غل لأحد حتى إنه اعترف لى باعتراف قبل خطبتنا.



- "بما إننا هنتخطب خلاص أنا عايز اعترف لك بحاجة".

- "خير؟"

- "هو أنا بكلم أمى، ايه خير دى؟"

- "ماقصدش، لو مصيبة بلاش تعترف".

- "لا خالص، وأنا فى الكلية كنت بحب واحدة اسمها غادة بس ماكنتش قادر أعترف لها بحبى ده".

- "ليه؟"

- "بلاش أسباب دلوقتى، بس حاسس أن من حقك تعرفى القصة، كنت بحبها بس عمرى ما اعترفت لها كنت، كنت . . .".

- "كمل".

- "لا خلاص المهم كنت بحب واحدة زمان وكان لازم أقول لك".

لم أعترف له بعلاقتى بخالد وقتها، ولكن مع الوقت أدركت أنه رفض البوح لصديقتة فى الجامعة بسبب ضعفه، كان اللقاء الأخير بين غادة ووائل فى الجامعة، كان وائل الشخص الذى ظن شريف أن غادة تحاول فرض نفسها عليه.

فى نفس المكان الذى أفصح فيه شريف عن حبه لغادة، جلست هى مع وائل.

- "غادة أنا مش عارف اقولك ايه!"

- "واثل أنا عارفة إنك بتحبني".

- "مش عايز اطلع عيل قدامك، أنا طول حياتي بيتفرض على حاجات وخايف التزم معاك بالتزام ويتفرض على حد غيرك، أنا مش هاقدر أكمل معاك".

- "أنا ممكن استناك".

- "مش هاينفع صدقيني".

وبمجرد أن انفصلنا وبعد مكالمته الأخيرة معي وخروجه من تحت سيطرة والده، كان عليه إجراء مكالمة أخرى.

(دفتر الملاحظات - القلب - واثل وغادة)

- "الو".

- "واثل؟ أنت واثل صح؟!"

كانت الساعة العاشرة صباحًا وكانت في مقر عملها، وقفت ونظرت إلى شبك خلف مكتبها وتلفتت يمينًا ويسارًا وخفضت صوتها.

- "خفت تكوني غيرتي رقمك".

- "لا ماغيرتوش".

- "ولا صوتك اتغير".

- "ولا أنت، أخبارك ايه؟"

- "تمام أنت في الشغل؟"

- «اه».

صمت لشوانٍ وأخذ يحرك قلم في يده بتوتر، وأخذ نفسًا عميقًا حتى وصل تنهيده إلى أذن غادة.

- «غادة أنا آسف عشان كل حاجة».

أخذت وقتها وهي تبتسم ثم مسحت دمعة خانتها سريعًا قبل أن يلاحظها أحد.

- «آسف على ايه، مافيش داعى للأسف، كنا صغيرين».

- «لا أنا آسف عشان أنا كنت ضعيف».

- «من غير ما تكمل مش محتاجة آسف لا على كونك ضعيف أو، أو عشان اتجوزت، مش محتاجة آسف على حاجة».

- «أنا اتجوزت عشان عشت مع راجل متحكم وماعرفش ليه كنت كده، أنا كنت هاتجوز واحدة عشان كانت عجباء».

عادت إلى مكتبها وجلست.

- «مش فارقة يا وائل والله مش محتاجة آسف».

- «هو أنا معطلك؟»

- «هو أنت مش بتشتغل».

- «بشتغل طبعًا بس بفتح بيزنس جديد وبحاول اكون مستقل، بقولك ايه ممكن نتقابل؟»

- "نتقابل ليه؟"
- "هو أنت ارتبطى؟"
- "قديمه قوى ارتبط دى يا وائل، بس لا أنا لسه لوحدى".
- "طب كويس".
- "كويس! "
- "تعرفى أنا فين دلوقتى؟"
- "لا".
- "أنا عارف إنك بتقفلى كلام، وده حقك، بس أنا قاعد فى سوا وعايز اقابلك  
ينفع".
- "وائل أنا بس عايزة أقولك حاجة، أنا خسرت واحد من أعز اصحابى عشان  
قال لى فى يوم إنى بجري وراك، وأنت زمان ماقدرتش ده، هنتقابل ليه؟"
- "قصداً على الولد اللى كان لازق لك ده، ده كان شكله عبيط قوى يا غادة  
ومبهدل كده فى نفسه، وأنت كنتِ أحلى واحدة فى الكلية كلها".
- "ماتقولش عليه كده، على الأقل عرف يعترف بمشاعره".
- "هو كان بيحبك؟"
- "مابقاش وقته الكلام ده، كنا صغيرين".
- "طب ممكن نتقابل واشوفك كبرت ولا لسه صغيرة؟"

- "يا وائل".

- "فرصة ثانية، أنا هستناكي في سوا، هاقعد هناك من الساعة خمسة وهستناكي".

- "وائل أنت ايه الى فكرك بيا بس؟"

- "والله العظيم يا غادة عمري ما نسيتك، ولا حتى لما كتبت كتابي، عمري... أنا هستناكي".

أنهت غادة المكالمة مع ابتسامة وتنهيدة عميقة.

\*\*\*

- "مش مهم الأسامي صح؟"

- "صح يا حبيبة".

- "ووائل كان بيقول على شريف شكله عبيط مع أن شريف كان صاحب عمره؟"

- "مالك يا حبيبيه بس؟"

- "لا يا حلمي مافيش كمل، أنا كنت بفكر نفسي بس".

\*\*\*

- "خالد... أنت سيبت مها ليه؟"

- "أنت أول مرة تسألني السؤال ده يا دكتور؟"

- "تعرف يا خالد عشان نخل مشاكلنا؛ لازم نعرف السبب لازم تعترف أنت  
ليه سيبت مها".

- "آخر مرة قابلت مها لوحدنا كان واحنا بنشترى بدلة عشان شغل فى شركة  
كبيرة، كانت تقريبا ثانى شغلانة لى بس كانت هتفرق معنا كثير قوى، اشترت  
لى البدلة عشان الشغل وعشان اروح أخطبها ...".

- "سيب دموعك يا خالد مش عيب، كمل وخذ راحتك".

- "مها كانت جميلة أنا على طول كنت باشوفها جميلة بس كنت خايف قوى،  
تعرف يا دكتور تقريباً أنا اتجوزت عشان تكرهنى، أنا اتجوزت ياسمين عشان  
مها تكرهنى".

- "كنت عايزها تكرهك ليه؟"

- "عشان ماكنتش قادر على حبها، أنا كنت، لا مش كنت أنا لسه بحبها  
وبجنون يا حلمى".

نظر حلمى إلى بندول الساعة وهو يهز رأسه معترضاً على هذا التفكير.

- "وفى سبب كمان عشان حسيت أن عماد ممكن يتجوز واحدة أحلى منها".

جلس خالد وحيداً وهو يستمع إلى أحد ألبومات كاظم الساهر القديمة وأمسك  
هاتفه المحمول وبدأ فى الكتابة.

(دفتر الملاحظات - العقل - خالد وياسمين)

سافرت أنا وياسمين لقضاء شهر العسل على إحدى سواحل القارة الآسيوية

المطلة على المحيط الهندي، كانت الليلة الثانية وبعد أن ارتاح كلانا من السفر ارتدت مايوه بيكييني واتجهت إلى حمام السباحة مباشرة، لم أعلق على المايوه، أنا الذى رفض من قبل أن ترتدى مها ملابس ضيقة تكشف عن مفاتها الآن أترك زوجتى ولا أعلق، لم تكن تكفى ورقة تعترف بزواجنا أن تجعلى أشعر معها بعلاقة زوجية، مر الأسبوع الأول دون أن اقترب منها، رغم المعادلة الحسابية لزواجنا إلا أن لى جانب رومانسى أرفض الكشف عنه، كنت أنتظر إشارة منها ولكنها صمتت وفضلت الابتعاد.

فى اليوم الأخير أرسلت ياسمين رسالة نصية إلى شريف، «أنا لسه بنت، أنت ممكن تسامحنى».

سعادة غامرة شعر بها شريف بعد الرسالة وراوده الأمل من جديد، رغم هذه السعادة إلا أنه رد عليها سريعاً، «عيب أنت ست متجوزة».

لم تكن أيام زواجنا الأولى سوى بذرة للخلاف، وتركنا تلك النبتة تنمو لتقتل أى محاولة لخلق حياة أسرية، لم أكن أتخيل قط أن حياقى ستنتهى بهذه الصورة، تركت ياسمين المنزل بعد شهرين لم أستطع أن أعطيها متعة جنسية وأنا روى مع أخرى، لم يجمعنا سرير فى الشهرين إلا وكانت مها ثالثتنا لم تفارقنى للحظة، لم أستمع لصرخات أنوثة ياسمين، كنا على وشك الانفصال حتى بعد أن أكتشفت ياسمين حملها مُورست ضغوط علينا حتى عدنا إلى المنزل سوياً وإن بقيت روح كل منا فى مكان آخر.

فى هذه الأثناء بدأ شريف فى التقرب من عماد، فى محاولة منه لمعرفة آخر أخبار ياسمين، ولأن شريف دائم التعامل بفطرته نسى مع الوقت السبب الحقيقى لصداقته من عماد، وكلما رآه فى موقف يحتاج للمساعدة تدخل حتى إنه كان أكثر من قدم له يد العون أثناء زواجه، وكانت صداقة عماد إحدى

الأسباب في عودة الاتزان لشريف، وإن كان قد فقد اتزانه مرة أخرى حين استقبال مكالمته غريبة من ياسمين.

نظر شريف على الرقم المسجل على هاتفه وظل لثوانٍ مترددًا بين الرد من عدمه.

- "أنت عايزة ايه منى يا ياسمين بعد السنين دى؟ أنت مش اتجوزتى؟"

- "طب قول سلام عليكم".

- "عايزة ايه يا ياسمين؟"

- "مممكن ارجع اكلّمك؟"

- "أنت متجوزة وماينفعش، أنت مش عارفة أنت عملتِ فيّ ايه، أنا بنى ادم يا ياسمين".

- "هو أنت فهمت ايه لا أنا ماقصدش الهبل ده، وأنا عارفة إني غبية جدًا عشان سبتك، أنا برتاح وأنا بكلمك، أنا بينى وبين خالد مشاكل كثير".

- "وأنا مش حل لمشاكلك مع خالد، سيبينى فى حالى".

أغلق شريف الهاتف واتصل بحلمى.

- "حلمى، ياسمين كلمتنى".

- "و؟!"

- "عايزة تكلمنى".

- "شريف من غير لف ودوران، اقفل على الموضوع ده ولو اتصلت ببيك تانى



ماتردش، اقطع كل علاقتك بيها".

توقف خالد قليلاً عن الكتابة واتجه إلى مشغل الأسطوانات ووضع أسطوانة لكازم الساهر، وبدأ يغنى معه بصوت مرتفع.

"وأعرف أنى أعيش بمنفى وأنت بمنفى وبينى وبينك

ريح وبرق وغيم ورعد وثلج ونار

أعرف أن الوصول لعينيك وهم

وأعرف أن الوصول إلى شفقتك انتحار".

عاد بعدها إلى الكتابة وكازم الساهر يشدو خلفه.

كان أكثر الأيام مرارة يوم زفاف مها، كان من الممكن أن أعتذر ولكن أردت وبشدة أن أشاهد زوجها، نظرت إلى خزانة ملابسى وعلى الرغم من امتلائها بالملابس والبديل ولكن كانت هناك بدلة وحيدة، البدلة التى اختارتها مها، توقف عقلى عن القيام بدوره الحيوى، وبدأ القلب فى السيطرة على ما تبقى لى من مشاعر، ارتديتها بالطريقة التى كانت تفضلها ثم زيننت معصى بآخر هدية منها، كان واضحاً شعور الدهشة على وجه ياسمين وأنا أرتدى تلك الحلة القديمة، اعتادت على أن ترانى أزهو بنفسى وأرتدى فقط ما وضع عليه اسم أشهر الماركات، لكن ياسمين لم تعد تهتم بما أرتدى منذ فترة طويلة ولم أجد أحداً أحدثه إلا خالد القديم.

- "معاك فلوس كثير اهو ومش نافعة".

- "أعترف إنك غلطت وحاول من جديد".

- «ما فيش جوايا حب غير ليها».

- «للحب ألف لون، انساها».

- «يعني انساها وافتكرك بوز الاخس الى معايا دى؟»

- «مش دى لى أنت كنت هتموت عليها؟!»

- «حمار، أنا حمار».

كان الطريق إلى قاعة الفرح أشبه بطرق سباقات الصحراء أنا وحدى، وحرارة شديدة أشعر بها رغم المكيف الذى يعمل على أعلى درجاته بالسيارة الفارهة، بمجرد أن وصلت إلى قاعة الأفراح اختفى الحضور وبقيت مها أمامى ودمعة حبيسة فى عينيها، نظرت إلى ورفضت أن تخفى ابتسامة رسمها على وجهها من تمايل بين أحضانه، فهو أحق بالابتسامة عن حزن إشفاق على ماضٍ رفضها كان قلبها يُعصر من الحزن، أنا أعرف تلك الفتاة أكثر مما تعرف هى، للمرة الأولى تشع برغبة فى البكاء منذ أن تركتها، فهى تعلم أنها فقدت مشاعرهما ولم تقو على الحب مرة أخرى.

ولم يكن هناك إلا حلمى لينتشلنى من هذا الهم.

- «للمرة المليون، حلمت بيها امبارح يا حلمى».

- «عشان أنت مش بتفكر غير فيها».

- «ما هو أنا مش عارف ما فكرش».

- «والمرة دى ايه بقى يا عم الرومانسى؟»

أغمض خالد عينيه مع ابتسامة غير مصطنعة.

- "شفتها على البحر مسكت راسى وحطتها على صدرها وحسيت بيها قوى، حسيت قد ايه كانت محتاجانى وأنا بعثها، سمعت صوت قلبها، هى ممكن تكون حاسة بي؟"

- "الأرواح دى عالم غريب، مش بعيد".

- "بجد ممكن؟"

- "كمل يا خالد".

- "أنا مالحقتش ابص لها، بس حسيت انها بتعيط، لا مش هى لوحدها، أنا كمان كنت بيعيط أول مرة من زمان احس بيها قوى كده، أول مرة من زمان توحشنى كده أنا هاموت عليها، واول مرة اكتشف قد ايه أنا ظلمتها وظلمت نفسى".

- "تفتكر يا خالد لو كنت اتجوزتها كنت هاتحبها الحب ده كله؟"

- "فصلتنى".

- "ما هو أنا لازم افصلك طبعًا، أنت عامل ايه مع ياسمين؟"

- "استغفر الله العظيم".

- "ايه يا عم، هى مش كانت طالبة الطلاق؟"

- "وأنت فكرك إني هاطلقها بالساهل بالسهل كده؟ هى لسه شافت حاجة منى".

- «ايه يا ابني الغل ده؟»

- «أنا اعرف حاجات عنها ومش حابب اقولها، بس فى يوم هأخذ حقى منها».

- «تعرف عنها حاجة ولا بتلومها عشان ماتجوزتش مها بسببها؟»

خالد من قمة الرومانسية إلى قمة الثأر خالد يخفى مشاعره الحقيقية عن حلمى.

\*\*\*

«كل واحد عنده حلمى، حلمى الى بيشاركه كل مشاكله وبيستنى منه النصيحة، بس حلمى دائماً بينصح بمشاعره مش بواقعية السؤال، هنا يا ترى حلمى نصحهم صح؟!»

- «ايه يا حلمى؟ هو أنت السبب فى الى هم فيه؟»

- «أنا السبب!! ازاي يا حبيبة؟»

نظر حلمى إلى بندول ساعته وهو يحاول أن يسيطر على نبضات قلبه، ضم شفتيه وحاول أن يتماسك إلا أن حبيبة لاحظت ذلك، حاولت الاقتراب منه و لكنه أشار لها بيديه، فظلت فى مكانها وشاهدته وهو يمسك قلمه ويستمر فى الكتابة.

\*\*\*

قررت ياسمين أن تعود إلى رشاققتها، بدأت فى نظام غذائى صارم ولكنها فشلت، هنا قررت أن تخضع لعملية جراحية فى المعدة لتساعدها على العودة إلى شكلها القديم، ولكنها لم تعترف لأحد بالعملية وقالت أنها اتبعت نظام غذائى مع

ممارسة التمارين الرياضية، وسرعان ما عادت تشتاق إلى علاقاتها السابقة ونظرات الرغبة في أعين الرجال، ساعدت عماد أن يعمل معها في الشركة التي التقت فيها بخالد، وكانت الظروف مناسبة بعد أن ترك خالد وظيفته ليعمل في دولة أخرى وبقي زواجهما على الورق، وهنا رسمت لنفسها مبررات أن تعود إلى علاقة أخرى ربما تنسيها وحدتها وكان عماد.

- «الو».

- «ايه يا بنتي أنت فين؟»

- «في الدنيا، أنت أتجوزت؟»

- «هبة سابتني وأنت بعيتني كنت عايزاني اعمل ايه يعني؟»

- «غلطت يا عماد والله».

- «أنت فينك دلوقتي؟»

- «ده اللي أنا متصلة بيك عشانه».

- «ايه؟»

- «ابعت لى ال CV أنا اشتغلت في شركة جديدة وعازاك معايا».

- «الفلوس ايه؟»

- «ابعت بس وأنا هاظبطك».

كانت على الجانب الآخر تتصل بشريف يوميًا حتى تحكمت فيه من جديد.

- "أنا ها اطلق".
- "أنت عايزة ايه منى؟ ابعدى عنى بقى".
- "شريف أنا ها اطلق ممكن نتقابل، أنت واحشنى جدًا".
- لم يقاوم شريف الرغبة وبدأ يتعامل معها على أنها منفصلة وأن طلاقها مسألة وقت، وافق على اللقاء فى نفس المكان الذى كانا يجتمعان فيه، ولأن شريف مختلف أهداها هدية عن كل عيد ميلاد لم يلتق معها فيه، وتوالى اللقاءات والمكالمات والحب يزيد وتحول المشهد مع شريف إلى أنه الزوج وخالد هو العشيق وفى إحدى اللقاءات اعترض على تواجدها معه فى شقة منفردة.
- "أنت بتقول ايه؟!"
- "ماتقعديش معاه فى الشقة لوحدهم".
- "ده اللى هو ازاي ده؟"
- "احنا هنستهبل، وتجيبني تاني تقولى لى غلطت وحامل".
- "شريف أنت بتغير عليا؟"
- "بلا غيرة بلا زفت أنت مش هتطلقى، تقعدى معاه إزاي بقى؟"
- شريف يلين سريعًا ولكن فى نفس اللقاء كانت هناك محادثة أخرى مع عماد.
- "بقولك ايه يا عماد ما تيجي تروحنى".
- "وأنت عربيتك فين؟"

- "مش قادرة اسوق والله".
- تريد ياسمين كل شىء.
- "عماد احنا اصحاب صح؟"
- "هو احنا كنا أصحاب وبس؟"
- "طب هسألك سؤال غريب".
- "قولى".
- "أنت بتقعد قد ايه مع مها وأنت نايم معاها؟"
- "نعم ياختى".
- "عايزة اعرف، فى ايه عادى".
- عماد أيضًا بنفس مقدار ياسمين من المكر وبدأ خطوة سريعة.
- "هو خالد ايه، فسسس؟؟"
- "اسكت بقى".
- "يبقى فسسس".
- هى اللحظة التى وضع يديه على كتفها وتركها لتقف عند صدرها.
- "طب ما هو لسه كويس اهو، ماله خلود بقى".
- "بس يا عماد ايه ده؟"

ولأنه عماد لم يتوقف واستمر حتى وصل إلى اللحظة التي جعل ياسمين تغض عينيها وتستمتع برعشة شهوة فقدتها منذ فترة طويلة ولم يقطعها سوى رسالة من شريف: "أنت فين روحي ولا لسه؟" وبمجرد أن تركت عماد اتصلت به.

- "شريف ماتيجي البيت محتاجك ضروري".

- "ما أنا كنت لسه معاك، حصل ايه؟"

- "تعالى بس الشقة ضروري".

- "شقتك ازاي ولو مامتك شافتي؟"

- "لا ماتخفش مافيش حد".

- "طب لما مافيش حد آجي أنا ازاي؟"

- "ايه يا شريف هو احنا صغيرين".

أغلقت نور الصالة وتركزت ضوءاً ضعيفاً يتسلل من إحدى الغرف الجانبية، اتخذت قرار ممارسة علاقة كاملة مع شريف هو المتاح الآن، عماد رفض الفكرة لأنه متزوج هو لا يمانع مداعبتها، ولكن رافض للعلاقة الكاملة أما شريف فلا، تركت قميصها مفتوحاً كعادتها وهي صغيرة وإن زاد عدد الأضرار المفتوحة وجيب قصيرة، بمجرد أن دخل شريف تعمدت استثارته لم تقترب منه وإنما تركته يلتهم جسدها بعينه وهي تضع له عصيراً وقطعة من الحلوى، جلست بجانبه ووضعت رأسها على كتفه.

- "تعرف يا شريف أنت الوحيد في الدنيا اللي بحس معاه بالأمان، أنا ندمانة على كل لحظة ماكنتش معايا فيها، أنا بحبك قوى".



أخذ شريف نفسًا عميقًا وأغمض عينيه في محاولة لكبت مشاعره وشهوته التي تلتهم جسدها، حاول جاهدًا أن يستعيد قوته وهو طفل وهو يحاول تجنب شهوته ولكن إيمانه كان أضعف من أن يمنعه.

- «ما هو أنا قلت لك من الأول كل ده كان غلط جوازك كان غلط».

كان صوته ضعيفًا ويتلعثم في الكلام حين خطت خطواتها الثانية وهي تنظر إلى وجهه وتقرب منه وتطبع قبلة على خده، احتضنها ومارس معها علاقة كاملة وما أن انتهيا.

- «شريف أنت مش أول مرة تنام مع واحدة أعترف».

- «لا والله أنت أول واحدة، وماتخلينيش أندم، أنت هتطلقى؟»

- «شريف أنت جامد قوى وهاتطللق عشان خاطرك».

لم يكن في نية ياسمين الانفصال على الإطلاق هي تريد أن تستمتع بثلاثتهم، خالد والصورة الاجتماعية، عماد وصورة العشيقة، وحب شريف.

كانت الخطيئة الأولى في حياة شريف حين مارس مع ياسمين علاقة جنسية كاملة، عاد بعدها إلى منزله ودون أن يلقي التحية على أحد دخل إلى غرفته وأغلق جميع الأنوار ودفن نفسه تحت الغطاء وكل أمانيه أن ينام في أسرع وقت ممكن، خوف سيطر عليه لأيام، أصبح يخشى أقل ضوء حتى أن ضوء الثلاجة كان يثير فيه الرعب، رغم هذا الخوف كان في حالة من الدهشة عما بدر منه، كيف استطاعت أن تغويه كيف استطاعت أن تُقنعه أن يمارس معها علاقة كاملة، كيف اقتنع وهي لا زالت على ذمة رجل آخر، كيف أقنعه أنه لا يوجد مجال للعودة إلى زوجها، وأنها في أشد الاحتياج له، سؤال لا زال مستمرًا معه

وهو يدرك أنه مهما طال الوقت، سيقترض الله من فعلته، وظل يستغفر كثيرًا ولا يزال يستغفر فقد يغفر الله له ويصون أهل بيته.

\*\*\*

- «أنت زعلت عشان قلت إنك السبب؟»

- «لا مازعلتش».

- «طب اتغيرت كده ليه؟»

- «عشان افتكرت أنا ايه، عشان لما قريتها عرفت إني كنت بكتبها بمزاجي».

- «هى ايه دى؟»

- «روايقي يا حبيبة، أنا كنت صاحب الخامس، صاحب المنسى، اللي بيفتكروه لما يكون عندهم مشكلة واجعة قلبهم، كنت دائمًا موجود ليه، بس كنت لوحدى، عمر ما فى حد فيهم سألنى مالك؟ لا باحب ولا باتحب أو باتينل، كنت محرم للبنات وأجدع راجل للولاد، أنا كنت ترس صغير قوى لما ساعة قلبهم تقف يحطونى عشان ترجع تلف، تعرفى أنا بقيت دكتور عشان مابقاش لوحدى، أنا اتعودت إن الناس تفضل محتاجة لى، عشت عمرى كله يا حبيبة من غير أصحاب، وكان لازم اكتب روايتهم عشان اعرف أقرأ روايتي، كان نفسى كلهم يكونوا مبسوطين».

- «حلمى، أنا آسفة».

نظر حلمى إلى حبيبة بابتسامة.

- «على ايه أنا الى نفسى اعتذر لهم، أنا كنت شريف الى ماقدرش يثنى خالد عن قراره وياسمين الى ماخلتش هبة تكلم عماد تانى، أنا كنت فاشل إني أنقذ ياسمين من نفسها بس كنت بحاول، ماكنتش عايز حد فيهم يخون».

احتضنت حبيبة رأس حلمى.

- «عمر ك ما كنت فاشل، ولا محتاج تقول حاجات كثير عشان تقول إنك مش بتخونى، مش ده الى أنت عايز تقوله من الأول، أنا حفظاك يا حلمى».

- «لا خونتك».



(٩)

حياتنا

«وافتكرت»

محمد حماقي

ألبوم ناويها - ٢٠٠٨



لديك سرٌّ لا يعلمه أحدٌ سواك!

- "هبة، ليه من بعد عماد اخترت شريف؟ الفرق بينهم كان كبير قوى".
- "شريف عوضنى عن مشاعر كثير قوى غير أن تدينه كان لذيذ ولايق على تدينى".
- "يعنى ايه لايق؟"
- "شريف بالنسبة لى المتدين بعد شوية شقاوة".
- "عرفت منين؟"
- "ايه يا دكتور أنت نسيت أنا كنت أزاي، ربنا يغفر ويسامح بقى".
- "آمين، أخبارك ايه مع شريف؟"
- "نفس المشكلة، أنا الى بعمل كل حاجة وهو بيعتمد على بشكل مبالغ فيه".
- "تعرفى مشكلتك ايه؟"
- "ايه يا دكتور؟"
- "أن أنت وجوزك مش فاهمين دور كل واحد".
- "أنا بقوم بدورى كويس جدًا".
- فى ساعة مبكرة جلست هبة فى إحدى الكافيهات المخصصة للسيدات،



وأخرجت جهازها اللوحي وبدأت في الكتابة.

بحثت عن نفسي كثيراً بعد انفصالي عن عماد، لا أنكر أنني كنت على مقدار من الجمال، مما دعا الكثير لمحاولة الارتباط بي، ولكنني رفضت الجميع كنت أحب عماد، بحثت كثيراً عن أخباره وانتظرته سنوات، أعترف أنه لو كان عاد وحاول مرة واحدة أخرى لكنت عدت ولكنه لم يعد، كان على أن أبحث عن شيء جديد وبحثت كثيراً إلى أن هداني الله.

- «إيه اللي أنت لابساء ده؟»

أمام مرآتها وقفت تحاول لف حجاب حريري.

- «إيه يا ماما بجرب الحجاب بس».

- «في أيه يا هبة أنت مخبية عنى حاجة؟»

- «لا خالص».

- «أنت بقيتي مختلفة من بعد انفصالك عن عماد».

- «يا ماما عدت سنين وخلاص مافيش عماد».

- «يا بنتي وأنت بقيتي حد تاني ومن ساعتها قافلة على نفسك».

- «أنا زى الفل يا ماما، ممكن تسيبيني لوحدي شوية، أنا تعبانة».

تركتها الأم ونظرت هبة في درج مكتبها لتخرج وللمرة الأولى في حياتها شريط ديني.

لم تعترض أُمى فقط .

ياسمين: "هبة الى أنت فيه ده هبل".

غادة: "فاكرة يا هبة زمان لما كنت بقولك الارتباط ده عبط لازم تفوقى".

مها: "ماينفعش قطة الشلة تبقى مطفية كده".

توقفت هبة قليلاً عن الكتابة للصلاة ثم تالت الأحرف أمامها.

فقدت اتزانى مع هذا الشعور بالفقد، لم أعد الأميرة التى تلهب الأبصار ببريقها، لم أعد سوى جسد بلا روح، انقطعت عن عالمى وظللت حبيسة حزن رفضت أن أبوح به لأحد، ظللت تائهة لسنوات إلى أن تغير كل شىء بعد أول لقاء لى مع إحدى الداعيات - أم إكرام - كما كانوا يلقبونها، هذه الأم الرائعة التى حاولت بلين أن تُصلح ما أفسدته أسر كثيرة ومجتمع من أخلاقيات وأساسيات الدين، كان هدفها أن تضعنا على أول طريق الإسلام الصحيح، الدين الذى كرم المرأة كما لم يكرمها أحد، كانت تحمل شهادات أزهرية وأخرى من دول إسلامية وجامعات عن الشريعة والأحكام، متخصصة فى علم النفس وطبىبة بشرية ومع كل هذا كانت ابتسامتها تأسر طلابها، تدريجياً ومع نصائح أم إكرام بدأت أعود إلى روحى، ومع الوقت بدأت فى نسيانه ليس لأننى لم أعد أحبه ولكن لأن العلاقة دون زواج حرام شرعاً.

استطاعت محاضرات كثيرة للشيخ يعقوب وخاصة وهو يقول: "يا من تبحثين عن الحب يا من تبحثين عن الأمان، يا من من تبحثين عن الاستقرار، يا من تبحثين عن الحياة والسعادة - ومثلها للشباب - لن تجدوه إلا بالدين"، ثم يقول: "قال رسول الله صلى الله عليه وسلم "عليكم بالصدق فإن الصدق يهدى إلى البر وإن البر يهدى إلى الجنة، وإياكم والكذب فإن الكذب يهدى

إلى الفجور وإن الفجور يهدى إلى النار". وشيئًا فشيئًا بدأت أخرج من حزني إلى أن رحل تدريجيًا من قلبي، وإن ظل ذكرى.

أغمضت هبة عينيها قليلًا ثم أكملت.

سيطر حلمي ومها على عماد حتى تقدم لخطبة مها، رغم التحفظ الذى أبدته والدتها خوفًا من خوض تجربة جديدة فاشلة، ولكن مها كان لها رأى مغاير، هى لا تريد أن تبقى بلا زواج وحلم الأمومة كان يراودها وعماد صورة مثالية للزوج، له شخصية مستقلة، مستوى اجتماعى يتناسب مع أسرتها، ولو كان هناك حب لا كتملت الصورة، لقد فقدت هذه الفتاة متعة الحب منذ أن خانها خالد.

- "دى المرة الأخيرة اللى بحدرك فيها يا بنتى، الفرح قرب وأنا مش شايفة فى عينيك لمعة حب ولا سعادة".

- "حب!! أنت عارفة يا مامتى الحدوتة والسعادة احنا ممكن نخلقها".

- "خايفة عليك".

- "أكيد مش هايجصل أسوأ، أنا حاربت المرة دى ومش كل مرة هخسر".

بالنسبة لعماد كانت مها لحظة السكون التى انتظرها لسنوات بين لحظات متعة زائفة، ومع إصرار مها لم يكن لديه خيار، مها كانت النهاية السعيدة لروايتها كما يظن، لم يرتكب أى خطأ فى الفترة الأولى، كان صريحًا معها إلى أبعد الحدود، لم يدخل فى أى علاقة بعد زواجه إلا حين ظهرت ياسمين من جديد، ورغم كم العلامات التى أرسلت له من السماء لم يتعظ، ظل بلا وعى حتى أكتشف أنه كان ضحية متعة سخيفة، كان يسدد دين ما فعله بكثيرات قبل

زواجه، ولكن اللحظة التي شعر فيها بالندم، توقف عن النظر إلى مها ولم يقو على رفع عينيه وهي تتحدث معه وبدأ يبتعد عنها شيئاً فشيئاً، وعلى الرغم من أن حياتهما بلا قلب، لاحظت مها أن هناك اختلاف في معاملته استفزها كأنثى.

- "مالك يا عماد؟"

- "ولا حاجة مشغول بس بشوية حاجات".

كان حلمي قد أدى دوره مع مها على أكمل وجه، استطاع أن يعيد لها طاقتها وتفاؤلها وبلا مقدمات وقفت وكأنها تلقى محاضرة أمام جمع من الناس.

(دفتر الملاحظات - الملف الرابع - الاحتياج)

(مها وعماد)

- "يمكن حياتنا مملة وأنا معترفة بكده، يمكن حياتنا ماشية بالورقة والقلم يمكن عقلنا الى مسيطر، جايز نكون مش بنحب بعض بالصورة الى كان نفسى فيها، حاجات كثير قوى بس الحاجة الوحيدة الى مش هاينفع أفرط فيها أن احنا نتكلم".

دبت الحياة في هذا المنزل من شرارة أطلقتها مها دون أن تشعر.

- "مدام بتتكلمى بصراحة، أنا كمان هتكلم بصراحة، أنا عملت غلطة وغلطة كبيرة قوى".

وقفت مها أمام مكيف الهواء مباشرة في محاولة لأخذ أكبر قدر من الأكسجين، كان أمامها خياران إما أن تطلب منه الحقيقة كاملة التي هى بلا أدنى شك

علاقة بامرأة أخرى بحكم معرفتها بماضيه وتنتهى الزيجة أو أن تستغل الموقف لصالح حياتها.

- "طب لو قلت إني مساحاك يا عماد ومش عايزة أعرف تفاصيل؟"

بدهشة على رد فعلها.

- "بالسهولة دى؟"

- "لا مش بالسهولة دى، محتاجة مقابل ده حاجة".

- "مقابل!!"

- "توعدى إنك تروح عند الدكتور بتاعى، هو طالب يشوفك".

- "أنا مش مجنون على فكرة".

- "يعنى هو أنا اللي مجنونة، بس أحب أؤكد لك إني لو ما كنتش روحت له كنت أكيد هتجنن".

- "يا مها".

- "شرطى الوحيد وأقسم بالله مساحاك".

لم يسامح شريف نفسه على الخطأ الذى ارتكبه فى حق نفسه أولاً وفى حق زوج ياسمين ثانياً، ظل لأيام حبيس منزله يتحاشى الأضواء حتى ضوء هاتفه كان يخشاه، وإن كان مع الوقت بدأ فى العودة إلى الحياة الطبيعية من جديد.

- "ايه يا شريف أنت فين؟"

- «أنت عماد!»
- «مش عارف صوتي؟»
- «معلش كنت نايم بس ومش واخد بالي».
- «أنت محتفى بقالك كثير، المهم البس هاعدي عليك أنا خارج النهارده مع جماعة اصحابنا».
- «مها معاك؟»
- «لا هو أنا عبيط!»
- «رحت للدكتور بتاعها».
- «رحت يا سيدى هابقى أحكى لك».
- كانت المفاجأة حين رأى شريف ياسمين بين الحضور ومعها خالد زوجها ظهر أقل من ربع الساعة ورحل وتركها، نسي شريف كل ما فعلته بمجرد رؤيتها، ظهرت مشاعره ولم يستطع أن يخفيها في نظراته ومحاولاته المستميتة للتقرب منها، لاحظ عماد وتوجه إلى ياسمين.
- «ماله شريف؟»
- «ايه ده أنت قررت تعطف على وتكلمنى تاني؟!»
- «إخلصي».
- كان عماد قد قطع علاقته بياسمين بعد وعده لمها.

- «ماله يعنى؟»

احتد عليها.

- «أنت مش واخده بالك بيعمل ايه؟!»

- «بالراحة هاقولك بس احلف إنك مش هاتقول له لأحسن شريف طيب».

- «فى ايه؟»

- «بيحبني يا عماد وبيرسم خيالات فى دماغه».

- «يعنى مافيش حاجة!»

- «أنت هتستهبل ولا ايه؟»

- «مش فاهم والله».

- «بيحبني يا سيدى ومتخيل إني بأحبه وبيجرى ورايا».

- «طيب كنتِ عرفيني وأنا أوقفه».

- «لا اوعى، شريف طيب وغلبان أنا بأعرف أوقفه».

انتهى الحفل وفى طريق عودتهما حاول عماد أن يقدم له يد المساعدة.

- «أنا مش عارف ابتدى منين».

- «عايز ايه؟»

- «ياسمين».

- «مالها؟»

- «ياسمين وخلاص».

- «ايوه مالها يعني؟»

- «بلاش».

بعد دقائق من الصمت.

- «بلاش ليه يا عماد هي هاتطلق واحنا متفقين على كل حاجة».

للحظة حاول أن يتذكر كلام ياسمين ويقنع نفسه أن شريف يرسم أوهامه ولكنه أكمل.

- «متفقين على ايه؟»

- «على كل حاجة».

- «الى هي ايه؟»

- «أنت صاحبي وأنا هاقول لك، خالد وياسمين هيطلقوا قريب جدًا هي طلبت الطلاق خلاص، عشان خالد بنى آدم زبالة وبيعاملها بمنتهى الحقارة غير إنه بيعمل مصالح عليها و.....».

- «لا استنى بيعمل مصالح ازاي؟»

سرد شريف مشاكل خالد وياسمين بتفاصيلها والتي أخبرته بها من قبل بكامل تفاصيلها، ولأن عماد قد خاض تجارب كثيرة أدرك ما فعلته ياسمين.



- «أنت وقفت العربية ليه؟»

- «لا تعالى ننزل نشرب حاجة بقى الموضوع كبير».

وكانت الصدمة التي اهتزت لها سنوات شريف الأخيرة، سنوات ضاعت في اللهث خلف ياسمين، سنوات فقد فيها متعة الحب بسببها.

كان قرارهما سريعًا بالبداية في أخذ الثأر مما فعلته بهما، عماد خسر هبة من قبل بسببها، وكاد أن يخسر مها، وشريف خسر كل شيء.

كان الأسهل إلقاء اللوم عليها ولم يفكر أحد منهما في خطيئته، شريف الذى خان زوجها، وعماد الذى خان كل من ارتبط بهم بسببها.

توقفت هبة عن الكتابة حين حان موعد الصلاة.

\*\*\*

- «واشل أنت ليه خليت والدك هو اللي يطلق مها؟»

- «أنا كنت قدامها ضعيف قوى وكنت حاسس قد ايه هى كويسة، بس المشكلة إني ماكنتش قادر أبص فى عنيتها لحظة الطلاق».

- «يعنى أنت ماكنتش عايز تطلقها؟»

- «والله يا أبو الأحلام أنا أساسًا ماكنتش عايز الجواز دى تتم، بس تخيل نفسك كده وأبوك بيكلم مراتك ويقلها اقلعى الحجاب قدامه، أكيد أكيد قالت على مش راجل».

- «وأنت ليه ماكلمتهاش تفهمها؟»

- «عشان أنا بقى شكلى عيل صغير خلاص مش هاعرف ارفع عيني فيها، وبما أن كده كده منظري كان زفت، فبابا خلص الموضوع».

- «سؤال أخير، هي مكالمتها الأخيرة فرقت معاك ليه؟»

- «عشان ببساطة يومها قفلت السماعة ورحت قلت لبابا عايز تتجوز أنت اتجوز، انما أنا مش هاخليك تجوزنى وكفاية سيطرة على حياتى، بس تعرف المكالمة دى خلتنى اتنيل واتجوز غادة ماكنتش متخيل إنها كده».

أنهى واثل عمله واتجه إلى المقهى، ثم تابع وميض المؤشر أمامه وبدأ فى السرد.

(دفتر الملاحظات - القلب)

مرت سنوات زواجى -أنا وغادة- الأولى بدافع الشوق، ولكن مع الوقت انتهت قوة هذا الدافع وبات علينا أن نجتهد أكثر ولكننا تكاسلنا، تخلت غادة عن حكمتها وبدأت فى إتقان دور الأنثى الشرقية فى تضيق الخناق على، شك مستمر فى كل تصرفاتى وتهديدات بالرحيل، بدأت قصة الحب فى التحول تدريجيًا إلى معركة لا بد أن تنتصر فيها، وكلما زاد انتصارها زادت نشوتها ومع انتصارات متتالية وهروب مستمر منى، ازدادت الفجوة ولم يكن الحب وحده يكفى للصمود أمام هذا الكم من الصراع، تحولت غرفة معيشتنا إلى سجن، بمجرد أن أدخل ودون أن ألقى التحية أتوجه إلى التلفاز لأشاهد إحدى مباريات كرة القدم، ولأننى أعلم أنها لن تتركنى أنعم بالهدوء وأنها ستعترض على المباريات، ابتعت شاشة جديدة بخاصية العرض المزدوجة وتحول المشهد الذى رسمناه سويًا لغرفة معيشة رومانسية إلى غرفة سجن مزدوجة.

أصبح امتزاج اللون الأبيض والبنفسج يثير الشجون، الأريكة التى اخترناها

لتجمعنا كانت أشبه بسياج من حديد، حتى الصور التي كانت تشبه تلك المعلقة في "سوا"، تحولت ألوانها لتصبح مزيجاً يثير الرعب، الرُكنة التي اخترتها للاستمتاع باتت الأتربة هي من تستمتع بها، أجلس لأشاهد إحدى المباريات أو أجرى حديثاً سريعاً على هاتفى وهى تضع السماعات لتشاهد برامجها المفضلة، مع الوقت انتهت قصة الحب وارتفعت حدة الخلاف أمام دهشة الكثير من عائلتنا وأصدقائنا، غرورها وكبريائى دفعنا لعدم الاعتراف بأخطاء كثيرة، وعلى الرغم من إني كنت أسير بخطى ثابتة فى أعمالى لكنها حاولت السيطرة على حياتى.

- «أنا قاعد وكل شوية يحاول أحايلك، أنا زهقت».

- «أنت بتحاولينى، أنت على طول محسسنى إنى عندى عقد».

- «أنا؟! أنت مش طبيعية، على طول يحاول اقف جنبك وأنت بتحاولى تسيطر على كل حاجة».

- «أنا اسيطر عليك هو أنت مش واخد بالك أنت أزاى مش مهمت، أنت على طول بتحسسنى باللى أنت عايزه ويس، عايزنى ابقى مبسوطه وقت ما تحب وتجبطنى وقت ما تعوز، أنا زهقت».

- «أنا مش عارف أقول غير إنك أسوأ غلطة فى حياتى».

\*\*\*

توقف حلمى قليلاً عن الكتابة وهو يخرج الملف الأول ويقرأ منه.

تحولت عادة إلى صورة من والده وهى تحاول التحكم فيه، ومع محاولات السيطرة المستمرة، صب وائل غضب سنين عمره من والده وسيطرته عليه إليها، عادة

التي لم يعرف قلبها الحب إلا مع وائل رفضت جميع محاولات الصلح، أعلنت كثيراً أنها تشعر بالندم على زواجها أما وائل كان يبحث عن راحته ولم يهتم بشأنها، وانخرط في أعماله وكان دائم اللوم عليها أنها تعترض طريق نجاحه، ظل وائل يهاجم سيطرتها بعنف إلى أن تذكر حاله مع والده وتذكر مكالمته معها له بعد الطلاق، أثبتت ذكريات سيئة داخله، وظل يخزن مشاعره السلبية إلى أن كانت اللحظة التي انهارت فيها كل المشاعر.

\*\*\*

فك وائل رابطة عنقه قليلاً ثم عاود الكتابة.

لا زالت هبة وحيدة وإن استعادت كثيراً من ثقته في نفسها، أخذت وقتاً في التفكير بين ارتداء الحجاب من عدمه، صراع نفسى كان لعماد تأثير غير مباشر فيه، عماد كان يرفض أن ترتدى الحجاب، وظل لسنوات يغذى عقلها الباطن أنها سوف تبدو أكبر سناً إذا ما ارتدته، رفضت الكثير ممن تقدم لخطبتها حتى دب الشك في قلب أمها.

- "هو أنت مش عايزة تتجوزى ليه؟"

- "ماما أنا مش هاتجوز كده وخلاص، لازم أكون مرتاحة قوى".

- "ولا يمكن مستنيه عماد؟"

- "عماد خلاص يا ماما، خلاص من زمان، وماتفتحيش الموضوع ده تانى عشان خاطرى".

- "يا بنتى ده خامس عريس ترفضيه".

- "مش أنت دائماً كنتِ بتقولى إني هاختر أحسن واحد فى الدنيا سيبنى بقى أختار".

ترك وائل وميض المؤشر وحيداً وهو يطلب تغيير حجر المعسل الخاص به.  
مشاعر هبة غير مستقرة وإن كانت مشاعر ياسمين الآن فى أوجها، هى لا تشعر بأى ندم وهى تجلس مع شريف.

- "تعرفى أنا بحلم باليوم اللى هنتجوز فيه".

- "بجد يا شريف؟"

- "بأعد الأيام يوم ورا التانى لحد ما تخلصى من الزفت ده".

- "يا رب يا شريف".

- "بس ايه الصور اللى بيعتيها امبارح دى، أنت أول مرة تعمل كده".

- "شريف أنت خلاص تعتبر جوزى ولا أنت نسيت اللى حصل، تيجى نساfer أنا وأنت الساحل يومين لوحدنا".

- "والله فكرة بس هتقولى ايه للزفت ده؟"

- "هاتصرف".

جلسة رومانسية ومحاولات مستميتة من شريف للسيطرة على مشاعره نصف ساعة، مرت عليه فى كل ثانية فيها يود أن يضربها بكل ما أوتى من قوة، ولكنه استمر واقرب منها وهو يفتح هاتفه المحمول ويشير إلى الصور التى أرسلتها له فى اللحظة التى دخل فيها عماد، ابتسم عماد وبكل ثقة نظر إلى ياسمين.

- «ايه ده الصور دى عندى أنا كمان».

لحظة من الصمت بين ثلاثتهم ونصب شريف المحاكمة.

- «ليه!! عملت فى كده ليه!! اشمعنا أنا وهو!! ما كنت تشوفى ليك اى كلب من الشارع ينام معاك».

تدخل عماد فى هذه اللحظة فى محاولة منه لتهدئته.

- «شريف احنا اتفقنا على ايه مش عايزين فضائح، صوتك».

اللحظة التى تحدثت فيها ياسمين.

- «اتفقتوا!!»

- «هو أنت فاكدة ايه يا حلوة! احنا لعبنا بليك براحتنا قوى ولسه ها نلعب قولها يا عماد، ولا أنت فاكدة اللى أنت عملتيه ده هايعدى كده».

وبرغم غضب شريف إلا أنه حاول أن يتحدث بهدوء وأكمل.

- «أنت عقابك الوحيد إنك تفضلى متجوزة خالد ده، ووحياة أمى لو ما اختفيتى من حياتنا وحياة أى حد نعرفه لنفضحك فضيحة أقسم بالله ما فى زيتها، ومش هاتعرفى تنامى حتى فى بيتكم، وبنتك هاتعرف كل حاجة مش دى اللى أنت خايقة لتعرف إنك شر...».

- «شريف، اهدى شوية».

- «اهدى ليه؟ هى لسه شافت حاجة وبصى لو عرفت فى يوم إنك اتطلقتى، بنتك هيبكون عندها كل صور أمها ولو سافرت آخر الدنيا، أنت اللى زيك لازم

يعيش في ذل باقى حياته».

نظرت ياسمين إليهما وهى تحاول ألا تبكى.

- «وأنت رأيك ايه يا عماد أنت كمان؟ عايز تضيف حاجة؟»

تأثر عماد بانكسار ياسمين ولم يجب.

- «أنتم الاثنين بتلوموني كأنى أنا السبب لوحدى، لا معلىش بقى شريف أنت عارف إنى متجوزه وحصل الى حصل ولو ما كنتش عرفت حاجة كنت هتعمل كده معايا كثير، وأنت يا عماد ايه مش واخد بالك إنك متجوز، مش واخد بالك إنى دأشًا كنت موجودة من وأنت مصاحب هبة ايه هتعمل قديس دلوقتى، أنا هابعد مع انكم مشتركين معايا فى الذنب بس هابعد عشان خاطر بنتى، هابعد عشان هى أهم حاجة فى حياتى ومش أنا لوحدى الى غلطانة».

بعصبية تحدث شريف.

- «أنت ليك عين يا ....».

كانت على وشك أن تهاجم أكثر وتبرر لكنها فضلت الصمت، هى تعلم أن الخطأ الذى وقعت فيه لا يغتفر وأنها كانت أضعف من أن تطلب من الرجال أن يتوقفوا عن حد معين كانت ضعيفة ولكن ضعف شريف وعماد كان أقوى.

ظل شريف يعانى كثيرًا حتى وجد راحته فى الالتزام الدينى وبدأ يشغل روحه ويعيش فى سكينة الإيمان، وبعد سنوات رشحت له إحدى زوجات أصدقائه هبة، هبة ظلت فترة ترفض من يتقدم لخطبتها كان شرطها الوحيد هو أن يكون ملتزم دينيًا وكانت الصورة الأمثل فى شريف، ورغم اعتراض الأسترتين

إلا أنه وجد فيها صورة لأمه، تلك الصورة التي رفضتها هبة فهي زوجته وليست والدته، ظلت الصدمة التي عاشها شريف تؤثر في شخصيته، أصبح دائم الشعور بعدم الثقة تلك المشكلة زادت داخله مع كل مرة حاولت فيها هبة أن تحل مشاكلهم بمثالية، كان يشعر فيها بضعف في ثقته بات يحاول كثيرًا وهي ترفض محاولاته لأنها ببساطة كانت تريد محاولاته بطريقتها هي، كان حلمي هو المنقذ حين خطا الخطوة الأولى تجاه إنجاح زواجه، هي اللحظة التي أدرك فيها أنه كان حبيس تجربة قاسية.

تابع شريف مع حلمي ووجد معه الراحة، وتدرجيًا استطاع حلمي أن يخرج كم الغضب الساكن بداخل شريف، لم يفعل شيئًا سوى أنه أفرغ مساحة كفاية داخل عقله ليتقبل بها هبة، معارك كثيرة خاضها شريف وكان لا بد من مساعدة أحد ليعود إلى نفسه، واتخذ حوار هبة مسارًا جديدًا.

(دفتر الملاحظات - الروح - هبة وشريف)

- «إيه الآية اللي أنت معلقها دي؟»

- «الآية ٣. من سورة فصلت » إِنَّ الَّذِينَ قَالُوا رَبُّنَا اللَّهُ ثُمَّ اسْتَقَامُوا تَتَنَزَّلُ عَلَيْهِمُ الْمَلَائِكَةُ أَلَّا تَتَخَفُوا وَلَا تَحْزَنُوا وَأَبْشِرُوا بِالْجَنَّةِ الَّتِي كُنْتُمْ تُوعَدُونَ».

- «أول مرة تعلق آية!»

- «عايز دائمًا افتكر أن القناعة حاجة والعمل بالقناعة دي حاجة تانية خالص».

- «مش فاهمة».



- «القناعة هنا إن ربنا الله والعمل بالقناعة إنهم استقاموا وكانت النتيجة باقى الآفة».

- «حلوه فعلاً ربنا بكرمك».

- «بس أنا علقتهأ عشان احنا الاثنين نفتكر».

- «ما احنا بنحاول نعمل وربنا يتقبل».

- «آمين، بس مش ده قصى».

- «قصدك ايه يا شريف».

- «قصى أن احنا الاثنين عندنا قناعة اننا نعيش مبسوطين ولازم نعمل بالقناعة دى».

كانت الشرارة الأولى من شريف إلى تلك الأسرة عندما تحدث بنفس لغة هبة وبدأ سويًا فى حل خلافتهما، كانت البداية وهو يعترف أنه جزء من المشكلة وبعد محاولات كثيرة بدأت تعود الحياة تدريجيًا لطبيعتها.

لم تعد حياة خالد لطبيعتها قط كانت المرة الأولى التى يتحدث فيها خالد مع مها بعد سنوات من زواجه، وإن كان الحوار لم يتعد سوى سؤال عن حالها وأحوال زواجها ولكن كان له أثر بالغ.

- «أنا كنت فرحان قوى يا حلمى وأنا بكلمها».

- «عينك بتلمع كده ليه؟»

- «فرحان، بس أنا كنت جبان».

- «ليه؟»

- «عشان خفت أسألها بصراحة، لما سألتها عن جوزها كان نفسى اعرف هو كويس ولا لا، للأسف تمنيت للحظة إنه يكون وحش ويسيبوا بعض، سألتها عن أولادها وكان نفسى اعرف شبه مين، عمال أفتح فى كلام فاضى والسؤال كان على لسانى هو أنت مبسوطه ولا لا؟ كان نفسى أكتب إني فعلاً بحبها وإني حمار عشان خونتها، كنت مستنيها تشمنى أو تزعق أو حتى ترفض الكلام معايا وماحصلش».

وضع يده على رأسه.

- «اتكلمتى معايا عادى يا مها، عادى جداً كنت مستنى منك أى رد فعل، خفت أسألها أنت نسييتى بس كنت فرحان وأنا بكلمها، للأسف ماردتش عليا لما فى الآخر بعث: «أنا آسف يا مها».

طلب واثل الحساب وأغلق حاسوبه.

\*\*\*

تركت حبيبة رأس حلمى وجلست على الأرض ووضعت رأسها على فخذه.

- «لا يا حلمى أنت عمرك ما خنت مع أن فى اسم ماغيرتوش».

- «اسم!»

- «ايوه يا حلمى، مشكلتك إنك بتنسى بس، زمان حكيت لى عن بنت حبيتها وأنت صغير وكان اسمها مها».

- «أنا حكيت ده؟»

- «ايوه وتعرف من زمان عارفة أن جواك حاجة صغيرة ليها، بس أنا عمري ما زعلت، أنا معايا كل حاجة فيك، ماعدا حتة صغيرة ومش فارقة معايا ومسامحك».

\*\*\*

سنوات تمر وبعدها لا يوجد للاعتذار معنى.

في لقاء أسرى وبعد سنوات جمعهما بيت أحد أقاربهما.

- «مها، ازيك؟»

لم تمد يدها للسلام.

- «ازيك يا خالد عامل ايه؟»

- «من غير لف ودوران أنا بقالي سنين نفسى اعتذر».

- «ششششش، كنا عيال».

- «لا ما كناش وأنا غلطت فيك غلط جامد».

- «ولا اى حاجة».

- «لا طبعا أنا فعلاً غلطت».

- «لا أنت ماغلطتش، أنت رمتنى زمان رمية كلاب، وخلاص بقى مايصحش أنا متجوزة، إزاي ياسمين جت معاك».

- «تغيرتى يا بنت عمى».

- «كويس إنك فاكر إني بنت عمك اللى كان المفروض على الأقل تقولها زمان إنك هترميها».

- «نفسى أعوضك».

- «عن السنين الى كل يوم كنت بموت فيها عشان اترميت رمية مش حلوة، اطلع لمراتك حالا».

خرج خالد وبقيت هى فى الشرفة قليلاً وهى تبتسم فهو لم ينساها كما وعدته وهى قد محته من ذاكرتها منذ زمن طويل.

\*\*\*

- «شريف».

- «ايوه مين؟»

- «أنا ياسمين».

- «ياه، أنت لسه عايشة؟»

- «مستغرب من المكالمه».

- «الصراحة اه، أنت ما عندكيش دم غالباً».

- «حقك، بس أنا بمحاول أعالج نفسى وانضف».

- «أنت! ياسمين أنا متجوز وربنا هدانى من زمان، وبدعى فى كل صلاة يغفر لى

الى عملته والحمد لله نسيت حاجات كثير".

- "بس أنا مانستش، أنت الغلطة الوحيدة".

- "بس بس الله اعلم كنت العلاقة الوحيدة".

- "والله أنا فعلاً كنت بحبك و...".

- "ياسمين هو أنت زمان خلتيني أزور أمك ليه؟ عشان تشوفني وتقول رأيها فيّ ولا عشان ايه؟ اتجوزقي ليه يا ياسمين وخلفتي ليه؟ كدبتى علىّ وقلت لى أن الخلفة كانت غصب عنك وبعد كده عرفت إنك حاولت كثير عشان تخلفي، أنت ايه؟ إهمدى بقى؟ ربنا يهديك يا شيخة والله مش عايز ادعى عليك مش عايز".

- "خلصت، أنا بنتى ماتت يا شريف، ربنا انتقم وبنقى ماتت فرحان كده؟"

- "ايه!!"

- "ربنا عاقبنى وحسيت بالعجز من يومها، بنتى صورتها في كل مكان حوليه، ومع كل صورة غلطة من الى عملتها، بنتى ماتت يا شريف لو كان ده يريحك".

- "أنا عمرى مادعيت عليك ولا على بنتك عمرى".

- "المهم أرجوك سامحني، أنا مش حمل أى حاجة تانى أبوس ايدك بطل تدعى على".

- "والله عمرى ما دعيت عليك والله، وربنا غفور".

\*\*\*

- «أنت بتقول ايه يا زفت أنت؟»

- «ايه يا عماد مالك؟ هاتجوز».

- «وغادة؟»

- «مالها غادة، عايزة تفضل معايا أهلاً وسهلاً مش عايزة براحتها».

- «واللى بينكم؟»

- «بيننا ايه ما كفاية كذب بقى، أنت عايز تكذب على ولا على نفسك ولا على مين احنا لوحدنا، أنا عايش فى نكد ونكد بس أنا واثل يا عماد، اللى كان بيقلب الدنيا مسخرة بقيت كئيب بسببها».

- «طب ما الجديدة ممكن تكون نكدية».

- «مافيش حاجة مضمونة، بس أنا عايز أعيش مبسوط، تعرف أنا عارف أن الناس هتقول عنى خاين بما إنى راجل يعنى وكلنا خونة، بس أنا مش خاين أنا هاتجوز وهاديها مطلق الحرية، أنا مش خائن أنا راجل وزى كل الرجالة بزهق بسرعة، تعرف يا عماد احنا أطفال وبنحتاج معاملة مختلفة، شوف الطفل بيحتاج ايه شوية دلح وحنان ومغفرة وده مش موجود أعيش معاها ليه؟»

- «طب ما أنا ومها عاديين».

- «عاديين فاممكن تعيشوا بس لما تكون عايزة تحس إنها الراجل وتقلب كل حاجة فى الكون يبقى تولع».

(١٠)

إحلم

«إحلم معايا»

حمزة نمرة

ألبوم احلم معايا - ٢٠٠٩





الواقع هو حدود حلمك.

استيقظت مها في منتصف الليل، ونظرت جانبها فلم تجد عماد، بصوت مبحوح نادته عليه أكثر من مرة فلم يستجب، نظرت إلى غرفة نومها الجديدة بابتسامة فقد تخلصوا من معظم أثاث منزلهم مؤخرًا، استطاعت مها وحدها أن تعيد الحياة إلى أسرتها على الرغم أنها اكتشفت علاقة عماد وياسمين إلا أنها قررت أن تسامحه.

- "تفتكر هي ساحتني ليه يا حلمي؟"

- "الخطوة الأولى لأي علاقة هي الغفران، هي كانت قوية جدًا لدرجة إنها قررت تسامح".

أزاحت الغطاء عنها وبعين أقرب إلى النوم قامت بحثًا عنه.

- "يا عماد".

كانت سماعة الأذن تعزله عن العالم، فلم يسمع منها صوت إلا أنه لاحظ حركتها.

- "أنت صاحبة ليه دلوقتي؟"

- "أنا بنادى عليك بقالى شوية واتخضيت، بتعمل ايه؟"

- "باكتب".

- "لا حوش الثقافة".

نظر إليها بزهو.

- "اه طول عمرى مثقف ماخديش بالك؟"

- "ما تمثلش اخرك ميكي".

كشوال وضعها عماد على كتفه وألقاها على السرير.

- "نامى".

- "بتكتب ايه؟ وهنام".

- "رواية".

- "رواية ايه إن شاء الله".

- "رواية، عادى".

- "ودى اسمى فيها؟"

- "لا".

- "طب ايه اسم البطلة؟"

- "لا هو بطل ونامى بقى".

- "مافيش بنات؟"

- "لا فيها بس مش أبطال".

- "طب اسم البطل ايه؟"

- "حلمى".

- "واسم الرواية؟"

- "روايتنا".

- "رواية مين؟ أنا وأنت؟!"

- "لا".

تركها عماد وعاد إلى مكتبه.

أعلنت الساعة عن منتصف ليل اليوم الثانى ولم يتذوقا طعم النوم، ساعده بندول ساعته على الهدوء وضع نظارته، ثم جلس يداعب شعر حبيبة وهما يستمعا إلى موسيقاهما المفضلة.

- "أنا آسف".

- "أنت لسه بتفتكر مها؟"

- "أنت عارفة ايه اللى حصل بينى وبين مها؟"

- "لا ومش عايزة أعرف سبب انكم سيبتوا بعض".

- "أنا عايز أقول لك".

- "براحتك".

- "أنا مها كنا بنحب بعض جدًّا، بس عمر واحد فينا صارح التانى".

- «ازای یعنی؟»

- «ماکنش لازم نتکلم عشان نفهم اننا بنحب بعض، کانت کل حاجة بتقول ده، کفاية ضحکتها لما کانت بتشوفنى».

- «أنت لسه فاكر ضحکتها؟»

- «.....».

- «وعمرک مانسيتها».

عاد حلمى سريعاً إلى قلمه.

کانت مها على وشك النوم حين وصلتها رسالة على هاتفها المحمول، على جروب خاص لأصدقاء طفولتها.

ياسمين: «على ميعادنا بكره يا بنات وحياء أمى اللى مش هاتيحي هافشخ... ولا بلاش عشان بتزعلوا».

غادة: « hastankom kolkom هستانكم کلکم»

مها: «هو أنتم صاحيين ليه لحد دلوقتى؟»

غادة: «أنا قاعدة بخلص فى الرواية».

ياسمين: «دى واحدة جديدة؟»

غادة: «ايوه يا ياسمين».

ياسمين: «اسمها ايه؟»

غادة: «روايتنا».

ياسمين: «اوعى تكون روايتنا؟»

مها: «أنت بتكتبي عننا؟»

ياسمين: «مها أنت صاحبة لحد دلوقتي؟ اعترفي هو عماد فين؟»

مها: «بموت في سفالتك».

هبة: «أنا هاجي إن شاء الله وقوموا صلوا ركعتين يمكن تيجوا معايا الجنة».

غادة: « looooool »

ياسمين: «حتى أنت يا طاهرة صاحبة بتعمل ايه؟»

هبة: «مش هارد».

غادة: « wa7shtonee » وحشتوني

ياسمين: «بكرة الساعة ٥ ».

غادة: «مستنياكم، أنا مطلقة ولوحدي».

تركت غادة هاتفها وقبل أن تكمل الكتابة نظرت إلى الفراغ حولها وحاولت ألا تندم على فعلتها.

على الرغم من دهشتها وضعت حبيبة رأسها على قدم حلمى وسألته:

- «الأسماء مش مهمة صح؟»

- «ايوه الشخصيات الى بتفرق، ماتنسيش هم عمرهم ما كانوا أصحاب».
- «طب ممكن سؤال؟»
- «طبعا».
- «أنت عمرك ما نسيت مها؟»
- «بصراحة؟»
- «يا ريت».
- «مها كانت حب القلب بالنسبة لى ودى حاجة ماتنسيش».
- «مممكن اعرف ليه؟»
- «فى حاجات بتتولد جوانا ومش بتموت».
- «أنا مضايقة يا حلمى من اللى بتقوله».
- نظر حلمى إلى بندول ساعته.
- «تعرفى أنا بحب الساعة دى ليه؟»
- «ليه؟»
- «عشان شغالة لوحدها ومش محتاجة الترس الصغير عشان يدورها».
- «حلمى بص أنا ماجبش جو الإسقاطات ده وأنا قلت لك قبل كده أنت تفكيرك أبعد من تفكيرى أنت عميق إنما أنا لاء، أنت مانستش مها».

لم يعلق وعاود الكتابة.

- "هو أنا كان لازم أوافق على شريف!! أنا ماحستهوش ماكنتش بحبه، ماحلمتش بيه ولا نفسى وقف عشانه، ماحستش إني من غيره مش هاعرف أعيش، ماكنش زى ما هو فاكر إني بعته أو خدعته، والله والله يا دكتور حلمي أنا فعلاً ماكنتش بحبه، ليه كنت بشوف فى عيونه لوم وعتاب وليه البعد؟ أنا عارفة أن القلب ده مش ملكنا ومش بنتحكم فيه بس كان ممكن على الأقل يفهم أن الحب لازم يكون متبادل، كان لازم أكون بحبه وده ماحصلش".

- "طيب هو أنت كنت متضايقه لما شفتيه بعد السنين دى مع البنت دى؟"

- "لا والله خالص، أنا كنت مضايقة جداً من شكلها مش دى الى شريف يتجوزها، كان شكلها مايص قوى وأنا عارفاهم يا دكتور وعارفة أشكالهم، تعبت منهم كثير طول حياتي، أنا حبيت شريف كأخ وعشان كده ماكنتش عايزة أخويا يتجوز دى".

قررت عادة التوقف عند هذه اللحظة وهى تبكى بصوت مرتفع وظلت تبكى.

"أنا ووائل كان لازم نتطلق احنا مختلفين فى كل حاجة، على طول فاكرنى باضغط عليه مع إني كنت بمحاول أساعده، كان طالع السما بطموحه وشغله، مع أن شغله على قده وماينفعش يدى له كل الحجم ده، كان عايش الدور قوى عايش لدرجة إنه صدق إني السبب فى فشل العلاقة".

نظر عماد إلى هاتفه وهو يعلن عن وصول رسالة على جروب رجالى لأصدقائه فترك المؤشر يومض وحيداً.

خالد: "تيجوا نتقابل بكره؟"



عماد: "والله فكرة وبالمناسبة دى ممكن اجيب حشيش معايا".

خالد: "حشيش! أنت ايه يا ابني؟"

عماد: "يعنى مش هاتشرب؟"

وائل: "أنا هاشرب وش".

شريف: "هو انتم ماعندكوش شغل".

عماد: "ناخد أجازة يا اخي".

وائل: "أنا راشق".

عماد: "ما خلاص بقى مافيش حد تاخد منه الإذن يا ابن المحظوظة".

وائل: "اللهم ديمها نعمة".

خالد متهمكماً: "وهو فيه أحلى من الجواز".

شريف: "أنا هنام اتفقوا واكتبوا هنا وأنا هاجيلكم بعد الشغل".

وائل: "بعد الشغل ولا لما تاخد الاذن".

شريف: "لا الصراحة بعد الاذن".

عماد: "٥٥٥٥٥٥ على الرجالة "

شريف: "بلاش أنت يا عاتشى".

وائل: "طب أنا مستينكم عندى فى الشقة الجديدة وأنا عازب".

ضحك عماد وهو يعيد الهاتف إلى مكانه وينظر للمؤشر من جديد وإن كاد أن يغلبه النعاس ولكنه أكمل.

احتفظت شقة عادة بشكلها إلا أنها انتقلت إلى غرفة أخيها بعد الانفصال عن زوجها، والعودة إلى منزلها القديم فتحت غرفتها لترى النور من جديد وملأتها باللون الأخضر، لم تنس هوايتها القديمة فابتاعت كثيرًا من الأسطوانات المدججة وعادت لشجون رومانسياتها، كانت ياسمين أول الحاضرات رغم كم الحزن الذي تحمله ولكن لهذه الفتاة آلاف من الوجوه، بابتسامة تبدو أنها حقيقية خلعت حذاءها وبدأت في الرقص على إيقاع موسيقى غادة.

- "يخرب بيتك طول عمرك رقاصة بريمو و مزة المزز".

- "وياريت عاجب إنما البعيد جبلة".

- "كلهم كده إسأليني أنا خلصت منه دى كانت حياته فظيعة".

- "ايه ده هو أنت جمدتى كده امتى يا بت يا غادة؟"

- "قصداك على الفورمة أنا بقيت باعشق الجيم جسمى حلو صح؟"

- "وبتقولى عنى مزة".

- "استنى هاكتب حاجة بسرعة واجيلك".

كان وائل فى الشقة المقابلة، ابتاعها بمجرد الانفصال عن زوجته، هو لا يقوى على العودة للعيش مع والده فقد ذاق منه الكثير، لم يعد وائل يريد شيئًا سوى أن يعيش كما يريد هو وفى هدوء، كانت الساعة تشير إلى الواحدة حين وصل خالد.

- «هو عماد ماجاش؟»
- «أنت مش قلت مش هاتحشش؟»
- «أنا!! أنت هتمثل بقى ولا القعدة لوحدهك جنتك؟»
- «أنا اتجنن عبيط أنت ولا ايه دى العزوبية نعمة».
- نظر خالد إلى الشقة.
- «ايه يا عم القرف ده مافيش كراسى؟»
- «لا كله على الأرض منها وإليها يا خلود».
- كانت مها ثانی من حضر وبمجرد أن رأت غادة.
- «ايه ده يا غادة هو الطلاق بيحل؟»
- «لا الهم هو اللى كان بيوحش».
- «ربنا يرزقك باللى يسعدك».
- «بصى يا مها يا حبيبيتى أنا اكتفيت».
- لم تعرف أيًا منهن بعلاقة مها فى صغرها كل معرفتهن كانت تقتصر على كتب كتاب فاشل، ابتسمت مها.
- «يا بنتى ما أنا اتطلقت مرة ودلوقتى ربنا يخلى لى جوزى».
- «لا أنت وجوزك حاجة مختلفة عن البشر».

ياسمين لا زالت تنظر في الثلاجة.

- «احسديهم بقى».

- «ياسمين، وحشتيني أنت بتعملى ايه فى الثلاجة؟»

- «ماعندهاش حاجة نشربها».

توجهت عادة إلى الثلاجة وفتحت درج خاص للمشروبات.

فى هذه الأثناء وصل شريف.

- «أنا قلت إنك عازب وأكيد ما عندكش حاجة تتشرب».

- «ايه يا شريف كل اللى أنت جاييه ده؟»

نظر خالد وهو ممدد على الأرض.

- «عم الشيخ الله يفتح عليك».

- «اهو أنت اللى شيخ».

لقاء حار بين خالد وشريف فلم يلتقيا منذ فترة.

- «ايه اللى فى الشنطة دى يا شريف أكل؟»

- «أنت على طول جعان كده لا دى PS؟»

بفرحة طفولية احتضنه وائل يا ابن اللعبة.

كانت هبة آخر من حضر وبمجرد أن دخلت وخلعت إسدالها نظرت لها إليها.

مها: «أنت مابتكبريش؟»

هبة: «قولى ما شاء الله».

ياسمين: «واضح أن جوزها مدلعها».

هبة: «عيب يا ياسمين».

ياسمين: «لا بلاش الجوده عليا أنا ده احنا خربناها سوا».

هبة: «ربنا يسامحننا بقى».

بعد طول انتظار كان عماد آخر من وصل.

خالد: «فين يا ابني الحشيش؟»

عماد: «أنت مش قلت مش هاتشرب».

وائل: «أنا لسه قايل كده ماصدقنيش».

خالد: «وأنا من امتى مابشربش، لا مؤاخذه يا شيخنا بقى».

شريف: «والله لولا إنكم واحشيني ماكنتش جيت عشان الزفت ده».

اكتمل المشهد الآن، كلهم عادوا إلى طفولتهم، كل منهم خلع عباءة الصورة المزيفة التي رسمها لنفسه، الجميع يجلس على الأرض، أخرج وائل شاشة كبيرة ووضعها أمامهم ثم قام شريف بتوصيل الوصلات، أخرج عماد قطعة الحشيش وبدأ خالد في لف السجائر.

شريف: «بصوا لفوا بقى شوية كثير عشان مش كل شوية نوقف اللعب».

عماد: "يا ابني لف السيجارة جزء من متعة شربها".

خالد: "مش هيفهم حاجة ده خليه كده خام".

وائل: "لا حللوا بعدين إدوني أولعها أنا بقالى كثير ماشربتش".

عماد: "وهو أنت أساسًا كنت بتشرب بلاش تمثيل وحياة أبوك".

وائل: "لا بلاش ابويا".

جلست غادة ومها على الأريكة حين احتلت كل من ياسمين وهبة كرسيتين منفردتين.

غادة: "أنا ماعملتش أكل تحبوا نجيب اكل ايه؟"

هبة: "مشاوى".

مها: "موافقة".

ياسمين: "هاقوم اطلب أنا أعرف محل كويس".

هبة: "ايه صوت الزعيق الى فى الشقة الى جنبك ده؟"

غادة: "ده ساكن جديد لسه مشترى الشقة".

ياسمين: "واضح إنهم كثير مش واحد لوحده".

غادة: "لا واحد لوحده قابلته مرة واتكلمنا وعرفت إنه عايش لوحده".

مها: "اوبا".

غادة: "ده مطلق".

هبة: "وعرفتي كمان قصته؟"

ياسمين: "رقمه كام؟"

غادة: "الصراحة الواد جامد".

كان المشهد أكثر إثارة في الشقة المقابلة، فقد بدأ الحشيش في لعب دوره بجدارة وألهبتهم حماسة المباريات، وقف خالد وهو يحتفل بأحد أهدافه في عماد لينظر من الشباك المطل على المنور ويشاهد الفتيات الأربع.

خالد: "ولا يا وائل مين المزز اللى جنبك دول؟"

وائل: "دى واحدة عايشة لوحدها تلاقيهم أصحابها".

عماد: "عرفت منين؟"

وائل: "هو أنا تلميذ!"

شريف: "أنت يا ابني مش لسه مطلق؟"

وائل: "يا شريف يا خويا البت جامدة بشكل ومطلقة".

عماد: "صيدة يعنى".

شريف: "ربنا يهديكم".

خالد: "عايزين نظبط بقى".

\*\*\*

لم تستطع مقاومة النوم ورغم غضبها إلا أنها احتضنت قدميه بقوة وظلت وظل على وضعه يداعب خصلات شعرها.

- "تعرفى إني بحبك بعقلى وروحى و...".

- "ودائما فى احتياج لى، أنا عرفت دلوقتى ليه عمرك ما قولت إنك بتحبنى بقلبك، بس أنا عشت بالباقي سعادة ماحدث كان يتخيلها".

ترك حلمى القلم ثم مال نحوها وبالكاد طبع قبلة على رأسها.

نظرت إلى الشاشة ونظر حلمى إلى أوراقه، تحدث بقلمه وتحدثت بالمؤشر.

- "أنا عملت من حياتى رواية وأنت عملت فى حياتك رواية".

توقف وميض المؤشر وترك حلمى القلم.

سيرة حب











# فصلة

للنشر و التوزيع

Fasla Publishing & Distribution

تواصل معنا :

**01067000701**

**E-mail:-Fasla.Pub@Gmail.com**

**Facebook .Com/Fasla .Pub**